

خاکو چید نہ کوہ
نغم حسین سید

آب آب کرموئیوں

بولی بارے دو پرائیاں باتاں نویاں کرئے

پہلی: مغلان ویلے گجرات لاگے کنجاہ وچ اک وڈے عالم سن مولوی غنیمت۔
 فارسی شاعر آہے فارسی کتاباں لکھیاں۔ ناں کمایا۔ فارسی وچ بحر ایڈا کھل گیا جو عام
 گل بات وی فارسی کرن لگ سئے۔ مجال اے جے بھل ^{حلیکھے} وی پنجابی حرف
 مونہوں کڈھ جاوَن۔ لوکاں سو ^{ٹھیکھن} کرنے پر مولوی ہوراں نہ تھڑکنا۔ اک دن
 کیسہ ہويا مولوی ہوریں آپ دھیانے بیٹھے فارسی شعر پئے بولدے سن۔ اک
 دھموڑی تھمتی وچ جاوڑی۔ دھموڑی لڑی تے مولوی ہوراں ابھڑا دے تھمتی تے
 ہتھ مار کے آکھیا ”او تیری ماں نوں“ (جیڑے بزرگ گاہل مندے توں سنگدے
 نیں اوہ آہندے نیں مولوی ہوراں ”ہائے او بے بے“ آکھیا سی) مولوی ہوراں
 جو وی آکھیا اوہ فارسی نہ آہی۔ سو شاگرد ندے گئے تے پنڈ والیاں نوں دسیو نیں
 بی مولوی ہوریں بول پئے جے۔

دوجی: مغلان ویلے اک پنڈ و گھرو شاہی لشکر وچ بھرتی آہا۔ اک لڑائی وچ
 بھڑ ہويا۔ ترسہ نال مرن ہاکا ہو گیا۔ آپنا گراں نیڑے ہاس۔ گھوڑا بھیندا وڑیا
 تے فارسی وچ پانی منگیوس۔ اکھے آب! آب!! لوکاں بتھیرے ٹوے لائے۔ مڑ
 مڑ چکھو نیں پتر کیسہ چاہیدا ای۔ اوہ اکو آب آب کری گیا تے پورا ہو گیا۔ پچھوں
 کسے مولوی غنیمت پنڈ والیاں نوں دسیا بی آب پانی نوں آہندے نیں۔ جے تیس
 فارسی پڑھے ہوندے تے اج تہاڈا لشکری پتر تسانہ مردا۔ ہُن اک تے پتر و نجایو
 جے تے دو جے تیار ہو جاؤ باتشاہ چچھ کرنی اے بی میرے لشکری نوں پانی کیوں نہیں
 جے دتا۔ بات انج وی مک سکدی آہی جو پنڈ والیاں جھٹ مولوی غنیمت کولوں
 فارسی سکھ لئی۔ باتشاہ وی اوہناں نوں معاف چا کیتا تے اگوں پنڈ دا کوئی لشکری پتر
 تسانو نہ مویا۔ پر بات مکی انج بی لشکری دی ماں نوں جد آب دا مطلب پتہ لگا تاں
 اوہ پئی۔

جے میں جاناں منگیں پانی بھرھ دیاں پیالے

آب آب کر مونیوں پھڑا فارسیاں گھر گالے

باتاں چتر ہوندیاں نہیں۔ سدا ادھوریاں۔ آپنے اندروں رنت کھپے ہسیاں
وکھال دیاں نہیں۔ تے کھپے ہوندے نہیں چُچھاں۔ پہلی بات چُٹھدی اے: جے مولوی
غنیمت ہو ریں پنجابی حرف ای مونیوں نہیں سن کڈ حدے تاں اوہ کیاں کولوں کم
کیویں لیندے سن۔ گھر والی نال گل کیویں کریندے سن آہنڈ گوانڈھ نال واہ ورتن
کیویں کریندے سن۔ دوجی بات چُٹھدی اے: جے سپاہی پُتر پانی باجھ پیا مردا ہا تاں
اوہ آپ کے کھوہ کھالے تے کیوں نہ جاڈ گا۔ پنڈ والیاں وچ کھلوتا آب آب کیوں
کوکدا رہیا۔

جواب کیس ہو سکدے نہیں۔ جیویں ایسہ: گھر والی نوں تے مولوی ہو ریں
سینت نال انی سمجھا لیندے آہن۔ تے لوکاں نال اوہ گل کریندے آہن شاگرداں
راہیں۔ شاگرد سمجھو پڑھ لکھ کے مولوی ہو ریں دے وچولے تھی گئے آہن۔
جیویں آپ مولوی ہو ریں پڑھ لکھ کے مُغلاں دے وچولے تھی گئے آہن۔

دوجی بات دا جواب وی اک تے ایسہ ہو سکدا اے: سپاہی چھوہر دے گراں
وچ کھوہ کھالائے آہا ای کوئی نہ۔ کیاں کوہاں توں ترستاں چوہے تھیں پانی بھر
کے آندیاں آہیاں۔ جے پنڈ وچ کھوہ ہوندے یاں نالوں دریا لنگھدے تاں پنڈ
دے پُتر لشکراں وچ بھرتی کاہنوں ہوندے۔ پر اک جواب ایسہ وی اے جو مولوی
غنیمت ہو ریں کنجاہ دیاں عامان لوکاں نال ملنا نہیں سن چاہوندے۔ اوہناں کولوں
وکھ ہووٹا چاہوندے سن۔ تاریخ والے دسدے نہیں جو غنیمت دے پو دا کنجاہ وچ
فتوا چلدا سی تے آپ غنیمت ہو ریں لہور دے مغل گورنر مکرم خاں دے کول بہن
والیاں وچوں سن۔ فارسی اوہنیں دنیں لوکاں کولوں دکھرے ہوون دا نشان آہی۔
مولوی ہو ریں رلنا چاہوندے سن مغل حاکم نال تے فارسی تدوں مغل حاکم نال
جُڑن دا نشان آہی۔ سو اک اک فارسی فقرے وچ مولوی ہو ریں نوں دوہرا نشہ
ہوندا سی۔ لوکاں کولوں دوری داتے حاکم دی نیڑ دا۔ سپاہی پُتر وی ایسے دوہرے
نشے دا عملی سی۔ پانی تے اوہنوں چاہیدا ای نہیں سی۔ اوہ تاں آیا ہا آپنی جھوک
دیاں لوکاں نوں دس بنی ویکھو میں تساں نمائیاں توں کیڈا دوریڈا ہاں تے پشاکاں

والیاں سائیاں توں- کیڈا نیڑے۔ ایسہ اے میری نویں کمائی ہستی۔ میرے لئی پانی
آب ہو گیا اے۔ میں اوہنوں مڑپانی آکھ کے آپنی نویں کمائی ہستی و نجا دیواں۔
(آب فارسی وچ عزت نوں وی آکھدے نیں)

باتاں بندیاں روز واپری وچوں نیں پر بندیاں تاں نیں جد روز واپری وچ
کوئی زکا موٹا وادھا گھانا کر دتا جاوے۔ پہلی بات بنی اے وادھے نال۔ دھموڑی دا
وادھا۔

ترکاں مغلاں ویٹے شہراں گراواں وچ نکے موٹے مولوی غنیمت عام سن۔
رس پڑھاوندے سن تے باتشاہ دے ناں دا خطبہ پڑھدے سن۔ نکیاں نوں وظیفے
لبھتے۔ موٹیاں نوں جکیراں وی جڑ جانیان۔ لوکاں اوہناں دے وکھریوں کولوں
رکھنا وی پریرکنا وی۔ نال خدمت خاطر وی چنگی کرنی بنی پلو اتلیاں نال گل کرن
جوگا اوہناں دی سمجھن جوگا وسیلہ تے کول ہے۔ ایسہ تاں روز ای ہوندا ہونا اے
بنی مولوی ہو ریں آئے نیں۔ درس پڑھائیو نیں۔ شاگرداں نال فارسی بولیو نیں۔
کوئی اپنے ورگا آیا اے تے اوہدے نال فارسی شعر و ٹاندا را کیتو نیں۔ کسے ہمار
کوئی لوڑ دی گل آپنی بولی وچ آکھ وی دتی اے تے ولدا فارسی وچ ای آیا اے۔
پر اج ایس روز ورتتی وچ دھموڑی دا وادھا ہو گیا اے۔ دھموڑی نے مولوی
ہوراں کولوں فارسی چھڑائی اے تے بات بن کھلوتی اے۔

خبرے ایسہ لوکاں دی رکھج کھور ای اے جیسڑی دھموڑی بن کے مولوی
ہوراں دی تمتمی وچ جاوڑی اے۔ پر نہیں۔ رکھج کھور دیاں دھموڑیاں ایڈیاں
سیانیاں تے باریک نہیں ہوندیاں۔ ایسہ دھموڑی لوک سُرَت دی رکھائی جا پدی
اے۔

دوجی بات بنی گھائے نال۔ وچولے دا گھانا۔

ایسہ تاں روز ای ہوندا ہونا اے بنی لشکری فارسی کڑکدے چانگردے پنڈ
وچ آوڑے نیں۔ لوک ڈور بھور کھلوتے نیں۔ کوئی مولوی غنیمت جھٹ اگیرے
ہو کے لوکاں نوں دسدا اے بنی ایسہ باتشاہی لشکری نیں فلائی فلائی شے پے
منگدے جے تڑت حاضر کرو۔ پر اج اوہدروں سپاہی پتر آب آب کریندا گراں
وڑیا اے۔ ایہدروں لوکاں فارسی سمجھاوَن والا وچولا وچوں چک دتا اے۔ خبرے

اوہناں آپنے مولوی غنیمت دی تہمتی وچ دھموڑی واڑ دتی اے کہ کیہ۔ سپاہی
 دی گل دا ترجمہ ہو نہیں سکیا تے اوہ تریہایا ای مر گیا اے۔ لوک سُرَت روز
 ورتتی وچ وادھے گھائے کر کے اوہدی کھیڈ بنا دیندی اے۔ ایہو کھیڈ لوک کلا
 اے۔ لوک سرت ایس کھیڈ نوں جمدی وی اے تے ایہدی جائی وی اے۔ ایسے
 راہیں نِسردی مولدی اے۔ ایسے راہیں آپے آپ نوں سنباندی پر کھدی اے۔

مڈھ قدیم توں حاکماں حاکمی کرن واسے لوکاں کولوں نوں۔ کلیاں ہوون ضروری
 سمجھیا۔ حاکم لوکاں نوں دسدے آہن جو اسیں ہو رجون آں تیس ہو رجون۔
 تساں مٹی دے بنے ہوئے او اساں چن سورج دی اولاد آں۔ رب دے پر چھاویں
 آں۔ سانوں حق اے تہاڈی کمائی کھوہ کھڑیے۔ سگوں تہاڈا فرض اے بنی جو کجھ
 اگاؤ بناؤ اوہدے وچوں آپنے جیون جوگا تھوڑا باہلا رکھ کے رہندا ساڈے کول جمع
 کراؤ۔ ایسہ قدرت دا ورتارا ہے۔ لوکاں دی کمائی پہلوں تے دھگانے کھسرتی
 گئی۔ مگروں ایس دھگان نوں ڈھڈوں منوان واسے قدرت دا ورتارا آکھ کے لاگو
 کر دتا گیا۔ حاکماں آپنی رہتل ورتن باتا مہاندرا سبھ اُچھا لوکاں کولوں دکھرایا۔
 ایسہ دکھپ شان اے۔ ٹوہر۔ قدرت دی دین۔

جتنا عام مخلوق کولوں حاکم دکھرا ہویا۔ او تہی اوہدی شان ودھی۔ جدن لوکاں
 ایس دکھپ ایس شان نوں وڈیائی من لیا گن سمجھ لیا تاں اوہ ایہدے اگے نیون
 نوں ایہنوں پوجن نوں وی گن تے وڈیائی سمجھن لگ پئے۔ کھٹیا وٹیا تاں اگے ای
 شان والے نوں دے بیٹھے سن ہُن دین ایمان وی اوہدے ناویں لاون تے راضی
 تھی گئے۔ ہولی ہولی بھُل گئے جو ایسہ شان ساڈی تے حاکم دی رہت وچ ایسہ
 فرق ساڈی محنت صدقہ ای ہے۔ اوہ شان نوں حاکم دا جماندرو حسن منن لگ
 پئے۔ ایہنوں بندیائی دی ٹیسی سمجھن لگ پئے۔ اوہناں دلاں وچ ایس حسن دی
 تانگھ دھکائی تے ایہدے وچھوڑے دا دکھ پالیا حاکم نے شان دے ناں تے آپنا
 دھرو منوایا تے پوجایا۔

آپنی لوڑوں ودھ اَن وست اُپجاون لئی خلقت نوں کم تے لاونا وت خلقت
 دی ایس ہڈ پیہویوں وادھو کمائی نوں پورے ہے نال چاکھڑنا تے آپنے سکھال لئی
 ورتنا سانجھ ہونڈیاں نہیں ہو سکدا۔ جے شکاری دا شکار نال بھائی چارا ہووے تاں

اوہ شکار کیویں مارے۔ دھرو کماون والے نوں آپنے شکار نوں دلوں دور کرنا پوند
 اے۔ وار کرنوں پہلاں دل وچوں بندیائی والی نرمی تے ہرکھ کڈھنا پوند اے۔
 حاکماں مالکاں لئی ضروری اے جو اوہ کمیاں کامیاں نوں آپنے ورگا بندہ نہ سمجھن۔
 جتنی دوری ہو سی اوتنا کم کڈھن سکھالا ہو سی۔ ایسے دوری دا ناں شان اے۔ یاں
 آکھو شان پریو اے ایس دوری دا۔ کیونجو ایسے تنگم ننگی نہیں کھلو سکدی۔ کدیں
 اوکھے ویلے ایہوں بھرپی تے سانجھ دا بانا وی بناوٹا پے جاندا اے۔ پر شان ایہدا
 قدرتی پریو اے۔ ایسے پریو دوری نوں دوری ای بناوٹا کھاوندا اے۔ شان دے
 پریوے وچ جی دوری حاکم دا ہتھیار نہیں جا پدی دتیل دی لوڑ بن جاندی اے۔
 حاکم مالک کمی کالمے نوں آکھدا اے ویکھ میں کیڈا اچرج کیڈا نوکھا اچیرا تے چنگیرا
 ہاں کوئی جوڑ ہے میرے حُسن گن تے وڈیا ئی دا۔ مینوں پوج۔ پوجن دوری نوں
 مانن ہے۔ دوری مائیاں توں مینڈے نیڑے ہو سکنا ایں۔ مینڈیاں صفتاں دا لشکارا
 گھن سکنا ایں۔ تینڈی مینڈی نکھیرڈی ای ساڈی دونہاں دی ہوند اے۔ میں پوجن
 جوگ ہاں توں پوجن ہار ہیں۔ ایہو ساڈا قدرتی سانگا اے۔ ایہو رب دی رضا
 اے۔ قدرت دا ویہار اے۔

حاکم دا بہن کھلوون کھاون کھیڈن سبھ شان وکھالا اے۔ اوہدے کپڑے
 دھپ پالے دا سمیانہ نہیں اوہدے درجے دا نشان نہیں۔ اوہدی بولی بولی نہیں
 اوہدے لفظ لفظ نہیں ہو کا نہیں اوہدے رتبے دا۔ ایسے خلقت توں اوہدی دوری
 کچھ وکھاندے نہیں۔ ایہناں لفظاں وچ معنے کوئی نہیں۔ ایسے لفظ اوہ منتر نہیں
 جیہڑے حاکم نوں حاکمی تے دتیل نوں دبیلی دا پک کریندے نہیں۔ جیہناں راہیں
 حاکم آپنے پوجن جوگ ہوون نوں دتیل آپنے پوجن ہار ہوون نوں ماندا تے مندا
 ہے۔

ترکاں مغلاں توں پہلاں اتھاویاں حاکماں نوں لوک بولی توں وکھریاں رہن
 لئی اک درباری بولی گھڑاؤنی پئی سی۔ ترکاں مغلاں نوں ایسے کھپل نہ کرنی پئی اوہ
 جتھوں آئے سن اوتھے فارسی باتشاہی بولی آہی۔ اوہناں اتھے اوہا چلا دتی۔ فارسی
 چلی تے سینکڑے ورھے لوک بولی توں لوک رہل توں منکھرن دا منتر بنی رہی۔
 باتشاہی ورتارے نال رسیواں فارسی پڑھیاں بولیاں ای ظاہر ہوئا۔ سولشکریاں

لاکڑیاں لاگیاں رُتل لا کے فارسی نوں مونہ مارنا۔ فارسی لفظ پو جن جوگ ہو گئے۔
 فارسی لکھتاں سوہن کج دیاں کھاناں بن گئیاں۔ جس چاہو تا ایہناں کھاناں وچ ہتھ
 گھسٹاتے امیر تھی ویٹا۔ گھوڑے جوڑے محل ماڑیاں تاں منگیاں آہیاں فارسی
 نور سستا آہا۔ جیہنوں دیسی وسیب دی منی رڑکئی اوس جھٹ فارسی نور وچ نہا کے
 نوری تھی ویٹا۔ عالماں دی علمائی تے شاعراں دی شاعری لوک بولی توں دوری دے
 گز نال میچی جاوَن لگ پئی۔ جتنی کے عالم شاعر دی لکھت خلقت دی پُچوں پریرے
 ہوئی اوتنی اوہدی آدر ہوئی۔ جتنا کے لوک بولی نوں زندنا تجنا اوتنا ای اوس سنگھڑ
 ملوک تے سیاٹا اکھوانا۔ ایس پاروں خلقت وچ وی آپنے آپ نوں زندن ردن دا
 آپنے آپ نوں کوڑا کو جھاکھن دا رواج پیا۔ بندہ آپ آپنے اندر حاکم دا وچولا
 بن کے بہن لگ پیا۔ آپنے آپ نوں جتنی ہتھ رکھن لگ پیا۔ آپ آپنے اندر وئے
 وچ غیر ہو بیٹھا۔ آپنے ہوون توں آپ انکاری تھی گیا۔ اوہ ان ڈٹھیاں پردیاں
 نوں دلوں دیس منن لگ پیا تے دیس واسا اوہنوں میہنا ہو گیا۔ ایسہ آپ وچھوڑا
 آپ ویر تاں ای مک سکدا سی جے آپنے اصلے دا بی ای مار دتا جاوے۔ آپنے
 دوالیوں پچھو کڑوں سیریا ہر رنگ کٹ کے حاکم دی رہل دا رنگ چاڑھ رتا
 جاوے۔ ایسہ ہوتے جاندا سی پر ادھ چمکدھ۔ پورا نہیں سی ہوندا۔ کسے ویلے کوئی
 دھموڑی تھمتی وچ وڑ جانی تے بنی بناتی گل ویران ہو جُلانی۔

سو لوک وچھوڑے تے لوک ویر جدوں بندے دے اندر گھر کیتا تاں ایسہ
 آپ وچھوڑا تے آپ ویر بنیا۔ حاکماں وی بولی سکھ ورت کے لوک بولی نوں چھڑ
 کے بندے آپ وچھوڑا پالیا۔ آپنے پچھے تے دوالے نال سانجھ دا بی آپنے اندروں
 ماریا۔ آپنی بندیاں دی وت مُکائی۔ آپنے ست نوں مولن نہ دتا تے ایس آپ
 دھڑو دا سواد گھدا۔ ایسہ سواد وی عجیب بے سوادا ہا۔ ایہدے نال بندے
 اندروں سدا تریہایا رہنا۔ پر ایس تریسہ دانہ اسیہا ہائی بندے تریہایاں مرجانا پر
 پانی نوں آب آکھنوں نہ مُرنا۔

بندے دا آپا ہے کیسہ۔ رُکھ دا آپا مٹی پانی واء تے دُھپ دا سانگا اے۔
 ایسہ نہیں بنی اِکو واریں ایسہ سانگا جڑیا تے رُکھ بن گیا۔ پلو پل ایسہ سانگا نویں
 سریوں جڑدا اے تاں رُکھ دی ہستی رہندی اے۔ بندے دا آپا وی اوہدے

دوالے وسیندیاں دی سانبھی پڑ ورتی دا اک رنگ ہے۔ بندہ ناں ہے ان گنت
 بندھاں دے اک اُنتی وچ اُتھن دا۔ ایسہ اُنتی د۔ نہ راتیں پئی اُتھندی اے۔ ہر
 پل ہر ساہ۔ کوئی اک بندہ ایس اُنتی دا لیکھا نہیں کر سکا۔ کیونجو ایہدے اندر
 بھوئیں انبر دے جمن توں اگدوں دی آد جگاد توں ہن تائیں دی پوری وار پئی
 کھینڈ دی اے۔ تے آونیاں جگاں دے نقشے وی ایہدے وچ پئے اُتھندے نیں۔
 ایسے کر کے سیائیاں آکھیاں جیں آپنے آپ نوں جاتا اوس رب سجاتا۔ کوئی جان
 نہیں سکا پر جائن دا اپرالا ای جیون اے۔ اندر وسدیاں بندھاں نوں چت
 چیتے وچ جگاں تے آہراں وچ نبھاؤن ای جیون اے۔ نرا جائن نہیں مائیں۔ جان
 کوئی سکا اے کہ نہیں مان ہر کوئی سکا اے۔ ایہو مائیں پریت اے جگ دا مول
 اے۔

بندے اندر وسدے ان گنت سانگے بولی راہیں اوہدے اندر پجے نیں۔ بولی
 ایہناں سانگیاں دی جی جائی اے تے ایسہ سانگے بولی دے کھڑکھڑائے نیں۔
 بولی چھڑی لفظ بولی نہیں ہوندی۔ بولی دات اے ستر۔ تے ہر وکھالی ستر اے۔
 سو بولی دے پیار دا کوئی اوڑک نہیں۔ لفظ بولی ایس پاروں پردھان ہے جو اوہ
 سستراں نوں لطفیں اُتار کے سانبھدی اے، 'رُن جوگا کریندی اے۔ اوہناں نوں
 نت پسرویں سکت دیندی اے۔ لفظ کے اک مطلب نال بدھے نہیں رہندے۔
 بندیاں اندر وسدے بندھ لفظاں وچ رنت نوپاں سستراں پئے بھریندے نیں۔
 ایران دے کے گراں وچ آب آکھ کے بندہ پانی ای منگدا ہا۔ پر ہتے لشکر دا پنجابی
 سپاہی آپنے گراں وچ آب آکھ کے پانی نہیں پیا منگدا۔ اوہ آپنے میل وچوں نکل
 کے حاکم میل وچ وڑنا چاہوند اے۔ حاکم میل دا جیون جیون لئی خلقت وچوں مر
 نکلنا چاہوند اے۔

ترک مغل باتشاہی دیاں لاگیاں لئی منصب داراں اہلکاراں تے لشکریاں لئی
 سرداراں تے چودھریاں لئی باتشاہی بولی ٹوہر دا نشان آہی۔ خلقت توں کمی کیریاں
 توں نکھیرے دا وسیلہ آہی۔ خلقت وچ باتشاہی بولی دی منج ایس نکھیرے دی
 منج آہی۔ کائے میل دے لوک جدوں باتشاہی بولی دیاں لفظاں نوں آپناوندے
 سن تاں سمجھو اوہ باتشاہی ٹوہر نوں سلامی دیندے سن۔ بندیاں دے درجیوں لہن

نوں ست بسم اللہ آکھدے سن۔ آپنے ورگیاں توں آپنے آپ توں دوری قبولدے
 سن۔ جد لوک لفظ ورتوں وچوں کڈھجے تے باتشاہی لفظاں اوہناں دی تھاں ملی تاں
 لوکاں لئی آپنے اندر وسندیاں سبندھاں دا سبجائش تے ماٹن اوکھیرا تھی گیا۔ اوہناں
 دی اک دو جے نال آپنے آپ نال جڑت پوئی تھی گئی۔ اوہناں دی ہستی پیتی تے
 سوڑی ہو گئی۔ اوہناں نوں ڈرتے بے وساہی دے پرچھاویں مہربڑ گئے جیہناں نوں
 مکیلن لئی ہر دم لوبھ دی دھوئی دینی پوندی آہی۔ پر لوبھ ڈرتے بے وساہی نوں
 گھناوندانہیں سگوں ودھاؤندا اے۔ حاکماں مالکاں لوکائی نوں آپنی ٹوہرا گے
 نیونیاں ویکھ کے سکھ دا ساہ لینا تے مھنڈنا۔ ایسہ نہ سوچنا ہی جیہڑے اج ساڈے
 اگے نیوندے نہیں اوہ مھلکے کسے ہو راگے وی ایڈے ای سکھالے نیوں سکدے
 نہیں۔ جیہڑے آپنے اندر وسدے سبندھاں نوں سبجانوں رہ گئے، اک دو جے نال
 سانجھ مانٹوں رہ گئے، اوہناں کول پر تہن جوگا گلہ نہیں ہوندا۔ کوئی ساک سانگا
 اوہناں دے اندر اجیہا نہیں بولدا جیہنوں چھڈن اوکھا ہووے، جس توں سردارن
 سوکھیرا ہووے۔ پر سارے نیوندے وی نہیں۔ یاں آکھو سارے پورے نہیں
 نیوندے تے کیس نیوندے وی اصلوں نہیں نیوندے۔ سو جتھاں خلقت نے باتشاہی
 ٹوہرنوں پوجیا اتھاں خلقت وچوں ای باتشاہی ٹوہرا گے ویہرن دی ریت وی اٹھی۔
 جد لوکاں دے آپنے جے جائے پڑھ لکھ کے مولوی غنیمت تھی گئے یاں لشکراں وچ
 بھرتی ہو کے آب آب کرن لگ پئے تہ تمیتیاں وچ وڑن لئی دھموڑیاں دی
 سکھلائی ہوئی۔ تے پتراں نوں مارن لئی ماواں بولیاں گھڑیاں۔ رٹھاں پھٹکاں تے
 ٹوکاں چلیاں۔ باتاں تے اکھان بنے تے پیڑھیو پیڑھی رُے۔ لوک شاعری خلقت
 نوں سنبھالیا تے خلقت لوک شاعری نوں۔

فریدا خاک نہ زندیے خاکو جیڈ نہ کوہ

جیوندیاں پیراں تلے مویاں اُپر ہوہ

”خاک“ باتشاہی بولی وچ مٹی سی۔ باتشاہی سوچ وچ مٹی نہ ہوون دا نشان
 اے۔ مٹیوں نکھرن ای ہوون اے۔ جتنا کوئی مٹیوں اچیرا اے اوتنا ای اوہ ہے۔
 جتنی کسے دی رہت بہت اُچیری اے اوتنی ای اوس دی ہستی اے۔ اُچیرے ہوون
 واسے مالک حاکم چن سورج دی اولاد بندے سن۔ ہاتھی دی سواری کردے سن۔

تے اچیاں کوٹاں وچ رہندے سن۔ مٹی توں نکھیرا اصل وچ مٹی لڑیاں توں نکھیر مٹی
 جیہڑے مٹی وچوں ان اگاوندے وستان گھڑندے تے اُسا اُسرندے آہے۔
 جیہناں دی کیتی دے سرتے مالکیاں باتشاہیاں کھلونڈیاں آہیاں۔ فرید مٹی لڑیاں
 ولوں بولیا اے۔ یاں آکھو فرید وچ مٹی لڑے بولے نیں تے مٹی دی پچھان کراوندے
 نیں مٹی ای ہستی اے۔ ایہہ بیٹھ ہے تاں پیر کھلوتے نیں ایہدے وچوں ایہدے
 آسے تے جیا جوُن جمدی اے تے مڑ مر کے ایہدے ہٹھیاں ایہدے اندر آوندی
 اے۔ حاکم مالک لئی پیراں بیٹھ ہوون گھٹیا ہوون دا نشان اے۔ فرید ”پیراں بیٹھ“
 دے باتشاہی مطلب نوں اُٹاوند اے۔ مٹی جیون نوں سہار دی تے موت نوں بکدی
 اے تے موئے نوں مڑ جواندی اے۔ مٹی مرن جیون دا گھراے مٹی جیون دا گیر پئی
 گیر دی اے تے آپ وچ پئی گز دی اے۔ مٹی جیڈتے کوئی ہے ای نہیں۔ سو مٹیوں
 نکھرن مٹی نوں زندن شان نہیں گمان اے۔ باتشاہی بولی وچ خاک نہ ہوون سی۔
 جیہڑے ہستی والیاں بھانے انہوئے سن اوہ ”خاک“ سن۔ فرید نے لوک بولی دی مٹی
 وچ گڈ کے ”خاک“ دی انہوند نوں ہوند بنا دتا۔ خاک نوں لوک بولی وچ گڈ یوس خاکو
 آکھ کے۔ ”و“ یاں ”ے“ کے لفظ اگے جوڑے جاندے نیں اوہنوں جیوندی جاگدی
 ہستی بناون لئی تے اوس نال آپشت کرن لئی۔ فرید خاک نوں پندھ کرایا اے باتشاہی
 بولیوں لوک بولی تائیں تے ایس پندھ نے خاک نوں خاکو کر کے اوہدا آپا وٹا دتا اے۔
 ہُن ایہہ بے پرانی نہیں رہی جیوں پئی اے۔ بیٹھ وی رہندی اے تے اُپر وی ہو
 ہندی اے۔

لوک شاعراں لوک بولی دی راکھی کرن لئی باتشاہی بولی دے ہتھیار کھوہے تے
 اوہناں نال ای باتشاہی بولی دے ہلے نھلے۔

برہا برہا آکھئے برہا توں سلطان

رجت تن برہا نہ اُچکے سو تن جاں مسان

فرید ویلے دلی دے باتشاہ سلطان اکھواندے سن۔ دوہڑیوں باہر ”سلطان“ دی
 باتشاہی اے۔ رعیت لئی ایہہ ناں ای حکم اے۔ ایس ناں نال ویہار چلدا اے۔
 ایہہ ناں میستاں تے چونتریاں وچ وجدا اے۔ ہر دم خلقت دے سرتے سوار اے
 خلقت ایسے ناں توں دہلدی اے تے ایسے دی دہائی دیندی اے۔ دوہڑے دے اندر

فرید نے سلطان دی حاکی مکا دتی اے۔ سلطان داناں چھیک کے برہا داناں جیسا اے
 برہا نوں چتاریا اے۔ لفظ سلطان نوں تختوں لایا اے ”برہا“ دے جاپ نے برہا دی
 دہائی نے نالے ”توں“ نے۔ توں آکھن نال برہا جیوندی جاگدی حاضر ہستی تھی گیا
 اے۔ تے اوہنے ”سلطان“ دا رعب مار دتا اے۔ رہندا کم ”مسان“ نے کر دتا
 اے۔ اک پاسے برہا سلطان دی تھاویں بہہ گیا اے تے دوجے پاسے دوہڑے دے
 پر بندھ نے ”سلطان“ نوں نرڑ کے مسان سانواں کر دتا اے۔ نرڑ کے کاہنوں سلطان
 تے مسان دی جوڑی تے رنج پھی اے جیوں قدرت دی بتائی ہووے۔ (ایسہ ڈھو
 ڈھکا ون وچ لفظ جان وچولا بنیا اے)۔

برہا تا نگھ ہے۔ دوجے نال ملن دی آہنت کرن دی رسک۔ اوہو اندروں باہروں
 سبندھاں دی بھال، سبندھ ماٹن دی تا نگھ۔ سلطان زر زور دے سرتے جسدے نال
 چاہوے میل کر سکدا اے۔ پر ایسہ میل ملن نہیں ہوندا ملن ہوندا اے۔ تے ملن
 نال تا نگھ مک جاندی اے۔ ملن والا وی مک جاندا اے۔ اوہا تن مسان تھی ویندا
 اے۔ یاں آکھو تا نگھ مک کے لوبھ دی جون وٹا لندی اے تے لوبھ دا بھوت تن دی
 مسان وچ نت پیا بھوٹیاں کھاندا اے۔ فرید دی تا نگھ تاں جیوندی اے جے مل توں
 نہجے۔ پر سلطان دی سلطانی وچ رہ کے مل توں کیوں کوئی نہج سکدا اے۔ سلطانی تاں
 ہے ای مل ورتارا۔ سو فرید دی تا نگھ جیوندی اے جے سلطاناں دی سلطانی مکا کے
 آپ سلطان ہوونجے۔ مل ورتارے دی تھاں تا نگھ ورتارا ٹرے۔ ہر تن وچ برہانت
 جے نت نسرے۔ فرید دا برہا سد اوچھوڑا اے تے سدا میل دی۔

اک گوڑ موجب پہلی سطر رانج اے:

برہا برہا آکھیں برہا توں سلطان

برہا دے دو معنے نہیں (ہو روی ہوسن) اک رسا کھو ہوں پانی کڈھن والا تے
 دو جا کھال کھو ہوں پانی آڈاں کپاریاں ول کھڑن والا۔ دونہاں معنیاں پچھے خبرے
 ”بار“ یاں ”وار“ ای اے، پانی واسطے پراٹا لفظ جیہڑا ”ورھن“ وچ اے۔ جیہڑا
 ”سرور“ راہیں وگدا پانی ہو گیا تے ”واں“ بن کے کھوہاں وچ جاوڑیا تے او تھوں برہا
 راہیں نکل کے دوہڑے وچ آگیا۔ ہو سکدا اے اتھے بولی سیانے سانوں پھڑ بس۔ چلو
 ایس بولی سیانیاں نوں ایس لفظ دے مُدھ بہا کے ”برہا“ راہیں دوہڑے دے اندر بٹھلنے

رسا نرا کھو ہوں پائی ای نہیں کڈھدا اُج دے پورے گیڑ وچ رے دی لوڑ
اے۔ جھاڑ دی سانجھ وی تے پشواں دی سانجھ وی۔ فصل دی ونڈ وی حد بنے دی ونڈ
وی تے ماٹے دی کنکوت وی۔ سو برہا رسا ہووے یاں کھالا وسیب دے مڈھ دی رمز
اے۔

وسیب پائی لاون جوڑن پنھن توں ترڈا اے تے مہجن ونڈن تے مکدا اے۔
”برہا“ ویسی آہراں دے ایس گیڑ دی رمز بن کے ”سلطان“ نوں نکری اے۔ کیونجو
سلطانی وی آہراں دے ایس گیڑ سرای کھلوندی اے۔ فرید برہا نوں برہا آکھدا اے۔
(نرا آپ نہیں آکھدا ”کھیسے“ راہیں پوری سنگت نال رل کے آکھدا اے) برہا ای
پائی لاوندا اے تے برہا ای جوڑدا سانجھدا اے۔ برہا ای اُجھیندا اے تے برہا ای
ونڈیندا ورتیندا اے۔ برہاں باجھ وسیب دا گیڑ نہیں گڑ سکدا۔ پر برہاں دی کیتی
سلطانی دے نرے وچ آکے مل تھی ویندی اے برہاں دا الٹ اوہدی ویرن۔ سو
فرید دی سنگت دوہڑے وچ سلطان نوں تختوں تاجوں وانجھ کے وسیب دی مہار برہا ہتھ
دیندی اے۔ جیہدے ہتھ کار اوہدے ہتھ مہار۔

پر ایسہ کم تھیا وڈی اٹکل نال اے سبج سبھا نہیں تھی گیا۔

دوجی سطور وچ ”اُجے“ سبج سبھا ای آیا جا پدا اے۔ پر دوہڑے دا رمز پر بندھ
ایسے لفظ ہتھ اے۔ رمزوں دا گیڑ دوہرا اے۔ پہلے گیڑے سلطانی دا جوڑ مخلوق دے
اُج آہر نال جڑدا اے۔ سلطانی دی اصل نینہ ایسا اُج آہر ہے۔ پر ایس اُج آہر دی
آپنی نینہ کیہڑی اے۔ ایسہ نارا دو جے گیڑے وچ ہوندا اے۔ اُج آہر برہاں سر
اے۔ سگوں مڈھوں ہے ای برہا (برہا برہا آکھیسے)۔ برہا اُج دات اے۔ برہا اُج آہر
دی جم جات وی اے تے ماں وی۔

بندے داتن اوہدی وت اوہدی ہستی اُج گھال دی گھڑی اے سو برہاں گھڑی
اے۔ جو برہاں گھڑیا اے اوس گھڑنا وی برہاں دے حکم سر اے۔ برہاں ای اے
جیہڑا انھیاں اچیت کھوہاں وچ غرقے تے ست نوں مڑ فصلاں پشواں بندیاں وچ
اُجھیندا اے۔ جے ویسی آہراں دی مہار برہاں ہتھ نہ ہووے۔ مل ہتھ ہووے تاں
ویسی آہراں دا گیڑا پروں تے گڑدا ای جا پدا اے پر وچوں کھلو ویندا اے۔ جدوں

پیلیاں وچ ہوئی اہج برہوں نالوں تڑت کے بندے دی وت دا سنگھ گھٹیندی اے تاں
 بندے دے تن دی پہلی وی مسان بن ویندی اے۔
 لوک بولی دا سنبھالا بنھ آہا باتشاہی بولی اگے زرا باتشاہی بولی اگے نہیں۔ ایسہ بنھ
 آہا شان گمان دے اوس مارو ویہار اگے جیہڑا باتشاہی بولی راہیں لوکاں دے رچت
 ہر ماوندا ہا۔ خلقت دے تن وچوں برہا دابی مار کے مل دا ہا بڑا پچیندا ہا۔ خلقت دے
 تن نوں مسان بنیندا ہا۔
 نانک آکھیا۔

رجن سکداری تے خواری چاکر کیہا ڈرنا
 جاں سکدارے پوے زنجیری چاکر ہتھوں مرنا
 شق سلطان دی سلطنت دی اک ونڈ آہی، بندوبست لئی، اگر اہی لئی۔ شق دا
 حاکم شقدار اکھواندا سی۔ لوک بولی وچ ایسہ لفظ سکدار رہ گیا۔ لوک بولی باتشاہی
 لفظاں دی بھن گھڑناں وی اوہناں دا رعب گواوندی اے۔ (بار دے و سنیک
 مجسٹریٹ نوں پچھریٹ تے آنریری مجسٹریٹ نوں ہنیری پچھریٹ آکھدے رہے نیں)
 ا جیسی بھن گھڑ ہوندی نے سبج سبھا ای اے بھولے بھا۔ پر ایہدے اندر رتے دی
 دوری نوں دھنگانے اُلانگھن دی سدھروی لکی ہوندی اے۔ جسکے محل دا ہتھ مار کے
 رتے دا رعب و نجاون دی سدھر۔ پر شقدار سکدار ہو کے وی حاکم اے۔ اوہدا
 اگھل رعب اوہدی حاکی پاروں ہے۔ سوناٹک حاکی دے قلعے نوں سنھ لا کے اوہدیاں
 پکیاں نیہاں وکھال کے لوکائی دا ڈر لا ہوندا اے۔ سکداری تے چاکری دھرو داساک
 اے۔ جے چاکر سکدار دے دھرو نال اک سُر اے تاں اوہ سکدار دا ڈھٹوں
 تابعدار اے۔ جے نہیں تاں اوہدی تابعداری ایویں پڑدہ اے اوہدے ڈردا۔ نانک
 چاکر نوں اوہدے ڈر ساہویں کیتا اے۔ چاکری سکداری دے ساک اتوں ہج
 آہنیت تابعداری تے مہربانی دے سارے پڑدے لہ گئے نیں۔ تے اگوں جا پدا اے
 نانک دیاں بولاں وچ چاکر آپ بول پیا اے۔ آہندا اے میں کیوں ڈراں میرے کول
 کیہہ اے جیہڑا کھس جاتا اے۔ ڈھینا تے اٹھنے ای اے جیہڑا چڑھیا ہو یا اے۔
 چاکراں نوں تے روز زنجیراں پوندیاں سن۔ روز تے چاکراں سکداراں ہتھوں
 مرندے سن پر اتھے سکداراں نوں زنجیری پنی تے چاکراں ہتھوں اوہناں دا مرنا

ی اٹل قدرتی ویہار دسیا گیا اے۔

ایہناں بولاں وچ اکھاٹاں والا پک اے۔ جیویں کوئی جگاں پرانا لوک ہنڈایا چ
ہو وے۔ اکھاٹاں پک پاروں سکداری تے خواری دا جوڑ قدرتی تے لازمی ہو گیا اے۔
چاکری تے تابعداری دا جوڑ قدرتی تے لازمی نہیں رہیا۔

ڈرتے خواری نمائیاں دے بھاگ سن۔ نانک دی کلا نے ڈاڈھیاں دے لیکھیں
لکھ دتے نیں۔ چاکر سرسٹ چاکر نہیں رہے۔ ہمتاں تے سچیت جی بنے کھلوتے نیں۔
اوہ جان گئے نیں جو ساڈا کم سکداری نوں تھمنا نہیں۔ سکداری نوں ڈھاونا ہے۔
ویلے مہر لوک بولی خلقت دی سنبھال کیتی لوک شاعری خلقت نوں باہوڑی۔
خلقت لوک شاعری نوں سانبھیا۔ چیتیاں وچ پکا کے اگلیاں پیڑھیاں نوں اپڑایا۔
ترک سلطاناں تے مغل شہنشاہواں ویلے شہراں گراواں وچ تھاتھیاں تھاتھیاں
کھلے۔ مدرسیاں دی پڑھائی نے باتشاهی بولی دا آور لوکاں دیاں دلاں وچ بٹھاوون دا مٹل
لایا۔ لوکاں نوں دسیا ہی علم اوہ ہے جو باتشاهی بولی راہیں لبھدا اے۔ اوہو علم تھانوں
باتشاهی درجیاں مراتبیاں دی لڑی وچ پرو سکدا اے۔ جیہڑا علم تھانوں آپنے آہر
وچوں لبھدا اے اوہ ہولا اے۔ اوس علم دے مرتے تھانوں جو اگاوندے بناوندے او
اوہ اصلوں بے گنا تے ستا اے۔ ایسے لئی سرکار اوہنوں مفت اگرہ کھڑدی اے۔
باتشاهی بولی راہیں سکھیا علم باریک اے۔ ایسہ اگاوندے بناوندے والا کھروا کم نہیں
کریندا۔ ایسہ اگاوندے بناوندے پورھے توں چھٹکارا کریندا اے۔ اگاوندے بناوندے
والیاں اتے حکم چلاوون دا سچ دسد اے۔ ایسہ جادو اے۔ جیہڑا اگاوندے بناوندے والیاں
جناں نوں قابو کر کے سارے جگ دیاں نعمتاں اکھ جھمکدیاں حاضر کریندا اے۔
باتشاهی بولی نوں سکھن وچ جتنا مٹل لگنا او تہا ای سکھن والے دے دل وچ باتشاهی بولی
دا آور ودھٹا۔ جتنا صرف نحو دیاں پیچاں وچ کسے پینا او تہا ای اوہنوں سبھ سکھ
ورتی لوک بولی پھکی تے ان گھڑت جا پٹی۔ باتشاهی بولی دیاں کتاباں جادو نگری بن
جائیاں تے جادو نگری وچ لہندیاں ساراں ہماراں دی میں نوں باتشاهی شان گمان
دے پر لگ جانے۔ اوہناں دا اندر لا انھول ای باتشاهی ویہارا گے گھنٹے پے جاتا۔

فریدا جے توں عقل لطیف کالے لکھ نہ لکھ

آہنڑے گریوان میں سر نیواں کر ویکھ

عقل ترکھی تے باریک اوہناں دی گئی گئی جیہڑے باتشاهی بولی راہیں باتشاهی علم
تے ورتارے دی جادو نگری وچ وڑ کے عاموں خاص تھی گئے۔ خاصاں دی خاصگی
لکھت وچ ہے۔ لکھت راہیں عاموں سرور ہدی اے۔ لکھت ای علم اے۔ لکھت ای
حکم اے۔ لکھے حرف لیکھ نہیں۔ عاموں دی قسمت نہیں۔ درباروں لکھیا فرمان گھن کے
کوئی آن لہندا اے تے ہزاراں عاموں دی دینہ رات دی محنت وچوں ادھ چوتھ
ونڈا کے ٹر ویندا اے۔ لکھت دھروں لکھیا لیکھ اے جیہنوں کوئی ٹال نہیں سکدا۔
لکھن والے ایسے جادو دے سر تے باتشاهی نوکریاں اُتے کھلوتے ہوئے نہیں۔
مدرسیاں والے تے گدیاں والے چوراسیاں پنڈاں دی معافی پئے کھاندے نہیں۔
خلقت ایہناں کولوں لکھت لکھن دھکدی اے۔ ایہناں دا لکھیا مڑھ گل وچ
پاوندی اے دھروں لکھیا وی ایہناں دا ای اے سواہناں دا لکھیا ای دھروں لکھی
نوں ٹال وی سکدا اے۔ جادو نوں جادو ای کٹ سکدا اے۔ پر ایسہ اجیہا جادو سی
جیہڑا جادو گراں نوں وی لڑ گیا۔ عالماں حاکماں دی چترائی اوہناں نوں ایسہ نہیں
بجھن دیندی جو لو کائی کولوں اڈرے ہوون آپنے آپ کولوں اڈرے ہوون اے۔
حاکمی علمائی دے کالے لیکھ لکھن والے دے آپنے کالے لیکھ بن جاندا نہیں۔
اوہنوں آپنے آپ کنوں وچھوڑ دیندا نہیں۔ آپنے آپنیوں باہر کر دیندا نہیں۔

عالماں حاکماں دی سمجھ ترکھی باریک تے ملوک اکھواندی اے۔ باتشاهی بولی وچ
”عقل لطیف“۔ فرید نے عقل لطیف دے بھرم والیاں نوں عقل لطیف آکھ کے اک
جھٹی بکھیر کیتی اے تے ہاں بھانے اوہناں نوں آپنے بھرموں کڈھیا اے باتشاهی بولی
دی مایا لگی۔ شردا ہاسا بننا کے اوہدا جادو تروڑیا اے۔ تے جادو موہیاں نوں چھٹکارے
داراہ دکھایا اے۔ جے سچیں تہاں سوجھ والے اوہناں آپنے آپے وچ آؤ۔ آپنی کوڑ
اُساری میں دے اندر وار جھات گھتو۔ متاں تہانوں آپنا اصل آپا اوہناں جیہا ای
دے جیہناں نوں کالیاں لیکھاں راہیں زند نکھد کے دباوندے او۔ ایسہ گریوان اوہ
نوں ہکلی میں دا اے جیہڑی گھٹیاں چاواں نال سوا کے گل پائی اے۔ شان گمان دا نشان
ہن نموشی دا بوبا اے۔ جو کجھ ہو راں نوں بھلاون لئی سیریا سی ہن آپ آپنی پڑچول
کرن دا وسیدہ اے۔ جے کوئی کرے تاں۔

فرید باہروں کھلو کے وعظ نہیں کریندا۔ گواچیاں وچ گواچا ہو کے آپنے آپ نال

گل کریندا اے۔ فرید اوہناں وچوں اے جیہڑے باتشاہی بولی سکھ کے کالیاں لیکھاں دی لکھت دے جاؤ ہو کے لوک بولی ول پرتے۔ باتشاہی رہل دے جادو دی جھال جھل کے آپے آپے وچ آئے۔ ویریاں دے ہتھیار جاچ کے پڑیں زترے۔ غنیمت جے چاہوے ہاتاں غنیمت نہ تھیوے ہا فرید تھی ونبجے ہا۔

اک لفظ اوہ سن جیہناں نوں لوکاں آپ باتشاہی بولیوں کھوہ کے لوک ورتارے دی دیکیں گھت ردھا۔ اوہناں وچوں وکھاوے والی اُچھا نہ ماری۔ اوہناں نوں شان دے نشانوں مڑ لفظ بنایا۔ اک اوہ جیہڑے کالیاں لیکھاں راہیں، لشکریاں دی آب آب راہیں لوک بولی وچ اُترے۔ ایہ لفظ نہ آے، آہے شان دے نشان ای۔ پر ایہ ٹھاٹھے بنھ کے آپنا اصلا لکا کے لوک بولی وچ اُترے ایہناں ہسڈیاں و سڈیاں لوک لفظاں دی سنگھی نو نہ دے کے اوہناں نوں ادھ مویاں کیتا تے ورتوں وچوں باہر وگایا۔ لوک بولی دے لفظ چھڑم چھانٹ نہیں ہوندے۔ جڑ پروار والے اگے پچھے والے ہوندے نہیں۔ اوہناں دی ساکا چاری دے کیس ویاہر ہوندے نہیں۔ ایہ ویاہر لوک سُر ت وچوں جمدے نہیں۔ اگوں لوک سُر ت دی لوڑ دے لفظ جاون وی ایہناں وچ بے انت سکت ہندی اے۔ جیویں بندہ بے اوڑک بندھاں دی سنگھنی اُنتی ہے۔ تیویں ای لفظ نہیں۔ جیہڑے لفظ باتشاہی بولی وچوں ٹھاٹھے بنھ کے لوک بولی وچ آن اترے اوہ عربی فارسی ویاہراں دے بدھے سن۔ جتھے عربی فارسی لوک بولیاں سن او تھے تے اوہ لفظ ای سن۔ جیوندے و سڈے۔ پر اتھے اوہ باتشاہی شان دے نشان بن کے لوک بولی اُتے تھے۔ تے لفظ ہوون دا بھلا واپا کے لوک بولیاں لفظاں ویاہراں دے بھادی انبرویل بن گئے۔ ایہ لفظ لوک بولیاں ویاہراں نال جڑن نہیں سن آئے۔ کسے جیوندی ساکا چاری وچ و سن نہیں سن آسے۔ سو نوٹلے رہے۔ اُجڑت، الگ۔ پر جس لوک لفظ اتے ایہ آن ڈگے اوہ اسہ کھٹج گیا۔ جیہڑی ساکا چاری وچ اوہ ہسدا بولدا آہا اوہ وی ماندی تھی گئی۔ باتشاہی بولی دے ایس ہلے نال لوک لفظ ورتوں وچوں نکلن لگ پئے۔ لوک بولی اندر لی سنگھنی بندھ اُنتی رہجھدی گئی۔ بولی دیاں کیاں ویاہراں دی ورتوں کھلو گئی۔ اوہدی و سوں اُجڑن لگ پئی۔ لوک سُر ت ہتھل ہو گئی۔ لوکاں دے سنن بولن دی سوچن جاچن دی سکت ادھ موئی تھی گئی۔

”رکھن“ ہوندا اے ”دھرن“ وی تے ”سانھن وی“۔ رکھ، رکھا، رکھی،
 راکھویں، رکھوالا، رکھیل، رکھی۔ ایسہ لفظ ٹابری بولی دیاں ویہاراں جوڑی اے۔
 ایسہ ٹابری سداود ہنار اے کیونجو بولی دے ویہار آپ سداود ہنار ہن۔ سانھ لئی
 عربی لفظ حفاظت باتشاہی بولی وچ ورتیندا ہا۔ عربی وچ ایس لفظ دی بھری ٹابری اے
 جیہڑی عربی بولی ویہاراں اُساری اے۔ پر اتھے ایسہ چھڑا ای لتھا۔ نہ لوک سُرَت
 عربی ویہار آپنا سکدی سی نہ ”حفاظت“ آپنی پچھلی ٹابری نال جُڑ سکدا سی۔ ایہدی
 پچھلی ٹابری دے ہو ر لفظ وی لوک بولی وچ لتھے پر چھڑم چھڑے۔ اک دوجے توں
 اصلوں او بھڑ۔ حافظ، حفظ، محفوظ، محافظ۔ ایہناں دی اصلی جُڑت تے آہی عربی
 ویہاراں وچ، جیہڑے پچھے رہ گئے۔ اتھے ایہناں دا سانگا ایہو اے جو ایسہ باتشاہی
 بولی دے لشکری نیں۔ باتشاہی شان دی وردی پا کے باتشاہی رعب دے ہتھیار، نہ
 کے لوک وسوں وچ لتھے نیں تے لوک لفظاں دے صدیاں بدھی جُڑے سانگیاں نوں
 پئے مدھول دے نیں۔ لوک بولی دیاں ویہاراں دا ساہ پئے گھٹدے نیں۔ آپ ایسہ
 جیوندے روح نیں پر لوک بولی دیاں جیوندیاں جیہاں نوں آپنی وردی تے ہتھیاراں
 دے بھار تھلے دب کے پئے مرندے نیں۔ ایہناں دی آپو وچ زری دھرو دی سانجھ
 اے۔

بولی دے ویہار بہوں گٹڑے ہوندے نیں پر بہوں سوہل وی۔ جیویں رُکھ۔ جُڑ،
 پوری، پروار دا بندھ کیڈا گٹڑا اے۔ اُج دی کیڈی سکت اے ایہدے وچ۔ پر جُڑ
 ننگی کر دیوتاں پروار سک جاندا اے۔ پروار چھانگ دیوتاں جُڑ دست مک ویندا
 اے۔ لفظ دی ہستی اک بندھ دی ہستی ہندی اے۔ جد لفظ مکدا اے تاں بولی دے
 جُے وچ بھوندی رت اگے ڈکا لگ جاندا اے۔ لفظاں دی جمن جُڑن دی اک دوجے
 وچ رل کے شکل وٹاون دی سکت مرتج ویندی اے۔ باتشاہی بولی وچوں لتھے لشکری
 لفظاں دی ڈور درباری لاکڑیاں دے ہتھ ہندی اے یاں مولوی غنیمتاں دے ہتھ۔
 جد ایہناں لشکریاں دے بھار بیٹھ آکے لوک بولی دیاں ویہاراں نوں سوکا پے جاندا
 اے تاں لوک آتر ہو ویندے نیں۔ ہر نویں لوڑ لئی درباری لاکڑیاں تے عالماں ول
 مکدے نیں۔ ایسہ جھٹاک ہو ر لشکری ساج کے اتار دیندے نیں جیہڑا لوک بولی
 دے ویہار نوں ہو ر پندا اے۔

لوک سُرَت لفظ جماون دی سکت راہیں نَسردی پُنگردی اے۔ بندہ آپنے آپ
 نال تے جگ نال لفظاں راہیں ملدا اے۔ جے لفظ بناون دی سکت بندے کول نہ
 ہووے تاں اوہنوں آپنے آپ نال تے جگ نال ملن دی کھل نہیں ہوندی۔ جے
 اوہدی آپ رلٹی تے جگ رلٹی باتشاہی لشکریاں دی وچول راہیں ہوئی اے تاں سمجھو نہ
 اوہ آپ نوں رلیا نہ جگ نوں۔ اوہنوں اندر باہر ہر دم باتشاہ دارعب ای ٹکریا۔ اوہ
 باتشاہی مرضی دا پرچھاواں بن گیا۔ آپ اوہ ہو یا ای نہیں۔

انگریز راج آیا تاں انگریزی تے اردو فارسی دی تھاویں باتشاہی بولیاں تھی
 گئیاں۔ جس میل دا جتنا انگریز راج نال لاگ ودھیا او تنی اوسنوں انگریزی اردو
 سکھنی ورتنی پئی۔ مغل تے سکھ باتشاہی دا اساریا زمیندار میل وی انگریز راج نال
 رس وس گیا۔ کچھ مجھدے کچھ سچے۔ انگریز آپوں وی کچھ ڈھانیاں تھاپڑ کے ایس
 میل وچ چا کھلاریاں۔ سڑکاں ریلواں کھلن نال دساوری وپار و دھن نال وپاری
 میل نوں نویں جاگ لگی۔ نویاں نوکریاں نکلیاں نویں کسب کڑے نویں علم آئے۔
 باتشاہی بولیاں سکھن دی مجبوری وی ودھی تے سواد وی۔ انگریزی سکھن ورتن دا
 سواد تے اوہو ہا جیہڑا اگے فارسی وچ ہوندا ہا۔ لوکائی توں دوری داتے راج دی نیڑ
 دا۔ آتراں توں پلہ چھڈاؤن داتے وس والیاں دی حضوری مانن دا۔ فارسی ایران
 ترکستان دی خشبو نال مست کریندی آہی۔ انگریزی نال انگلینڈ تے یورپ دے پلے
 آون لگ پئے۔ اردو دا سواد تیرا ہا۔ اک تے ایہدے سکھن ورتن وچ او تنی گھال
 نہیں سی کرنی پوندی۔ تھوڑی کھل نال ای لوکائی توں دوری تے راج توں نیڑ دا
 جھوٹا آون لگ پوندا ہا۔ وت ایہہ انگریز دی آندی نویں باتشاہی بولی وی آہی تے
 مغل دی چھڈی پرانی باتشاہی بولی وی۔ دلی لکھنؤ دیاں درباراں دے پھمک
 اشرافاں ایہنوں آپنایا پالیا ہا۔ ایہدے وچ فارسی لفظاں وی آہی تے دلی لکھنؤ دی اُچ
 رہل وچ ورتیندا محاورا وی۔ سوار دو وچ نویں وڈیائی دارس وی آہا تے پرانی دا
 چس وی۔ دلی لکھنؤ دیاں اشرافاں دا انگریز نال لاگ پرانا تے پکیرا جا پدا ہا۔ نویں
 لاگی کیوں آپنی بولی نال پتھر ٹکے نویاں مالکاں لئی او بھڑ بنے رہندے۔ کیوں نہ جھب
 بولی وٹا کے پرانے منے پرونے لاگیاں ورگے ہو دسدے۔ ایتھوں دا نواں پڑھیا دلی
 لکھنؤ والیاں دا لڑوی پھڑدا ہا پر اوہناں کولوں سڑدا وی ہا۔ دلی لکھنؤ والے نویں لاگی

نوں آپنے جیہا کر کے راضی وی ہوندے پر اوہدے کوں کھور دے وی۔ ایسہ سوچ
کے تسلی وچ وی رہندے بنی نقل اصل جیسی تے نہیں نہ ہو سکدی۔ پر نال سوڑے
وی پوندے متاں نقل اصل دا اگھ نہ مار دیوے۔ سواوہ نویاں لاگیاں نوں ہلا شیریں
وی دیندے پر اوہناں نوں ہسدے وی۔

انگریز راج دے پھیکڑ لے پنجاہواں ورھیاں وچ لاگی میلاں سہی کیتا بنی
انگریز نرا ساڈا جہان ای نہیں شریک وی اے۔ جے ایسہ نکل ونجے تاں اساں
ایہدی تھاں لوکاں سر حاکم ہوساں۔ پر لوک وی ساودان پنے ہوندے ہن۔ ہُن
ایہناں سر حاکمی اوہا کرسی جو ایہناں دا اگوان بنے۔ اسیں نویں اشراف ہاں تے
پرائیاں اشرافاں دے وارث وی ہاں۔ لوک اگوانی ساڈا قدر ترقی حق اے۔ سو لوکائی
توں وکھریاں ہوون دا نواں راہ لوک اگوانی تھانیں نکلیا۔ اشرافاں دی بولی اگواناں
دی بولی بن گئی۔ پرائی حاکمی دے وگوچے وچ نویں حاکمی دی آس رل گئی۔ گواچی مغل
شان دا رونا آوندی نویں شان دے جھلکارے نال اک یک ہو گیا۔ غزل دیاں
رمزاں دا مطلب وٹن لگ پیا۔ ہاتھیاں اُتے جھولن دے سنے جلوساں وچ لوکاں دیاں
موڈھیاں اُتے چڑھ جھولن نال پورے ہوئے۔ درباراں وچ بہن دے نشے دی ٹوٹ
لوک جلیساں دیاں سٹھیاں اُتے بہہ مکی۔ لوکاں کنوں نوٹکے رہن دا بھس لوکاں دی
بھینر وچکار کھلو کے پورا ہوون لگ پیا۔ باتشاهی بولی دیاں تقریراں تے نعریاں دے
گڑ گج وچوں لوکاں دی چُپ کیتی منٹا دا سرور آون لگ پیا۔

باتشاهی بولی اگوانی دی بولی تھی گئی تے ایہنوں لکھن ورتن دا سواد تیریوں
چوہرا ہو گیا۔ ایس چوہرے سواد صدقہ ای اردو اخباراں دا زور ودھیا۔ چار جماتاں
پڑھے ہمارے وی پیسہ آنہ خرچ کے گھر نیٹھیاں حاکمی دی خشبو لین جو گے ہو گئے۔ ایسے
چوہرے سواد صدقہ ای اردو ادب دی مانگ ودھی ”ادب“ دا لفظ اردو لکھتاں دا ای
سرتاواں بن کے آیا۔ لوکاں وچ ایہدا مطلب وی وڈیاں اگے نیون آہا۔ وڈے
عمروں ہوون بھاویں درجیوں۔ نال ای جج تے گڑھت وی آہا۔ اردو شاعری کمائی
مضمون پہلوں تے جج گڑھت تے درجے سبک دا نشان بنے۔ پر ویہویں صدی
چڑھیاں لوک راج تے وسیب اُتھل دا جھنڈا وی ایہناں دے ہتھ آ گیا۔ اُپروں
لکھن والے تے پڑھن والے انگریز راج دا ویر پر چار دے۔ سرمائے داری جاگیردار

نوں بھنڈ دے۔ غریب دادکھ روندے۔ لوک نابری دانعرہ مار دے۔ پر اندروں اپیت
 سچیت باتشاهی بولی دے نویں پرانے سواداں وچ رٹدے۔ سو پنجاب وچ باتشاهی بولی
 دی لکھت 'ظاہر دعوا اوہدا بھاویں کجھ وی ہووے' اصلوں جی سی خلقت توں نوٹھے
 رہن دا۔ ایہہ وسیلہ سی پرانے اشرف آسن اُتے بیٹھیاں نویں لوک اگوانی دیاں
 راساں سالہن دا۔ ایہہ ہتھیار سی نویں لوک سُر ت نوں زروالاں بھوکیں والاں
 نوکراں کیساں دی نویں بھائی والی دے لاہے سر موڑن دا۔ باتشاهی بولی دی لکھت
 نے خلقت نوں تے جو پوہنا سی پوہیا۔ اصل تے اوہنے حاکی دیاں نویاں جڑا بھردیاں
 دعوے داراں نوں آپنے حق شفیعے داپک کرایا۔

جتھاں مل پردھان ہووے اُتھاں ہر نواں ہمیاجی درجے بندی تے آپا دھاپی
 دے کھڑی پلدا اے۔ سو ساری عمر تھن ٹٹ ای رہندا اے۔ اوہی تھڑی تھڑی
 ہستی ساری عمر آپنے ان ڈٹھے بچ کجی لئی درجے بندی تے آپا دھاپی دا اوہلا ای پئی
 لہدی اے۔ اوہ تاہیوں جیوندا اے جے خلقت کنوں رنت نوٹھلا تھیوے۔ رنت رنت
 خلقت کنوں آپنا آپ پچاوے۔ اوہ محل ڈھونڈھیندا جیوندا اے تے مقبرے
 ڈھونڈھیندا مردا اے۔ پنجاب وچ باتشاهی بولی دی لکھت محلاں تے مقبریاں دی ان
 تھک بھال اے۔

انگریز راج وچ نویں پرچار وسیلے نکلے۔ چھاپہ، سٹیج (کدیں تھیٹر دی کدیں جلے
 دی)، فلم، ریڈیو۔ درباری مشاعریاں وچ لکھن والی راج سٹیجاں تے چڑھ کوکی، ریڈیو
 فلم وچ وڑدھی۔ سونے دے پانی نال سنگھاریاں کتاباں وچ ججن والے کالے لیکھ
 چھاپے چڑھ کے خلقت دے سرتے سوار ہو گئے۔ نویں پرچار وسیلیاں دی موہ نے
 راج بولی سکھن تے ورتن دے سوادنوں نواں تڑکا لایا۔

انگریز گئے تاں اشرف جیہڑے لوک اگوان آہے لوک حاکم بن گئے جلیساں
 جلو ساں وچوں لوکاں دیاں موڈھیاں اُتے سواریاں ٹریاں تے گورنمنٹ ہاؤساں وچ
 جالتھیاں۔ باتشاهی لوک راج بن گئی تے باتشاهی بولیاں لوک راج دیاں بولیاں بن
 گئیاں۔ جدوں باتشاهی آزاد اسلامی حاکی دے پڑدے اوہلے ہو بیٹھی تاں باتشاهی
 بولی دے سارے سواد آزاد اسلامی ملک دی قومی زبان دے سرناویں پچھے لک گئے۔
 نوکریاں نکلیاں۔ کاروپار کھلے۔ گھراں زمیناں دی لٹ پئی۔ حاکماں دی رہتل دی خشبو

جیہڑی اگے نصیساں والیاں لئی ہوندى سی جٹی کھتی نوں آون لگی۔ ہر کوئی آپنا بچی پچھو کڑ دھون لئی حاکم رہتل دی وگدی گنگا وچ چھٹی مارن نوں اُتاو لا ہو پیا۔ بال پرانے ہنڈائے دبیل آپے دے بال نہ رہے۔ نویں آپنائے حاکم آپے دے بال تھئی گئے۔ اوہناں نوں راج بولی بلا کے اساں آپنے مندے دبیل پچھے نوں تڑت طلا قیاتے سکدا حاکم اگا ویاہیا۔ لوک بولی چھڑا کے اساں بالاں نوں عامان دی ترکی بھیر وچوں کڈھرتا تے راج محل دیاں پوڑیاں چڑھن والی نہاتی دھوتی لائن وچ لا دتا۔ نو۔ کلا اگا آپناون لئی نو۔ کلا پچھا آپناون پوندا اے۔ بولی وٹاون والیاں سولے بھا پچھا وٹالیا۔ چیتا وٹالیا۔ ہیشاں سلواراں پا کے مولوی غنیمت دھموڑیاں دی مارتوں باہرے ہو گئے۔ آب آب کردیاں سپاہی پتراں نوں پنڈاں والیاں کوکے کوکے کھول دتے۔

بولی اصلاوی اے تے پریوادی 'تت ست وی تے نشان وی۔ سو باتشاہی بولی باتشاہی ویہار دا ہتھیار وی اے تے اشتہار وی۔ ایسہ نمائیاں نوں رستا کر کے گنگ دامن بنا کے ڈاڈھیاں اگے رواندی وی اے۔ تے اُتوں اوہناں نوں پلوسدی وی اے۔ اوہناں نوں بھرم پاوندی اے بنی تیس جج تے گڑھت والے ہو گئے او۔ لوک بولی وی تاں ای لوک بولی اے جے اوہ حاکم میل دے ویہار دا پورا توڑ بنے؛ جے اوہ لوکائی نوں ات ست پر تاوے' جے اوہ لوکائی نوں آپو وچ جوڑے تے حاکم میل کنوں نکھیرے' حاکم میل دی ریت پر تیت تھیں اوہدے لاگ دے جادو تھیں خلقت نوں چھٹکارے۔ حاکم میل تے ہر حیلے آپنا لاہا پالنا ہوندا اے۔ آپنا ویہار رکھنا ہوندا اے۔ جے لوڑ پوے تاں اوہ لوک بولی دے ناں اوہلے وی باتشاہی بولی والے سوادمان سکدا اے۔ تاں لوک بولی دا ہووے تے ادھو سڈھ لفظالی باتشاہی بولی دی رہوے۔ یاں لفظالی لوک بولی دی ہووے تے پرچار حاکم میل دی ریت پر تیت دا۔ نعرہ لوک بولی دا ہووے تے لاگ حاکم میل دا۔ لوک بولی دی ایسی ورتوں لوک تت کولوں نکھڑ کے رزا نشان بن جاندی اے حاکماں دی خلقت نوں بھلاوے پاون دی نیت دا۔ ایسہ لوک بولی دی ورتوں رہندی ای نہیں۔ جیویں باتشاہی بولی وچ لوک تت پرچار یا ونجے تاں اوہ لوک تت رہندا ای نہیں۔

مغلاں ویلے حاکم دریاں مغل پا کے ای حاکم اکھواندے سن۔ انگریزاں ویلے آکڑے کالر تے ہیٹ سوٹ حاکمی دا پریو ا بنے۔ جدوں لوک اگوانی کرن لئی مغل

اشرافاں دا وارث بن وکھانا پیا تاں بیٹاں سٹوٹاں دی تھیں شیروانیاں تے قراقلیاں سج
 گئیاں (انج شیروانی انگریزی ٹیل کوٹ نوں وی اکھ مار لیندی آہی۔) اج حاکم میل
 نئی ضروری اے جو آپ نوں اصلوں لوکاں وچوں دے۔ لوک رہتل دا جم پل
 بن وکھاوے۔ سو شیروانیاں لہ گئیاں تے عوامی سٹوٹ پے گئے۔ (مستحق بھگتے نوں
 حاکمی کروان لئی "سٹوٹ" تے آکھنا ای پیا)۔ وت عوامی سٹوٹ اُتے شرافت دی فتوہی
 چڑھی۔ حاکم دا پیریوا پیریوا نہیں ہوندا اوہدی نیت دا کج ہوندا اے۔ (یاں اوہدی
 نیت دا ننگ آکھ لو۔ کج کج ای ہوندا اے) جے حاکم لنگھیاں دی حاکمی کرن لئی ننگا
 وی ہو کھلووے تاں اوہدا ظاہر ننگ اوہدے اصل ننگ دا کج ہو سی۔ حاکم میل دا
 پیریوا کوئی وی ہووے اوہدا وکھرپ تے اوہدے حاکم میل ہوون وچ خلقت دی کمائی
 آپنے پیٹے پاون وچ ہے۔ اگے ایس وکھرپ اُتے وکھرپ دا ای سنگھار ہوندا ہا۔
 کیونجے اگے حاکمی حق آہار ب دیاں او تاراں دا۔ ہُن خلقت حاکمی اُتے اپنا حق جتایا
 اے تے ہُن وکھرپ نوں سانجھ دے اُچھاڑناں کجنا پوندا اے۔

دکھ تے اکھ

پچھے جسے "ماں بولی" وچ اک کتاب دا اشتہار آیا۔ "دکھ مَن رکھویں" لکھائی چھپائی، "ہیا۔ مِل دُوڈھ سو۔"

سوچیا۔ پنجابی کتاباں تے خلقت دے پڑھن سُنن جوگیاں ہوندیاں نیں۔ "ماں بولی" والیاں ایس کتاب وچ ضرور کوئی تھوڑا ڈنھی ہوئی اے جیڑا ایہنوں دُوڈھ سو والیاں اگے ڈاہون دی کیتیو نیں۔ مڑ سوچیا، نہیں ماں بولی والیاں ہشیاری کیتی اے۔ دُوڈھ سو والے کوئی کتاباں پڑھدے پھر دے نیں اوہناں تے دکھ ویکھنی اے تے دُوڈھ سو جھاڑ دینے نیں۔ سگوں اوہناں کول دکھ ویکھن دی وی کیہڑی ویل اے اوہناں تے جد سُنیا بنی کوئی پنجابی کتاب وی دُوڈھ سو جوگی ہو گئی اے تے اوہناں دا زرا مَن ای نہیں رکھیا جانا رالاں وی وگن لگ پینیاں نیں۔

"ماں بولی" والے اپنے ولوں ہشیار تے بنے نیں پر ہین بھولے دے بھولے ای۔ بیبا پہلوں "ماں بولی نوں کوئی دُوڈھ سو والا چاء کے کھولسی تاں ای اندروں تہاڈا اشتہار وی پڑھسی۔ جے دُوڈھ سو والیاں نوں کتاباں و پینیاں جے تاں "ماں بولی" دا مِل وی دُوڈھ سو ای رکھو۔ اُٹھاں والیاں نال یرانے لاوئے ہوون تاں بوہے اُچے کراوئے پوندے نیں۔ تے اجکل دے دُوڈھ سو والے تاں ہوئے ٹرکاں جہازاں والے اوہ تاں بوہے اوہ منگدے نیں جیڑے اپنے آپ سواری دے میچے دے ہو وئجن۔

سو مَن دُوڈھ سو والیاں دا وارا اے (ہو سکدا اے ایسہ لیکھ تہاڈے تائیں اُپڑے تے دُوڈھ سو دُوڈھ ہزار ہو چکیا ہووے) مَن ایس ایہو ای آکھ سکے آں بنی کوئی ویلا ہا جد پنجابی کتاباں خلقت دے پڑھن سُنن جوگیاں آہیاں۔ کوئی پنجاب ورھے پہلوں دی گل اے ہر نکلے وڈے شہر وچ پنجابی کتاباں پھپھدیاں آہیاں۔ لہور شہر وچ کشمیری بزار کتاباں دا گڑھ ہا۔ راک پاسے سٹیشن دوجے پاسے لاری اڈا۔ تھیں تھیں توں پیاری آونے۔ اوہناں سینکڑیاں دے حساب کتاباں بنھ

کھڑیاں۔ کتاباں اوہ جیہڑیاں میسیں محمد صاحب دسیاں میں۔

شاعر بہت پنجاب زمیں دے ہوئے دانش والے
کافی بار اں مانہ جیہناں دے دوہڑے بیت اجالے
بکناں جوڑ کتاباں لکھیاں قصے ہور رسالے
کیسہ دھر گئے اوہ سنگ محمد کر کر ویکھ سنبھالے

ایسہ سودا پیسے نکلے وکنا۔ ایسہ نہیں بنی پیسے نکلے خلقت کول ولدھو آہ۔
بس شوق والیاں جوڑ جاڑ کے کتاباں لے لینیاں آپ پڑھیاں تے سنگیاں۔ یلیاں
نوں واچ سناونیاں۔ کتاباں دی دکھ ساد مرادی ہوئی نہ جلد نہ اُچھاڑ۔ کاغذ اخباری
تے لکھائی چھپائی گزارے جوگی۔ چھپواون والے آپ ای و پچن والے ہوئے
کتاباں سولیاں ہونیاں تے گا کی چوکی۔ چھپواون والیاں پیسے نکلے ویتج کے خرچہ
وی کڈھنا۔ پرچون والیاں دی پتی وی دینی تے آپنا منافع وی رکھنا۔ ایسہ چھپواک
خلقت دی گا کی نال ای جڑے ہوئے آہے جد پنجاہ ورھے پہلوں خلقت دی
گا کی ٹن لگ پئی تے ایسہ وی ٹٹ کے کیسہ دھرے ہور جا جڑے۔

خلقت دی گا کی جڑی کیوں تے ٹٹی کیوں۔ ایس گل دا باریک ویردا وار
(تاریخ) دی باریک پُن پڑچول منگدا اے۔ کرن والے کر سن جد کر سن پر اکدو
موٹیاں گلاں نال رل بہن جو گا دھوں تے اسیں وی دھکھای سکے آں۔

کیسہ دھر گئے اوہ سنگ محمد کر کر ویکھ
سنبھالے

میسیں ہوراں لکھن والیاں دا سنبھالا کیتا۔ سانوں پڑھن سنن والیاں دا
سنبھالا کرنا پے گیا اے۔ پر پڑھن سنن والے لکھن والیاں نال تانے پٹے وانگ
ہوندے نیں۔ سو آؤ گل او تھوں ای ٹوریے جتھوں میسیں ہوراں ٹوری آہی۔

اول شیخ فرید شکر گنج عارف اہل ولایت

فرید اول اے۔ اوہ ساڈی اجوکی لوک ریت دا موڈھی اے۔ تے کیتا فرید
کیسہ لکھت سولی کر چھڈی۔ ایڈی سولی جے لوکاں دے اصولوں نیزے تھی گئی
اوہناں دے اندر لہ کے اوہناں دے مونسوں بول پئی۔ اوس ویلے اوہ وی سن
جیہناں دی لکھت ات منگی آہی۔ خلقت دی پچوں باہری۔ ایسہ منگی لکھت شاہی

حضوری وچ جی، سنہریاں سیاہیاں نال لکھی، مہملاں کم خواباں وچ و لھیٹی گئی۔
 صندل دیاں ریللاں اُتے لکھی تے لعل جواہریں تلی۔ ایس خلقت نوں دوروں
 چکارے مار کے آپنی دکھ راہیں موہن وارٹل پیا لایا تے جیہڑے جی خلقت وچوں
 چار اکھر پڑھے ہوئے آہے اوہناں دیاں اکھاں اگے شاہی نوکری دا جلوہ جگایا۔

پہلی ایسہ لکھت خلقت دی کمائی تے ای آہی۔ خلقت دی کمائی، واہکاں
 راہکاں کیاں دی محنت ماملے مسول راہیں شاہی خزانے چڑھنی۔ ایس کمائی نال جیتے
 شاہی لشکر پلنے منصبدار تے اہلکار پلنے۔ اوتھے لکھتاں لکھن والے شعر جوڑن
 والے وی پلنے۔ کم بات شاہی ایہناں کولوں دو یندی آہی۔ اک تے ایہناں دربار
 سجاونا بات شاہ دامن پر چاونا۔ رنکدیاں عطر رلیڑیاں لفظاں نال بات شاہی انہیر نوں
 چانن، بات شاہی کوجھ نوں سوہن بنا کے دنا۔ بات شاہ نوں وکھالنا بیڑیاں تلواراں
 اسواراں والیاں فوجاں ای تیرے کول نہیں لفظاں دے لشکر، علم ہنر دے ہتھیار
 وی تیرے اشارے تے تیار کھلوتے نیں۔ دو جا کم ایہناں لکھیاراں دا ہا خلقت
 نوں وکھالنا بیڑیاں شاہی دربار ای علم ہنر دا گھر جے۔ علم ہنر بات شاہ دی چاکری وچ ای
 پہلے نیں۔ بات شاہی نوں سلاہون ای علم ہنر دی رسکھراے۔ سو آؤ آپنے پڑھے
 لکھے دا مل پواؤ۔ آپ لشکو تے بات شاہی دی رشک وی ودھاؤ۔ پاء پڑھیاں دے من
 وچ کنڈی پے جانی۔ بی حیلے ویلے اپر اپڑیئے ساڈی لکھت نوں وی بھاگ لگن ایسہ
 آپ وی دکھ کندھے تے ساڈا وی مونہہ دھوائے۔

باوا فرید ہو ریں پاء پڑھے نہ آہے۔ آپنے ویلے دیاں علماں ہنراں دی گھٹی
 سار آہی نیں۔ چاہوندے تے سرکارے دربارے چڑھ بہندے شاہی شیخ
 سدیندے۔ پر اوہناں بیٹیاں نمائیاں نال لڑ جوڑیا۔ خلقت وچ بہہ کے خلقت دے
 آپنے گھرے ورتے بول جوڑ سار کے شاعری بنائی۔ سمجھو خلقت نوں دسیو نیں بی
 آپنی کمائی آپ کیوں ورتیدی اے۔ خلقت واسے آپنی بولی ماٹن دا، آپنی بولی
 راہیں آپنے وسیب نوں سمجھن دا ڈھو بنایا۔ آپنی سکت دا مونہہ وکھایا، آپنی ہستی
 دی سنبھال کرائی۔ تے جد خلقت آپنے وسیب دی ستر آپنی اکھیں ویکھ لوے نالے
 آپنی سکت نوں آپ سنبھان جاوے تاں اوہ ڈاہڈیاں نوں پچھان وی سکدی اے
 اوہناں اگے ویرو وی سکدی اے۔ ڈاہڈیاں دی ڈاہڈ نوں ٹھل وی سکدی اے۔

ڈاڈو - ترے ویہار نوں اُتھلن تے وی تل سکدی اے۔

باوے فرید اپنی لکھت ایڈی سولی کیتی بی اوہنوں مائن لئی خلقت نوں خرچ خرچنا ای نہ پوے۔ ایہہ لکھت لوکاں چتیں سنبھالی تے پیڑھیو پیڑھی ورتائی۔ اینویں نہیں سوا دو سو ورھے مگروں بابے نانک اینوں اپنی کر کے سنبھالیا تے خلقت وچ برہ کے مڑنویاں کیتا تے اوے سولے بھامڑ جنی کھنی نوں ورتایا۔ فرید دی ریت نامک نویں کیتی، دمو در تے مادھو لال حسین نویں کیتی، باہو، بھلے شاہ تے وارث شاہ کول اپڑی۔ قادر یار چل سرمست تے خواجہ غلام فرید تائیں اپڑی تے اُتوں انگریزی ٹھانے وی اپڑ پئے۔ تے اوڑک مس محمد صاحب نوں ریت دا سنبھالا کرنا پے گیا۔ جیویں کوئی بھاجڑ بھنڈیا اپنا رہیا کھیا دست و لیوا رگن گن ویکھدا اے۔

فرید ریت والے لوکائی دے اندر رہے۔ لوکائی نال اک ہو کے رہے۔ رہن نوں تے مگر چھ وی پانی وچ ای رہندے نیں۔ خلقت وچ خلقت نال اک ہو کے رہن ایہہ ہوندا اے جو خلقت دی پیڑ اپنے اندروں بولے۔ اپنی سوچ اپنے ایل لوک کچھ نال اکسڑ کیتے ونبجن۔ فرید ریت والیاں اپنا لکھیا بول کے گا کے لوک نوں سناوئا۔ گل خلقت نال سا بچھی کرنی۔ خلقت اوہناں دیاں بولاں وچ اپنی ورتی سبجانی پر کھنی تے ایناں بولاں نوں اپنی گھڑت اپنی سر جنا سمجھنا، اپنی ہر ویلے ورتن ورتاون والی گھڑت۔ قوالاں راگیاں ڈھاڈیاں اپنی کلا راہیں لکھیاں دے بول نویں کرنے۔ بولاں وچ اتر کے اوہناں نوں سنگیت جو نے جوالنا تے میلیاں سکیاں داریاں وچ پڑ بنھ کے خلقت نوں ورتاوئا۔ آپنیاں شاگرداں نوں پیڑھیو پیڑھی ایہہ سنگیت بدھے بول سکھاوئے۔ وت والیاں اگوں ایس سنگیت وچ نویاں کاڈھاں کڈھیاں۔ شاعراں آپ سنگیت کاراں نال رلنا، سنگیت بناون وچ وی تے ورتاون وچ وی۔ کیاں ہالیاں چھیڑواں گھر ہستاں آہرے لگیاں وی ایہہ سنگیت ورتاتے ویلے وی۔ بولاں دیاں رمزاں وی گولٹیاں پرکھ پرچول وی کرنی۔ بولاں اُتے بول وی بناوئے۔ نویاں واپریاں سر نویں معنے وی اُسارنے۔ تدوں لوک بولی وی لکھت مڈھ مدرسیوں پڑھیاں دے سامنے آویندی آہی۔ فارسی سکھائی دیاں مڈھیلیاں کتاباں لوک بولی وچ ہوندیاں سن۔ جیہڑے مولوی منشی

کاتب بن کے مدرسیاں وچ لکھاون پڑھاون بہندے سن اوہناں نوں لوک بولی دی
لکھت دا آسرا لینا پوندا ہا۔

جدوں کاغذ دی ورتوں ودھی تاں لکھتاں دے اُتارے وی عام تھئے۔ شوق
والیاں من پسند شیواں کتاباں کولوں لکھوا رکھنیاں اگوں ہور ناں آپ ساد
مُرادے اُتارے کر لینے۔ اُتاریاں نوں لوکاں سنگتاں وچ بہہ واچنا۔ کئیں شوق
والے پڑھ کے پکا لیندے آہے۔ تے اگوں پڑ جوڑ پئے سُناؤندے آہے ہیک نال
یاں چھڑا بول کے۔ بول کے سناون والیاں دی ریت وکھری ٹرمی۔ بلیاراں سیتراں
ہیستریاں نال واراں قہے کافیاں ڈھولے کھید وکھاوٹے۔ معنیاں بارے گل وی
ٹورنی۔ لفظاں رمزاں دا ویرا وی کرنا۔

سو چھاپہ آون توں پہلوں لکھت دی لوک ریت نے سینکڑیاں ورھیاں دی
گھال پاروں لوکائی وچ آپنا گھر بنا لیا ہا۔ یاں انج آکھوئی خلقت نے حاکم ویاہار نال
سینکڑیاں ورھیاں دے نکراء راہیں لکھت دی لوک ریت اُساری تے لوک ریت
دے پیار پرچار پاروں جنی کھٹی لکھیا رتے سیر تھئی۔ شہراں گراواں وچ لوکائی کول
ونوون ہتھ لکھیاں تے مونہ زبانی پکائیاں دا اک وڈا رنت ودھنار بھنڈار آہا۔
لکھت دی بولی دا سبھا لوک ریت دے پیار پاروں پورے دیس وچ گھٹ ودھ
اُکسار تھی گیا ہا۔ لہندا رنگ ای پر دھان ہا۔

چھاپہ آیا تے کتاباں دیاں وپاریاں نوں اک وڈی گامکی لوک بولی وچ وی
حاضر دی۔ وپاریاں وچوں کئیں آپیں لوک ریت دے وگری آہے کشمیری بزار
لہور دے ملک فضل دین وانگ۔ سو لوک بولی دیاں لکھتاں چھاپے چڑھ کے وکن
لگ ۴۰۰۰۔ چھپوا کاں سردا آہر کر کے پرانیاں لکھتاں دی بھال کیتی۔ حاضر لکھن
والیاں نال ٹھیکے کیتے۔ انھویں صدی مکدیاں چنگیاں ماڑیاں کتاباں چوکھی گنتی وچ
چھپ کے لوکاں کول اُپڑ گیاں۔

پر انگریز پنجابے چھاپہ لاون نہیں سی آیا۔ اوہ تے آیا سی اتھے آپنا راج
ٹھوک کے پچھے اپنے دیس دیاں رماں لئی سستا کچا مال ڈھونڈ تے اپنے گھرے مال
لئی نویں گامکی بناون۔ ایس دوہرے کم لئی لوڑ سی خلقت نوں قابو کرن دی تے
آپنی مرضی سر کم تے لاون دی۔ سو دا بے تے لالچ دا پیار پیار یا گیا اک تگڑے

سنگھنے تے باریک راج پر بندھ راہیں۔ ایسہ پر بندھ خلقت نوں ورتایا وچولے
میل نے۔ وچولے کچھ پرانیاں حاکماں دی رہند آہے کچھ نویں اٹھے، کچھ ایتھاویں
کچھ ہندوستانوں انگریز نال آئے۔ وچولے آپوں وی دا بے تے لالچ دے مارے
ہوئے سن تے خلقت لئی دا بے تے لالچ دا نشان وی سن۔

وچولے میل وچ زمیندار ساہوکار وپاری نکلے وڈے سرکاری نوکریاں
کسباں والے جیویں وکیل ڈاکٹر سارے ای آہے۔ وچولیاں دی رہل اوہناں دا
ورتارا خلقت نوں ڈراوندا وی ہاتے رہیجاوندا وی۔ خلقت وچوں جے کسے دے
دل وچ سکھالیاں ہوون دا خیال آوندا ہاتے وچولے میل دی رہل دا لشکارا بن
کے آوندا ہا۔ بولی رہل دا موہر لا انگ ہوندا اے۔ اوہدی پہچان وی ہوندا
اے تے اوہدے اندر لے تے دا وسیلہ وی۔ لباس وی ہوندا اے تے وجود
وی۔ انگریز پر بندھ دی بولی ایس پر بندھ نوں پالنے والی نویں پڑھائی دی بولی
انگریزی آہی یاں اردو۔ ایہناں بولیاں نوں آپناون ای وچولے میل دا ہوون
سی۔ وچولے میل وچوں جد کچھ ڈھانیاں انگریز نال کھیسہ دیس لئی ازادی رکھنن دا
سوچیا تے اصلوں اوہناں انگریز حاکمی دی تھاں آپنے میل دی حاکمی بناون دا ای
سوچیا، لوکائی دے سرتے چڑھ کے آپ راج کماون دا۔ انگریز رہل دی ٹکرتے
اوہناں جیڑی دیسی رہل دا جھنڈا چایا اوہ پرانیاں حاکماں دی رہل آہی۔ مغل
راجپوت موریہ باتشاہی دی رہل۔ انگریزی دی تھاں اوہناں فارسی بھری اردو یا
سنسکرت بھری ہندی آپناون دی کیتی۔ سو وچولے میل دی آگوائی بیٹھ جیڑیاں
لہراں ازادی دیاں چڑھیاں اوہ ایہناں بولی روپاں راہیں چڑھیاں۔ خلقت وچوں
جیڑا وچولے میل دی آگوائی بیٹھ ازادی دی لڑائی لڑن ٹریا اوس وچولے میل
دے رہل مہاڑ قبولے اوہناں والے بولی انگ اپنائے۔ آپنے اندر خلقت والی
ہستی نوں اُنڈیاں کر کے اوہدے اُتے وچولے میل والی ہستی سوار کر لئی۔

نویں پڑھائی نویں سائنس تے مشینی اٹکل دا، بندے تے جگ بارے نویں
سُرت دا بوہا وی آہی۔ ایسہ بوہا وی سرکاری بولیاں ای لنگھاوندیاں سن۔ لوک
بولی ایس پڑوں باہر رکھ کے بچی کر دتی گئی آہی سو نویں سُرت نویں علم لئی خلقت
کنوں دوری ضروری تھی گئی۔ اپنی بندیاں کنوں وجوگ ضروری تھی گیا۔ نویں

طاقت تے نویں سکھال لئی نویاں نوکریاں تے نویاں آہراں وچ جُشن لئی آئی ہستی
 نوں نویاں گزاں نال مہکن لئی نویاں سرکاری بولیاں نال سانگا جوڑن تے لوک بولی
 نال اپنا دھردا سانگا مار مکاون ضروری تھی گیا۔ وچولا میل لوک بولی دی کھور دی
 گڑھتی چٹ کے اٹھیا۔ انھیویں صدی مکدیاں ایس میل دیاں کئیں پیڑھیاں پل
 کے سرکار وپار کسب پڑھائی سیاست تے رہتل دے پڑ تل نیٹھیاں سن۔ اُردو
 انگریزی کتاباں دی مانگ ایہناں ولوں دنو دن پئی ودھدی آہی۔ اُردو انگریزی
 لکھت تے پچھت دا چنگا موکلا موگھا کھل چکیا ہا۔ جس لہور وچ میاں محمد صاحب
 ”سیف ملوک“ دی چھپوائی واسے آکے بیٹھے آہے اوس لہور وچ انجمن پنجاب دے
 اُردو مشاعریاں دا وی وجہا ہاتے موہر لے پوچ دے اُردو شاعراں دیاں غزلاں
 ایتھوں ڈاک راہیں دلی دیاں استادان کول وی اپڑن لگ پئیاں آہیاں۔ سو
 جیہڑے ویلے پنجابی کتاباں دی چھپوائی دی لہر ابھری اوسے ویلے اُردو انگریزی
 پڑھاکاں دیاں لوڑاں دا روڑھ چھپواکاں نوں پیروں کڈھن لگ پیا۔ اوہناں نوں
 اُردو انگریزی کتاباں دی ودھنار مہنگی تے سوکھی گا کی جُزن لگ پئی۔ کتاب
 جوڑاں تے سودھ کاراں دیاں نویاں تیار تے ترکھیاں ڈھانیاں مل گئیاں۔ سکولاں
 کالجاں دے خلاصہ کار آپ بوہے آن بیٹھے۔ چھپواکاں تھوڑا پر منگا چھاپ کے
 چوکھی کمائی دا راہ وی دیکھ لیا۔ سو لوک بولی نال اوہناں دا ہج وی گھٹن لگ پیا۔
 لوک بولی دی چھپوائی ہولی ہوندی گئی۔ چھپواکاں دا موہر لا پوچ جس لوک بولی دا کم
 وڈیا ہاوت وی کجھ نہ کجھ اپنا کیتا پالی آیا۔ اگلا پوچ نویاں سکولاں دا پاس (یاں
 فیل) بولی وانجھے وچولے میل دا پالیا ہا۔ اوہنوں ماں بولی دی چھپوائی میہنا بن گئی۔
 انج وی چھاپہ لوک بولی دا بوہتا بھلا نہ کر سکیا۔ چھاپے لوک بولی دے بتے
 نویں پڑھاک نہ بنائے۔ نویاں پڑھیاں نوں تے لوک بولی ول آونا ای موت سی۔
 لوک بولی دیاں پچھیاں اوہو گھندے جیہڑے اگے ای لوک بھنڈار ورتیندے
 آہے۔ جیہڑے گا کے کھید کے شاوَن والیاں دی بہنی بہندے آہے سگوں ایہہ
 ہويا جو چھپی کتاب کول ہوون نال سنیڑاں دا شاوَن والیاں نال سبندھ ڈھلا ہوون
 لگ پیا۔ چھپے دی نویں آدر کنیں مٹنے دا اگھ مارن لگ پئی۔ لکھیار راگیاں واریاں
 ولوں کنڈ کر کے چھاپے واسے لکھن لگے۔ سانجھے لوک بھنڈار دا مل گھٹن لگ پیا۔

لوکائی دی نویں طاقت بئی کوئی نہ تے پرانی کھن لگ پئی۔ نواں ست سوما چھٹیا کوئی نہ تے پُرانے کھن لگ پئے۔ خلقت دی آپا سنبھال ریت نوں ڈھا لگ گئی۔ ایہدے نال لکھت دا سبھاوی وٹن لگ پیا۔ رمز سیترو والا وارث شاہی جھٹ کھوٹا ہو کے ”اصلی تے وڈی ہیر“ دالمکاء بن گیا۔ پر ایسہ گل دکھری نیجھ منگدی اے سو پھیر سہی۔

وچولے میل دی رت پردی پڑھالی نے سوکھے چھپواک وی کھلارے تے ترکھیاں لکھیاں دے پور وی کڈھے۔ نویں سلاہتا نویں مشہوری دے مُٹھے۔ وچولے میل دی منظوری اوہدا تھا پڑا ایہناں دی ہستی دے نکاء لئی ضروری ہا۔ ایہناں دی ہستی دا نشان چھپی کتاب آہی۔ اوہ پھب کے پچھدی منگا گل متھے تے لاء کے ہٹی چڑھدی تے وکدی تاں ای ایہناں دی ہوند چمکدی۔ کتاب دی دکھ ای کتاب دا اصلا ہو گئی۔ گاہک رتبھاون دی سکت ای اوہدا تے تھی گئی۔ جیویں حاکماں دے کنڈے اُتے تلن وچولے میل دا اصلا سی تے اوہدے فلسفے اوہدے وچار اوہدیاں دکھاں اوہدیاں گاہک رتبھاونیاں سن۔

لکھیاں لئی وچولے میل دا تھا پڑا کھن دے ہور موکلے راہ وی نکل آئے، تھیٹر فلم، ریڈیو (تے اخیرٹی وی)۔ وچولے میل دی مشہوری تے سلاہتا دا کم ہا (پیسے دے نال نال) اک نویں میں اُسارنی جیہدے وچ خلقت نالوں تڑے سانگے دی رہند کھوہند لوکائی جاسکے اوہدی بوماری جاسکے۔ سو وچولے میل وچ دُہمن تے وکن لکھیاں دی اندر لی لوڑ بن گیا، اک انموڑ چھک جیہڑی اندریاں نال جا جڑی آہی۔ ایہنوں سمجھن نکھیرن مر کے جیون والی گل آہی۔

جدوں وچولے میل وچوں کجھ نویاں پڑھیاں نوں جگت اُتھلارے دیاں لہراں ہلوتیا تے لوک پکھ اپنا کے نویں جوئے جن دی لوء لگیو نیں تاں لوک بولی ول مونہہ کیتو نیں تے گواچا لوک سانگا بھالن دی کیتو نیں۔ پر اوس گھڑی وی ورلیاں نوں ای بنی بناتی اُردو انگریزی ہستی ونباون تے چڑھیا بزار چھڈن دا جیرا ہویا۔ بہوں اچھے آہے جیہناں اوکھے سوکھے لوک بولی دا لڑ پھرتے لیتا پر تھوڑے چر پچھوں ای موقع دیکھ کے آنے بہانے ہتھوں تھلا چھڈیا۔ نعرہ اوہ ہمیش لوک پکھ دا ای ماری آئے۔ آپنے توں اچیرا اُتھلار وی اوہناں کسے نوں نہ منیا۔ لوک بولی

داناں وی ریت مُونہ بھر بھر کے پیا یونیں۔ ڈھائی گھڑیاں لوک بولی دا پلہ چھوہن
 نوں رگنیوں وی ہمیش۔ پر آپنی اندر لی لوڑا گے بے وس آہے۔ لوک بولی دا سانگا
 لوک کچھ دا راہ مر کے جیون ہا سو قبول نہ سکے وچولے میل دی دتی ہستی تَج نہ سکے۔
 جیوندے موئے ہو گئے۔ جیہناں ہس کے ایسہ ہار ویاہی لوک بولی راہیں لوک کچھ
 سنجاتا اوہناں مڑ جیون ول مُونہ کیتا۔ پر ایسہ سار آوندیاں آوسی بنی رزا لوک بولی
 وچ رلکھن ای لوک کچھ نہیں۔ لوک کچھ اے لوک سانجھ راہیں لوک سُرَت دی مڑ
 اساری۔ خلقت نال رل کے اوہدے ڈھٹھے گھر دی مڑ اساری۔

لوک سُرَت دیاں پرانیاں یہاں دی بھال تے نویاں یہاں دی کاڈھ لوکاں وچ
 بہ کے ای تھی سکدی اے۔ جیہناں نویں جوئے جیونا اے خلقت وچ مڑ جم کے
 ای جیونا اے۔ وچولے میل دیاں لوڑاں مڑ مڑ اندریاں نوں ہتھ پاوندیاں نہیں۔
 شکل و ثناء کے راہ بھلندیاں نہیں۔ آہندیاں نہیں۔ تساں سچے تے سچے او۔ پر ویکھو
 نہ۔ آپنی گل سناون مِناون لئی چالو رنگ ڈھنگ چھوڑ دیسوتاں تہاڈی گل دا مل
 کیہ رہی۔ تہانوں سُشی کون۔ ڈاڈیاں نوں ہراون لئی اوہناں نوں پہلوں
 ر بھاون پسماون دی لوڑا اے۔ سو وچولے سوجھواناں والی دکھ بٹاؤ اوہناں توں
 وی ودھ ملوک تے نہاتے دھوتے بن کے دکھاؤ۔ اول تے لوک بولی دی گل
 ڈاڈیاں دی بولی وچ اوہناں دیاں گراں گراماں اندر رہ کے ای کرو۔ بے لوک
 بولی ورتنی ای بے تاں اوہناں دے رنگ رنکج کے ای ورتو۔ کتاباں و پچنیاں
 بے تے اونویں لشکا سجا کے اوتیاں ای منگیاں چھاپو رجتیاں اوہ چھاپدے نہیں۔

لوک ریت دے دیدواناں دا لوک بانالاء کے دِھنگیاراں دے ویرھے پن
 دِھنگیاراں نوں سکھاوندا اے۔ اوہ تے چاہوندے ای ایسہ نہیں جو لوک ریت
 نوں آپنے پر بندھ بیٹھ کر کے لوکاں کولوں نکھیرے آپنی مُٹھ وچ جھپیٹ کے ماریا
 ونجے۔ نالے ایہنوں آپنے من پر چاوے لئی ورتیے نالے خلقت نوں دکھائیے
 کیوں بنی ہن دسوا سیں تہاڈے وچوں ہاں کہ نہیں۔ بنی اسیں تہاڈے سچے اگوان
 جو ہوئے۔ جیہڑیاں شیواں تہاڈے کول رمنی وچ ہسیاں رُلدیاں سن اسیں سنگھار
 کے شوکیاں وچ نکا دتیاں نہیں۔ باہر لیاں مُلکاں وچ اوہناں دا مل پوا دتا اے۔
 باہر لیاں نوں اوہناں دنا ہوندا اے بنی تیس سرکار نویاں سواداں توں رُجے بیٹھے

او۔ تہانوں پرانے دوسرے سادیاں سواداں دی نوہ رہندی اے۔ اسیں آپنی ریت
 وچوں ڈھیر سارے سواد تہاڈے جوگے سانجھے ہوئے جے ایہناں نوں نویاں کرو
 تے آپنے جگ پرے کاروپار وچوں کوئی جوٹھا بیہا ساڈی جھولی وی چاگھتو۔ اسیں
 آپنیاں لوکاں دے موہر لے جو ہوئے سرکار۔ ساڈے رہنا اوہناں نوں کیہڑا تہاڈے
 لاہے سر وگن جوگا کرے۔

لکھت بھاویں لوک پکھویں ہووے لوکائی دی آپنی جی جوڑی ہووے جیڑے
 ویلے ڈاہڈیاں دی مرضی دی پُشاک پوا کے اوہناں دے سچ (سچ) اُتے چاڑھ دتی
 جاندی اے۔ تاں شے ای بی تھی ویندی اے۔ فرید بلہا وارث تدا تائیں لوک
 ریت نئیں جد تائیں خلقت وچ بہہ کے پڑھیندے نئیں۔ خلقت نوں خلقت دی
 کھٹی سکت دا جانو کریندے نئیں۔ خلقت دے مہنجال اوہدے بانہہ بلی بندے
 نئیں۔ ڈاہڈیاں دیاں شیلھاں دی سجاوٹ تھی کے اوہ لوک ریت نہیں رہندے۔
 لوک ریت شعر نہیں شعراں دی ورتوں اے۔ بنت نہیں ٹورا اے۔ دست نہیں
 ورتارا اے۔ ٹی وی ریڈیو توں اشتہاراں اُتے دھوڑی کھنڈ بن کے سوافیاں وچ
 سچے کسی بلاراں دیاں نقلی بٹھاں وچ بجھ کے 'سرکاری تھاپڑے نال منائے
 دیہاڑاں دیاں منظور شدہ تقریراں وچ جت کے فرید بلہا وارث ڈاہڈیاں دے
 ویہار دا تروڑ نہیں رہندے اوہناں دے گھرے دی مچھی بن ویندے نئیں۔ خلقت
 دی اوس کھٹی وانگ جیڑی خلقت ہتھوں کھس کے خلقت ویریاں دی جمع جتھہ
 تے راس بن گئی اوہناں دے سکھال دا سودا اوہناں دی حاکی دا ہتھیار بن گئی۔
 چمکن والے چمکدے نئیں:

ٹھیک اے جی لوک بولی دی لکھت سادی سستی چھنی چاہیدی اے پر سادی
 سستی چھپے تے وکے کیوں۔ دکاندار ادھو ادھ پتی منگدے نئیں۔ جے چھپواک نری
 لاگت ای لوے (تے لکھیار کجھ نہ لوے) تاں وی کتاب دا مکمل لاگتوں دوتا تے
 رکھنا ای پوندا اے۔ جتنا مکمل ودھ ہووے اتنا ای دکاندار دالابا ودھ ہوندا اے۔
 سستیاں کتاباں و پچن دی اوہنوں کوئی کابل نہیں ہوندی۔ اوہ سستیاں پچھانہ دھر
 کے منگیاں گاہکاں دے مونہہ بیٹھ کریندا اے۔ ایہہ وی اوہ جاندا اے جو لوک
 بولی دے ٹھیک گاہک ٹانویں ٹانویں ہوندے نئیں ایڈی سوڑی تے مٹھی گاکی لئی

اوہ اپنا ویلا تے تھاں کیوں ونجائے۔ اوہ مہنگیاں تگن والیاں نوں سادیاں ستیاں
وکھا وکھا کے اپنا اگھ کیوں مارے۔

ٹھیک اے جی تئیں موٹیاں سامیاں نوں نہیں پڑھاونا چاہوندے آپنیاں
کتاباں نہ پڑھاؤ۔ پر جیہنوں خلقت آہندے او اوہ ہُن سکتے جے۔ لکھاں مُون نہیں
شراں ول لگی آوندی اے۔ کوئی داراں قصے واچن والے ڈھولے جوڑن والے
راس دھاریے راگی رزق مگر شریں وڑدی ایس خلقت نوں لوک ریت دے
مونہ لاون جوگے نہیں جے رہے۔ ایس بھیڑ تائیں لوک بولی دی لکھت ہُن کون
اپڑاوے۔ ٹھیک اے مہنگی ایہناں پڑھنی کوئی نہیں۔ پر سستی ایہناں جوگی جے
کوئی چھاپے تے ورتاوے کیوں۔ ورتاوے تے پڑھاوے کیوں۔ جے کوئی ایسے
کم لگ ونجے تے کھاوے رکھوں۔

ٹھیک اے جی۔ ٹی وی ریڈیو زر زور والیاں دے ہتھ ٹھو کے سہی خلقت لئی
افیم سہی۔ پر ہُن کروڑاں ہمارا ایسے افیم نوں بیٹھے چنگدے نیں۔ کیہ اپا اے
ایہدا تہاڈے کول۔ جے او تھوں دو بول لوک ریت دے لوکاں دے کنیں پے
جان دے نہیں تے خبرے کوئی بھلا ای ہوندا ہووے نیں۔ تہانوں سوڑ کیوں پیندی
اے۔ پنڈ گراں چک وستیاں ڈھوکاں جھوکاں ہُن سبھ شردی ماروچ نیں۔ جے اوہ
شردے ودھا بیٹھ بدھیاں نہیں گئیاں تے شردی ورتن دے مونہ تے آ ای
گئیاں نیں۔ پنڈ ورتن ہُن وکھری ورتن کوئی نہیں جے رہی۔ پنڈ دا رزق ہُن شردی
دے ویہار نال بدھا پیا اے۔ سو پنڈ رہل وی شردی رہل دا پرچھاواں بن گئی
اے۔ جیہناں شردیہاریں رزق کماونا اے شردی رہل نوں مہنہ مارنا اے اوہناں
سکولاں اخباراں اشتہاراں نوں ای ٹی وی ریڈیو نوں ای مُرشد مٹا اے۔

دس دن والے دسدے نیں:

زور اورو لوک بولی دی ورتوں، لوک ریت وچ رسن ناں اے اک وکھرے
ویہار دا اک وکھرے وسیب دا۔ غیا فرعونان گھرای موسا پلدے نیں۔ پر اوہ
فرعونی کرن نہیں فرعونی دا تروڑ کرن پلدے نیں۔ جے لوک بولی ٹھانیوں لاگو ہونی
اے جے لوک ریت ”نیلام گھروں“ پر چاری جانی اے تاں ایہہ دِھنگیار ویہار دا
جوڑ ہوسی تروڑ نہیں۔ لاگو ہوون دا وکھرا رنگ پر چار دا وکھرا ڈھنگ ای تے تروڑ

اے۔ نواں رنگ ڈھنگ کڈھن ای تے کم اے تروڑ والیاں گوچرے۔ نوں
رنگ ڈھنگ دی اگدوں مٹھی شکل کوئی نہیں۔ تے جیہڑے اک ننھے دے نہ پھرن
تے ڈھیریاں ڈھا بہن اوہناں گل نہیں سمجھی۔

پھکھن والے:

تقریر چھڈو۔ تساں گل ٹوری آہی۔ ”ماں بولی“ والیاں نوں بولی مار کے۔
دسو اوہ ستیاں کتاباں کیوں چھاپن تے کیوں ورتاون۔

دسن والے:

وچولیاں دے آسرے چھڈو۔ سدھا خلقت نوں بوہڑو۔

پھکھن والے:

کیوں؟

دسن والے:

سنگتاں جوڑو۔ خلقت نال، جتھے وی اوہ ہے، جڑ بیٹھوتے وچارو۔

پھکھن والے:

کہن سوکھا اے کرن اوکھا اے۔

دسن والے:

؟

کیہدی روح تے کیہدی غذا

مُغلاں ویلے پنڈ گراواں وچ گاؤں و جاوَن والے وڈیریاں بھونئیں وال گھراں دے کئی ہوندے آہے۔ ہوراں کیاں ہارا یہناں ڈوم مراسیاں دالاک وی جدی پشتی ہونٹا۔ بھونئیں وال جھماناں دے نال ڈوم مراسیاں دیاں وی پیڑھیاں ٹرنیاں۔ دینہ دیہارا یہناں جھماناں دے ریتل سوہلے جس تے واراں گاؤنیاں۔ آپنیاں وڈکیاں دے جوڑے بول اوہناں دیاں دسیاں حُراں تالاں وچ الاونے۔ نویں پیڑھی دابیان آپ جوڑ گنڈھنا۔ مرن پرن تے وی ایہناں وڈکیاں دے جوڑے رسم ریت دے گاؤں مُشاوَنے۔ ریت سیانے ہون پاروں ڈوم مراسی جھماناں دے اصلوں نیزے ہوندے آہے۔ ساک سبندھ وچ ایہناں ای جھماناں ولوں ویکھ پرکھ کرنی تے گل ٹورنی۔ ہورباریک کاجاں وچ سنیے پتر داکم وی ایہناں کرنا۔ زنانے وچ سکھڑ مراشاں ای چڈھرائیاں دے گچھے کم نبڑنے تے بھیت سنبھالنے۔ واڈھیاں اُتے ہوراں سپیاں وانگ ڈوم مراسیاں نوں بدھا ان وی ڈھینا تے دینہ دیہارا اُتے مرن پرن اُتے ریتل لاگ وی جڑنا۔ ہر ویلے دی نیڑ پاروں جوٹھا لٹھاتے لبھنا ای کدیں کدائیں انعام وی لبھ جانا۔ پر ہر ویلے دی نیڑ کدیں مہنگی وی پے ونبجی تے سائیاں کدے نکی موٹی گل توں مونہ وٹ بھناتے بعضے ویلے پو لے وی کڈھ مارنے۔

مالکی وال جھمان ہوراں کیاں وانگ سگوں ہوراں کیاں نالوں ودھ ڈوم مراسیاں نوں گھر دے بندے آکھدے آہے۔ پر ہوراں کیاں وانگ ای اوہناں نوں پورا بندہ سمجھدے نہ آہے۔ کئی دی ہستی مالک دی دات آہی۔ اوہا جوٹھا لٹھا۔ مالک نال لاگ توں چھٹ کئی داکسب ہاسوہینا سمجھیا جاندا ہا۔ اوہی محنت مالک دی ورتوں توں باہر بے مُلی تے کو جھی آہی۔ کسبی داکسب مالک دی سسوں باجھ اک میہنا اک بج ہا۔ مالک محنتی دی کرت ہنڈا وندا ہا پر کرت وان نوں چکھن جوگ کر کے ای کول رکھدا۔ ان سبھ توں مہنگی سبھ توں ودھ لوڑیندی وست آہی۔ سوان اُپجاو، بھونئیں پانی تے پشواں دے مالک ای وسیب وچ بھارو آہے۔ سبھناں مخنیاں دی محنت دامل مالکی والیاں دی سیوا صدقہ ای آہا۔ ڈوم مراسیاں دی محنت تے کوئی ہنڈن سار دست

بن کے ظاہر افسردہ دی وی نہ آہی۔ سو مالکاں دی نیڑ ماندیاں وی ڈوم مرا سی ہوراں
 کیاں سیپیاں کولوں ہولے تے نیویں رگشندے آہے۔ مالکاں دی نیڑ پاروں ہوراں
 کیاں سیپیاں اوہناں نوں ویہلڑتے جھولی چک سمجھنا۔ اوہناں دی سوجھ نوں وست
 گھاڑناں جڑی نہ ہوون پاروں پھوکی چترائی تے پلاکی سمجھنا۔ پر کیہ مالک تے کیہ
 دو جے کمی، سہناں دے چت وچ کسے اوہلی نکرے ڈوم مرا سیاں ولوں اک گجھا ڈروی
 ہوندا ہا۔ اک ان گولی آدروی ہوندی آہی۔ کارن ایہدا وی ایہو آہا جو ڈوم مرا سیاں
 داکم و ست گھاڑناں جڑیا ہو یا نہ ہا۔

ڈوم مرا سیاں داکم کم ہے ای کوئی نہ۔ ایہہ اصلوں کھیڈاے۔ جیہنوں ویہی کم
 ونڈتے میل ونڈنے کم بٹا کڈھیا اے۔

ڈھروں خبرے کم کوئی آہا ای نہ۔ کرن تھیون سبھ کھیڈا ای آہی:

سبھ کھیڈ کھیڈ گھر آوندی

پر جدوں لوڑاں دا بھارتے کھار ودھیا تے ڈنگ ٹپاون توں ودھ کھاہد اپاونی
 سیرٹنی پئی تاں اپا ونہار وکھرے ہو گئے تے سانبھن ورتاون ہار وکھرے۔ سانبھن
 ورتاونہار مالک تھی گئے تے اپا ونہار اوہناں دے بانھے۔ بانھیاں دی کرنی کھیڈ نہ
 رہی۔ اوہدے وچوں من مرضی دا رس نکل گیا تے باندھ دی کڑتن رہ گئی بانھیاں
 دی کھیڈ محنت بن گئی۔ ہڈاں دی پیہ۔ اوہناں نوں جیوندیاں رکھن والی تے جیوندیاں
 رکھ کے مارن والی۔ کھیڈ سکت ہُن نری مالکاں دے لیکھے لگ گئی۔ بانھیاں لئی کھیڈ
 کم بن گئی تے مالکاں داکم کھیڈن ہو گیا۔ پر کھیڈ مالک وی نہ سکے۔ بانھیاں نوں سبھی
 رکھن کم تے لائی رکھن آپ اک کر ڈاکم آہا۔ جہنے مالکاں دے چت وچ کھار، چتا،
 مکر، کرودھ تے ہسکڑ دیاں ڈونگھیاں یساں کڈھیاں۔ ایہناں یساں توں باہر نکلن
 اوہناں دے وس نہ رہیا۔ اوہناں دی بے انت کھل بے انت باندھ بن گئی۔ سواد
 سدا بے سوادا تھی گیا۔

کھیڈ پھل ہے سانجھ دا سانجھ دے بھرواس دا۔ سبھ دے اک ورگے ہوون دا،
 اک یک ہوون دا، ہر وچ ہر دے واس دا۔ بندہ میلاں وچ ونڈ بیجا تے آپو اپنے
 لاہے پاروں جنی کھنی اک دو جے نالوں اصلوں رنکھڑ گئی۔ ہر ہر کنوں او بھڑ تھی گیا تے
 کھیڈ سکت سک گئی۔ جیون پھوک ہو گیا۔ ہُن کھیڈ لفظ دا مطلب ہو رہا۔ کھیڈا وہ

ہوئی جیہڑی کم نہ ہووے۔ جیہدے نال کوئی ورتن وان وست نہ اُتجے۔ انج سمجھو ہی جیون آہر دی جی جائی جیون آہر نال دھروں وی یا ہی کھیڈ سکت جیون آہر نوں طلاق کے نو۔ مٹی ہو کھلوتی۔ کم دی سو کن کم دی شریک۔ ہُن کھیڈ دا مُول ہو گیا ہندے نوں کم کولوں ہٹاون۔ اک نکمی ان اُپجاو رُجھ وچ لاون۔ کم کامیاں، کمیاں نوں بنھدا ہا۔ اوہناں دی آپی کیتی نوں اوہناں کولوں اوپریاں کریندا ہا۔ اوہناں دی آپی کیتی اوہناں دے سرتے ای آن مُل دی آہی۔ اوہناں نوں بنھی رکھن لئی کائے دی محنت ای اوہدی ویرن تھی گئی۔ سو اس اپنے بچا لئی کھیڈ دے دے نکم دا لڑ پھڑیا۔ واج دی کھیڈ وی کامیاں دا نکم آہا۔ ا جیہیاں واجاں جیہڑیاں کے کم نہیں آوندیاں بندے دے اندروں سانجھ دے مُتے سواد ہلوندیاں آہیاں۔ اوہدے اندر بھروسہ دے گواچے سکھ دا چیتا جاگ پینا۔ اوہنوں اچنھا لگتا۔ ایہناں نکمیاں واجاں دی کھیڈ نوں کائے کھل سنبھا جاتا۔ آپی مکدی ہستی دا دارو، اپنے رب دا الاء۔

پروسیب وچ کم دی باندھ ای رب آہی۔ کم نوں اصلوں تچ کے مُکر کتھوں جُڑدا، سو کامیاں آپیاں ہتھاں پیراں نوں کم دی باندھ وچ جوڑی رکھیاتے نالو نال نکمیاں واجاں دی کھیڈ راہیں اپنے چت وچ کھل سواد دا دھووی دھکھائی رکھیا۔ اوہناں باراں یلیاں وچ مالکاں دے مال نوں و بھیلیاں دی چھوہ نال چاریا۔ چرخیاں دیاں جگراتیاں وچ سُر اں دیاں پُونیاں کتیاں۔ سیپ دی گھاڑ دے کھڑکار نوں سُر سواد تے نال وچوں لنگھایا۔ کیتی دا پھل سا لبھن والے جیہناں کھیڈوں و جوگے کم دی باندھ نوں و سیب وچ رب بنا کے ٹھوکیا آہا، کامیاں دے ایس جُجھے کھل الیر کولوں ڈرے۔ اوہناں گاؤں و جاؤں نوں شیطانی فعل آکھ کے بھنڈیا۔ کائے کامیاں آپ وی اپنے اندر لی ایس رب دی واج کولوں کدیں کدائیں ترٹھ کے ایہدے تے شک پیا کیتا متے ایہہ ساڈا رزق ای کھھاوے۔

ہولی ہولی مالکاں نوں کامیاں دی ایس کھل دا راہ مارن دا داع بھیا۔ اوہناں نکم نوں کم بٹاون دا اپرا لا کیتا۔ اوہناں گاؤں و جاؤں دا مُل پادتا۔ سُر والیاں، و بھیلیاں ڈھولاں والیاں و جریاں نوں چُن کے آکھیا ایہو تہاڈا کم ہے۔ ایہو تہاڈی سیپ ہے۔ تیس ایہو کسب کماؤ تے ایہنوں ساڈی چودھر وڈیاؤں لئی لوکائی اگے ساڈی ساکھ بٹاون لئی ورتو۔ و جریاں جاتا نالے جج نالے وچ، نالے آپنا کھل سواد مائساں تے نالے

مالکاں دا گھر پورا کر کے رزق ولوں پنچنت ہو و نبھساں۔ ایسہ نہ جاتوئیں بنی گاؤن و جاؤن گھل سواد تے دیندا آہا کھیڈ ہوون پاروں۔ مالکاں دی وگارد توڑ ہوون پاروں۔ جہن جد گاؤن و جاؤن مالکاں دا دتا کم بن گیا، مالکاں دی غلامی دا وسیلہ بن گیا تاں اوہدے وچوں وی گھل سواد اڈ گیا تے اوہدی تھاں اوہو باندھ مجبوری دی کڑتن آگئی۔

ہولی ہولی گاؤن و جاؤن دا کسب مالکی ریت دا انگ بن گیا۔ کسی گئی مالکی دا گنا بن گئے۔ بیڈا وڈیرا مالک دا کھلار ہوٹا اوہنوں او سے میچ دے کیساں نوں بوہے بہاون دی لوڑ ہوئی۔ چودھریاں دیاں ڈیریاں توں چوٹوئیں کسی شاہی منصب داراں امیراں دیاں حویلیاں وچ پجے۔ او تھوں جیہڑے باتشاہ دی نظرے چڑھے اوہ شاہی دربارے وچ سجے۔ آہو، سجے۔ کیونجے شاہی دی پوری سترای سجاوٹ تے وکھاوے سر آہی۔ طاقت دا، دولت دا، سوہن دا گن دا وکھاوا۔ ایسے وکھاوے راہیں خلقت دیاں دلاں وچ باتشاہی دا رعب تے آور جمدا ہا۔ گاؤن و جاؤن والیاں سجاوٹی درباری بانے پاکے پھمنناں تنکیاں نال جسے سجا کے نوکری تے حاضر ہووٹا۔ اٹھے پہر باتشاہ ملکہ دیاں روز دیاں رجھاں نال پھدا سنگیت چھوہنا، موسم تے ویلے نال ٹھکدا۔ باتشاہ دی آوا جاوی نوں نقاریاں اُتے ون سونے ٹھیکیاں راہیں ہوکنا۔ رت چلدیاں رسماں ریتاں نال سجد سنگیت جوڑ کے ہر ویلے دی شاہی پروہنچاری وی بھگتاوئی۔ شاہی کنیزاں دی سکھلائی وی کرنی۔ باتشاہزادیاں نوں گن دیاں رمزاں دا جانو کرنا۔ رسم ریت دا لاگ وی لینا، انعاماں نال گھروں بھرنے، بعضے ویلے جگیراں تے مافیاں وی ڈھینیاں تے لم سلے خطاب وی۔ گایکاں و جنتریاں شاہی امیراں والی رہت ہنڈاوئی۔

شاہی نوکری وچ ناں ناواں تے ڈھیر آہا تے ٹوہروی گھٹی۔ پر ناں ای ات دی چنتا تے کھاروی آہی۔ ہر ویلے ساز تے واج نوں سان تے لا کے تیار رکھنا پوند اہا۔ ویہار دے بدھے آہراں لئی وی تے دوجیاں کیساں نال بھرن لئی وی۔ شاہی گئی تاں ای اپنی تھاں تے رہ سکدا ہا جے اوہدے ساہویں اوہدے جیہا کوئی ہو ر نہ اٹھے۔ کیونجو نوکر دی ہار مالک دی ہار آہی۔ شاہی گایکاں و جنتریاں نوں ہر ویلے پڑ وچ لہن دی تیاری رکھنی پوندی آہی۔ ہر ویلے نویاں پرائیاں شریکاں دا دھڑکا رہندا ہا۔ (شاہی ہاتھیاں پہلواناں شاعران تے سنگیت کاراں دا اکورولا آہا)۔ نوکری دی سانجھ واسے

کسب دی سانجھ کرنی پوندی آہی۔ سُر تے لے وچ، واج تے ساز دی تیاری وچ ات
 باریک کاڈھاں کڈھن دا جتن کیتا جاندا ہاتے ایہناں کاڈھاں نوں بھیت بنا کے
 شریکاں کولوں لکایا ویندا ہا۔ شریکاں کولوں کیسہ آپنی اولاد دیاں راساں ہتھ وچ رکھن
 واسے اوہناں نوں وی ایہو دسیا ویندا ہا ہی پتر واسے لکھ داء دسن والے ہن سواکھاں
 نیویاں ای رکھو۔ شاگردی اول تے گھروں باہر کڈھی ای نہ جاندی ہئی جے بگانے پتر
 کھیڑے ای پے جاوَن تاں اوہناں نوں ساری عمر لئی غلامی کرنی پوندی آہی۔ رنکی
 جیسی گل چٹھن لئی ورھیاں بدھی پانی بھرنے تے بالن ڈھونے پوندے آہن۔

نوکری دے پواڑے نے کسی نوں کرڑی دُبھرھا وچ جکڑ دتا۔ کسب وکھاوَن ای
 اوہدا رزق ہا۔ پر کسب وکھاوَن وچ ای رزق دے کھن دا دھڑکا ہا۔ سو وکھاوَن اک
 رنگ دا کھاوَن بن گیا۔ ایس دُبدھانوں ویہار من کے ہنڈاوَن والے ات پر تدارتے
 چتر تھی جانے۔ پر دُبدھا دے شکنجے وچ سوڑے پین والیاں وچ اک مکمل جیہا آویٹا۔
 کوئی ور لے اچھے وی ہونے جیہناں نوکری دے ویہاروں ای مُونہ موڑ کے فقیر ہو
 ویٹا۔ وڈکیاں دی واریاں بدھی باریک کاڈھاں دی کھٹی پلے بنھ کے نتائیاں نمائیاں
 وچ جار لٹا۔ آپنے گن نوں مڑا وہناں دی کھیڈ سکت نال جوڑنا۔ کسی داکم مڑ کھیڈ بٹنا
 تے اور کامیاں نال کھیڈ سانجھ راہیں مڑ کھل سواد چکھنا۔ ا جیہیاں ویہار ناہر
 گنواٹاں دا ویہار ناہر شاعراں نال جوڑ جڑنا، نانکاں نوں مردانے رلنے۔ مادھو لال
 حسین تے بلیھے شاہ دی، چل تے لطیف دی شاعری سنگیت بن کے باراں تے ہزاراں
 وچ ہلنی۔

گھڑیاں دیونکال نی
 اج پی گھر آیا لال نی
 انہد و اجا و جے شہانہ
 مطرب سکھڑا تان ترانہ
 بھلا صوم صلات دوگانہ
 مدھ پیالہ دھن کال نی

انہد اوہ واج اے جیڑی وچھڑیاں دی سنج توں باہری اے۔ ایسہ واج لال
 دے گھر آوَن تے سنیدی اے، جدنت دا وجوگ مگدا ہے، جد دوج آہنیت بندی

ہے۔ پر اسے عجیب گھڑی اے۔ ملاپ انندوی سکھرتے ہے۔ مڑو جوگ دا دھڑکاوی
 آخر اں دا ہے تے ایس دھڑکے توں سد یویں چھٹکارے دی تا نگھ وی۔ انند واج دی
 نکر تے گھڑیاں دا واج ہے۔ وصل رین دیاں حداں اُتے وچھوڑے دے د۔ نہ دا
 پہرا ہے۔

دُکھ دلد ر اُٹھ گیا سارا
 مکھ ویکھاں تے عجب نظارا
 رین ودھے کائی کرے پھارا
 دن اگے دھرو دیوال نی

دن کم کار دی باندھ دا ویلا ہے۔ گھڑیاں دا واج وی او سے باندھ دے نیڑے
 دُکھن دا ہوکا ہے۔ لال ملنی والی و پھل دے مکھن دا۔ اُجاڑاں وچ گھڑیاں نہیں
 کھڑکدے۔ گھڑیاں و سبیلے پر بندھ دا نشان ہے جیڑا ہر میل دے بندے نوں اوہدی
 ویسی ہستی دا چیتا کریندا ہے۔ جیڑا کامیاں نوں کم تے سدیندا ہے تے راجیاں نوں
 راج تے۔ گھڑیاں سرکاری تنخواہیے ہوندے نیں۔ اوہناں نوں کون نکالے۔ گھڑیاں
 ہر تھاں نکلے پئے نیں اوہ مہلے شاہ دے چت چیتوں کیویں نکل سکدے ہن۔ اوہ
 اوہوں انند واج دے کھل انند وچوں وی میل بند و سب دی مارو باندھ دا کھڑاک
 شاوندے رہن۔ ایسے پاروں بلھا گھڑیاں نوں اپنی اچرج کھل دا چس چکھا کے
 اوہوں کم چھڈن لئی ویاہار مھنن لئی ونگاردا ہے۔

گھڑی گھڑی گھڑیاں بجاوے
 رین وصل دی پیا گھناوے
 میرے من دی بات جو پاوے
 ہتھوں چائے گھڑیاں نی

سو انند واج اوہ واج ہے جیڑی گھڑیاں دی واج دی شریک ہے اوہدا تروڑ
 ہے۔ تے اوہناں نوں سیٹوندی ہے جیڑیاں اپنی ویاہار بدھی ویاہار گھڑی میں دے
 کلاوے وچوں نکلن دا مُبلہ مارن۔ اچھے جی آپے ای انند واج دے بنا و نہارتے
 آپے ای مُستہار ہن انند واج پلوپل پئی مُسیندی اے۔ تے جی کھنی نوں پئی ایلدی
 اے نی آؤ وچھوڑ نہار ویاہار دا وارا مکاؤ۔ ایہدے مارود۔ نہ اگے اپنی کرنی دی اٹ

بھرم بھری رکھن دی سوڑ وچ کڑتےجے، ہر دم بھرن مھسن دے ڈر وچ بدھے۔ پر کوئی
 ور لے اوہ وی ہوونے جیہناں نوں ایسہ سوڑتے ڈردی جال روگ جاپٹی۔ روگ دی
 کرک نے روگ دی سجان دیٹی۔ اوہناں نوں سہی ہووٹا بنی ساڈا مان تران تے شاہی
 مان تران دا پر چھاواں ہے تے شاہی مان تران آپ صدقہ ہے دھگانے سیرٹ لوک
 کمائی دا۔ نالے اوہناں شاہی مان تران دے بیٹھو بیٹھ مھلاں دے اندر نت چلدی
 دغے مکر تے کھار کھور دی سیاست کولوں ہوو کیٹھی۔ اوہناں نوں دسنا بنی شاہی ٹشن ٹوہر
 دی، روپ روپ دی ایسہ دنیا جیہدے لیکھے ساڈا کسب تے گن لگا، وچوں کیڈی
 کو جھی تے کھوکھلی اے۔ اوہناں نوں شاہی نوکری قید جاپٹی۔ ا جیسی قید جیہدے توں
 کوئی چھٹکارا نہیں۔ کیونجو شاہی ویہار دیاں حداں توں باہر کوئی جوہ اوہناں نوں دسی
 نہ۔ انج وی گاؤن و جاؤن دا جیہڑا ڈھنگ واریاں بدھی اوہناں کڈھیا تے پکایا آہا
 اوہدی حاکماں دیاں مھلاں توں باہر کوئی گا کی نہ آہی۔ سواک انٹ چتا اک بے
 ہاتھ دکھ اچیت ای اوہناں دے اندر لہہ ونجے۔ ایس چتا تے دکھوں چھٹکارا جے ہاتے
 کسب راہیں ہا۔ کم نوں کھیڈ بٹاون راہیں۔ سو کم دے ظاہر اوہلے اوہناں اک اندر لی
 کھیڈ رچائی۔ شاہی سولہیاں دے پڑدے وچ آپے دکھ دی دھوئی دھکائی۔ ان گنت
 رنگاں وچ اپنی پتا کھیڈی۔ پر سنگیت دا ایسہ تانا پینا انج کے بندا شاہی بانا ای ہا۔
 ایہدی ورتوں ہوندی مڑ شاہی مھلاں وچ ای آہی۔ سو کھیڈ مڑ کم بن وٹی تے دکھ چتا
 دا کھوہ نت پیا گڑتا۔

مغل شاہی ٹشن دا شاہی سنگیت کاراں نوں کوئی گھاٹا نہ ہویا۔ نواباں راجیاں
 دے درشنی دربار کئے ہوئے سن۔ اوہ اپنے آپ نوں انگریز دے بالکے وی سمجھدے
 سن پر مغل دے وارث وی۔ دربار تے محل دا مغلٹا ڈنبر بٹائی رکھن وچ ای آپے
 اصلی تے اصل ہون دی گواہی ملدی آہی نہیں۔ ہر نواب راجے نوں ٹوہ رہتی بنی
 چنگے توں چنگے گاؤن و جاؤن والے اوہدی حاضری وچ کھلوون۔ سو سنگیت دیاں گھرانے
 داراں نوں ایہناں ڈیریاں تے پرانا آدر پیا ملیا۔ سکھال ہاریاں نوں سکھال تے ڈھی
 گیا پر سوڑ والیاں دی سوڑ دی نالے آئی تے اوہناں دی کرت وچ بیٹھو بیٹھ پئی۔
 اوہناں ظاہر ریاستی عیش دے ماوے نال مچھاں پیاں وٹیاں پر اندروں اپنی اٹک پیڑ
 نوں نت نویں اُچ دی گجھی کھیڈ وچ پیا رلایا۔

انگریزی زروال شاہی دی چھتر چھاویں نواں دیسی زروال میل وی جڑیا۔ نویں
 دیسی وپاری پوند تے انگریز وپاری دے ہتھ ٹھو کے بن کے رُے پر ویسویں صدی
 چڑھیاں ایتنے جوگے ہو گئے جو اپنے بزار وچ آپنا سودا کھل و پھن لئی جتن کرن۔
 ہن انگریز راج دا شکنجہ ایہناں نوں کچھ چھن لگا۔ انگریزی پڑھائی پڑھے سوجھواناں
 دیاں ڈھانیاں وی دیسی وچ دیسی راج لئی خلقت دی اگوائی دا جھنڈا چا کے پڑ وچ نتر
 ہیاں۔ نویاں پڑھیاں انگریز دی رہت گڑھت تے پھڑی ای ہوئی سی۔ انگریز ساہنے
 آپنی ہستی دی رڑک نے ایہناں نوں پرانی دیسی رہل دی رہند کھوہند آپناون ول
 لایا۔ سنگیت نوں نویں سائنسی ڈھنگ نال سمجھن سکھاون دے آہر ہوون لگ پئے۔
 سنگیت سکول کھلے۔ کتاباں لکھیاں گئیاں۔ گھرانے وال گئی تے اوہناں دیاں سکھایاں
 بائیاں نواباں راجیاں دیاں رنگ محلاں توں نکل کے سیٹھاں دیاں تھیٹراں تے میوزک
 کانفرنساں وچ شیجاں مل بیٹھیاں۔

جدوں یورپ دیاں زروالاں جدی پشتی باتشایاں مودھیاں ماریاں تاں اوہناں
 وی اپنے تھیٹر گھرتے سنگیت ہال شاہی محلاں دی دکھ والے بٹوائے سن۔ ہندوستانی
 سیٹھاں وی اپنے تھیٹر تے سنگیت ہال یورپی نمونے تے ساجے سوارے۔ کیونجو اوہ
 انگریز زروالاں ورگا ہوون دا سودا ماننا چاہوندے سن۔ پر جد آپنے وکھرے کاروباری
 لاہے دی سمجھ اگھڑی تے رہت بہت وچ انگریز ورگے رہندیاں آپنا وکھریاں ماٹن تے
 وکھاون دی سوچیونیں۔ سو ولایتی تھیٹر گھراں تے ہالاں وچ دیسی راگ رنگ چس
 دیون لگا۔

تھیٹر گراموفون تے فلم نے دیسی سنگیت نوں ولایتی سازاں وچ اتار کے نویاں
 سیراں نوں موہیا۔ سنگیت دے ایس نویں ڈھنگ دی موہ بڑی ولایتی سازاں پاروں
 نہ آہی۔ ولایتی پیش کاری پاروں وی آہی۔ نویں پڑھے آپنی رہل دی رہند کھوند نوں
 ولایتی چڑھل ڈھالے ڈھال کے آپنا وٹا لوڑ دے آہے۔ ولایتی طاقت دیاں رچھاں
 راہیں ولایتی علم دی ویتراہیں آپنے آپ نال میل کرنا لوڑ دے آہے۔ آپنے آپ
 نوں نویاں کر کے ماٹن تے دل آہانیں، جائے اسیں آپ رہندیاں اوہ ہو جائے جو
 انگریز ہے۔ فلم تے تھیٹر نے، پر گراموفون نے اچھا، نویں پڑھے نوں آپنی نویں نو
 ہست، دا سودا دتا ہی آج رنگ مجلس کھیڈن والی واج میرے سرہائے پئی اے میں جد

چاہواں ایہنوں حکم دیواں۔ نالے گراموفون جیہا ولایتی رچھ دیسی گاؤں و جاوٹں راہیں
 میرا ہو گیا اے۔ میری سیوا وچ آں کھلوتا اے۔ میں سنوئیں پرانی دیسی پردیسی دو رنگاں
 دی حاکمی دی رلوئیں چس پیا مائٹاں۔ ایہہ چس کم دی کھپل راہیں نہیں کھیڈ دی کھل
 راہیں آئی اے۔ ایہہ میرے من دی موج اے میری ازادی ہے۔ اج میری ہر توں
 انگریزی علم دے جادو دا ڈروی لہہ گیا اے تے مغل قلعیاں دیاں اُچیاں کندھاں دا
 وی۔ میں دونہاں دے اندر لہہ کے دونہاں دا سروپ بن گیاں۔ آپنے دیس وچ
 وسدی خلقت اتے حاکمی دا سچا حقدار۔

تھیٹر گھراں دا جج سچا شاہی رنگ محلاں نوں پچھے شیندا آہا۔ گاؤں و جاوٹں
 والیاں دا بانٹا، آسن، جیسٹریے وی شاہی حضوری والے آہے۔ خیالاں تے ٹھہریاں
 دے بول وی بستے اوہو آہے جیسٹریے درباری پیش کاری لئی گھڑتے۔ سیرتے گئی
 دونوئیں سمجھو اک رسم راہیں پرانی شاہی رہت بہت نوں نویاں کریندے سن تے
 آپنے اُتے آپ ای سچے شاہی وارث ہوون دی مہر لاوندے سن۔

گھرانے وال گئیاں نوں سمجھ لگ گئی آہی بنی اگوں ساڈی مالکی دی ڈور راجیاں
 نواباں دے ہتھ نہیں ایہناں وپاریاں سیٹھاں تے انگریزی حاکمی نوں پجھدیاں نویاں
 پڑھیاں ہتھ اے۔ ہُن ساڈا پڑ رنگ محلاں وچ نہیں تھیٹر ہالاں وچ بچھنا ہے۔ ساڈے
 مونہ موتیاں نال نہیں بھرنے۔ گیٹ تے وکیاں مکٹھاں نال بھرنے نیں۔ ساڈی
 پروانگی شاہی سراں دے ہلوتے نال نہیں مکٹھاں والیاں دی تاوڑی نال ہوئی ہے۔ پر
 نال ای اوہناں نوں ایہہ وی سار آہی جو مکٹھاں تاوڑیاں والے وی سانوں بات شاہی
 رہتل دا نشان ای بنا کے ویکھنا چاہوندے ہن۔ ساڈے کولوں اوہو سواد منگدے ہن
 جو اسیں بات شاہوواں نوں دیندے آئے ہاں۔ سو گھرانے والاں آپنے بات شاہی پچھو کڑ
 نوں ہو رگھٹ کے پھڑیا۔ پرانے درباری جیسٹریاں ریتاں سبھاواں نوں آپنے کسب دا
 انکھڑاواں انگ جاتا۔

گھرانے وال گئی پڑھیاں بدھی شاہی کنیزاں تے نواباں راجیاں دیاں رکھیاں
 نوں گاؤں و جاوٹں دی سکھلائی دیندے آئے سن۔ ویاہیاں رائیاں بیگماں دا ساک
 ”کم“ بن و بنجنا تاں بات شاہ لوکاں کنیزاں رکھیاں نوں کھیڈ بٹاونا۔ ایہناں دے گاؤں
 پنچن نوں ایہناں دی کھیڈ سکت نوں مالکی بیٹھ کر کے بات شاہ لوکاں سمجھنا جائے ساڈی

ہوون والی شے ہے۔ شاہی گئی ہر ویلے ایہدی سنبھال وچ رہندا ہے۔ سمجھو خلقت
کنوں دوری ای اوہدا ہوون اے۔ خلقت کنوں وچھوڑا ای اوہنوں آپنے نال
میلدا ہے۔ خلقت دے ساہ دی چھوہ نال اوہ جھوندا ہے۔ باتشاہ وانگ اوہ وی خلقت
نال آپنے وچھوڑے نوں اڑیاں سلاماں تے نیویاں نظراں راہیں ماند اے۔

ویکھو شاہی محل مقبرے میستاں کیویں بندے ہن۔ پتھر لکڑ دے رنگ چوئے دے
ان گنت کاریگر کیڑیاں ہار آپنے کسب نوں ورہیاں بدھی گواں اُتے ننگی رکھدے ہن
تاں ایہہ الوکار اُسردے ہن۔ پر اُسردیاں سارا ای ایہناں الوکاراں دا لاگا محبتیاں
دی محنت نالوں ٹٹ کے باتشاہ دی طاقت نال جڑویندا ہے۔ اوہ باتشاہی رعب ٹوہرتے
ماں تران دا نشان بن ویندے ہن نالے باتشاہ دی عقل سوجھ شوق سچ دا ہوکا۔ محلاں
مقبریاں دے تے نیڑے خلقت ڈھک ای نہیں سکدی۔ جیہناں دی محنت سراسر
اُسردے اوہ وی دوروں ایہناں دا درشن کریندے ہن۔ آپنی کرت نوں کوئی ہو راي
وڈیری اچیری ہستی من کے اوہدے کولوں جھکدے تر۔ نہدے ہن۔ شاہی میستاں وچ
خلقت دا رب اگے نیوں باتشاہی رعب دی حضوری کولوں وکھرا نہیں کیتا جا سکدا۔
شاہی میت رب دا گھر گھٹ ہوندى ہے تے رب دے پر چھانویں دا گھر ودھیرے۔

شای محل ماڑیاں ہار شاہی گئیاں دے دھرپد تے خیال وی بندے لوکائی دی
ہزاراں ورہیاں دی کھید سکت دا صدقہ نیں۔ پر درباری پیش کاری وچ اوہ آپنے
ایں پچھو کڑ کولوں لڑ چھڈا کے شاہی گئی دے گھرانے دی اوہدے شاہی مرتبے دی دین
بن نکھدے نیں۔ خلقت نہ اوہناں نوں سُن سکدی اے نہ سنبھال سکدی اے۔ اوہ
نرے باتشاہ تے باتشاہی امیراں جوگے ہن۔ جیہناں نوں حاکم ڈھاٹیاں دے نیڑے
ڈھک دی تانگھ ہے اوہ شاہی ادب آداب دے نال درباری سنگیت سُنن سلاہون دا
سچ سکھنا وی ضروری سمجھدے ہن۔ سو شاہی گئیاں دا آدر ایں پاروں وی ہے جو
شاہی رہتل دے اک اچھے انگ دا علم نرا اوہناں کولوں ای مل سکدا ہے۔ ایہو گل
شاہی مورت کاراں تے شاعراں دے آدر پچھے وی ہوندى آہی۔

شاہی گئیاں مالکاں دے نیکے دے پر چھانویں نال آپنا ٹکا بٹاوتا۔ درباری درجے
دی بھونال آپنی میں نوں نت جھٹا۔ کسب تے ہوندا ای وکھاوا ہا۔ آپنی ہستی وی
وکھاوا بن جانی۔ اوہناں آپ آپنی ہستی دے پیش کار رہ جانا، ہر ویلے آپنی ہوندا

آپنی موئی کھيڈ سکت مڑ جیوں پئی ہے۔ پر کنیزاں رکھیاں بھانے شاہی نوکری کھيڈ نہ آہی کم آہا۔ باتشاہ لوکاں نوں کھڈاؤں داکم۔ نویاں زروالاں ایس شاہی کھيڈ دی وارثی سا لبھن واسے چکھیاں ول مونہہ کیتا۔ چکلے والیاں نویاں باتشاہواں نوں پرانی باتشاہی کھيڈ دا سواد چکھاؤں کیتے پرانے گھرانے وال استادان کولوں سکھائی لیٹی ضروری جاتی۔ سو باتشاہی وارے والا نوکر کھڈاویاں دانوکر کھڈاویاں نال پرائساک زروالاں دے وارے مڑ جڑیا۔ رنگ محلاں دی ادھی وارثی تھیٹراں تے سنگیت ہالاں نوں ملی تے ادھی کسی کوٹھیاں نوں۔

نویں مالک باتشاہی ہیستریے دھارن دے باتشاہی کھيڈ دا سواد چکھن دے چاہوان تے ضرور آہے۔ پر ایہناں دی کھٹی باتشاہی والی کھٹی نہ آہی۔ ایہہ باتشاہواں ہار دھگائے یاں ریت دا پڑدہ پا کے واہکاں کامیاں دی کمائی نہیں سن اگر اہوندے۔ ایہناں ایہہ کیتا بنی کامیاں نوں فیکٹریاں وچ کم تے لایا تے اوہناں کولوں ون سونیاں وستاں بنوایاں پر کامیاں نوں دیہاڑی محنت ساویں نہ دے کے وستاں دی لاگت گھٹالیتی۔ تے وستاں لاہے سرویچ کے ماری دیہاڑی داخل آپ وٹ لیتا۔ ایہو مریچی دیہاڑی ایہو لاہا جڑ جڑ کے زروالاں دی موڑی بنی۔ تے ایسے موڑی نال 'محنتیاں دیاں دیہاڑیاں مار کے جوڑے مال نال اوہناں ہور کر خانے لائے' وپار ودھائے تے ودھیرے کامیاں نوں کم تے لا کے ودھیرے اوہناں دی محنت ماری تے آپنی موڑی دونیوں چونی کیتی۔ پرانی باتشاہی وی ٹھگی آہی تے نواں زروال دیہاروی ٹھگی۔ پر نویں ٹھگی دا رنگ نواں آہا۔ ایہدے وچ پرانے ریتل لحاظ ملاحظے جوگی بہوں تھاں نہ آہی۔ کسی گاؤں و جاؤں والیاں نوں وی ایس گل دی سار آہی۔ سو اوہناں وی پرائیاں باتشاہی ہیستریاں نوں وپیچا نویں کاروباری سچ نال۔ پرائیاں ادب اداہاں کچھے اوہناں نوں اک چنڈی ہوئی کاروباری بے لحاظی کھلیارنی پئی۔ اوہناں دے ورتارے وچ اچیت ای اک دوہر اک بے پر تیتی رل گئی۔ کھيڈ کم چروکئی بن چکی آہی ہُن کم ٹھگاں دے ڈھائے چڑھ کے ٹھگی بن گیا۔

جتنی سنگیت دی گاکھی ودھی اوتنی ای گھرانے وال سنگیت کاراں نوں شریکے دی چنتا چنبرڈی گئی تے اوہناں دا سبھا سوڑا ہوندا گیا۔ کسب نوں بھیٹ بنان دی جاچ تے اوہناں نوں پرانی آہی ہُن جتنی مانگ ودھی اوتنا ای اوہناں ہتھ گھٹیا۔

والیاں تے سکھلاون والیاں وچ اک عجب کھچ تان دا ورتار اُڑیا۔ کسبی جنانی نے کدیں تے سوچنا بی جس بھاء وی اُستاد کولوں رکھیا جڑے گھنوں۔ پر نال ایسہ وی سوچنا بی گھٹ گھٹ خرچہ کر کے ودھ توں ودھ لاہا کھچو۔ استاد ہوراں نوں ایسہ وی دھیان ہوتا بی میرا رزق ایہدی گا کئی نال بدھا پیا ہے تے گا کئی ایہدی تاں ودھئی اے جے میں ایہنوں دلوں و جھوں سکھاواں۔ پر نال ایسہ چتا وی ہوئی بی جے ایسہ سکھ ای گئی تاں متے میرے اثر وں باہری ہو ونجے تے ایہنوں میری لوڑ ای نہ رہوے۔ ایہنوں دسو پورا ای تے سیوا جتنی گھن سکھ گھنوں۔ سکھن والی نے استاد نوں علم دا بھنڈار سمجھ کے سرتے وی بہا وٹا پر آپنا لاگی جان کے جتی تے وی لکھنا۔ ریکارڈ کپنیاں فلماں تھیٹراں وچ وی کسبی گنیاں تے مالکاں وچکار ایہو جیسی کاروباری کھچو تان نت پئی چلی۔ (ایس کھچو تان دا نواں رنگ ریڈیو ٹیلی ویژن دیاں لاکڑیاں تے ”آرٹسٹاں“ دی واہ ورتن وچ دسا ہے۔ لاکڑی قوالاں وچ پیر ہوندا اے۔ گاؤں والیاں وچ نواب تے گاؤں والیاں وچ مہاپنڈت وی تے تھیٹرا مالک سیٹھ وی)۔

بات شاہی نوکری وچ جڑے سنگیت کار خلقت کولوں اوتنے ای پروکھے سن جتنے اوہناں دے مالک۔ بات شاہ لئی خلقت نوں ایسہ وکھالنا ضروری ہائی میرا زور، میری دولت تہاڈی کمائی صدقہ نہیں۔ ایسہ ربی دات اے جیہڑی میری ذات اُتے میرے گھرانے دی ریت راہیں اُتری ہے۔ ہاں تہاڈی کمائی، تہاڈی ہوند میری ذات دا میرے گھرانے دی ریت دا سر صدقہ ضرور ہے۔ شاہی سنگیت کار وی سمجھدے بی عامان دا سنگیت ساڈے سنگیت دا سوما نہیں۔ سگوں ساڈی ریت دا سر صدقہ ہے۔ ساڈی کیتی دا بھور چور ہے۔ اوہدی وگڑی پنڈوری شکل دا ہے۔ عامان نال اوہناں دا ساک اچیتا ہا۔ آپنی قید تے باندھ دی رٹک راہیں۔ ایسہ رٹک چیتے دیاں ہنیریاں پر تاں وچ دینی خواب خیال وچ شاہی گنیاں نوں آپنے گواچے ازاد اصلے دے جھولے وکھاوندی سی تے اوہناں دی کرت نوں عامان دے ہڈور تے ڈکھ سکھ دی جاگ لاوندی سی۔ نوکری دی گجھی سوڑ اوہناں نوں خلقت اُتے ورتیندے کھلے دھرو نال جڑیندی سی۔ پر ایسہ جڑت آہی اچیت۔ نوکری پال سنگیت کاراں نہ کدے ایہنوں گولیا تے نہ خلقت نال آپنا ساک سجاتا۔

خلقت وی واریاں بدھی واج دی کھیڈ نوں کھل دا جھوٹا کر کے کھیڈ دی آئی ہے۔ پر آپنی کھیڈ سکت نال خلقت دا ساک وی ودھیرے اچیت ای رہیا ہے۔ سچیت

ہوندا وی کیویں۔ کھیڈ سکت نوں سنجائن دا مطلب ہاکم کار دی باندھ نوں کم کار دے
 وجوگ نوں سنجائنا۔ جیہدے پاروں، جیہدے وچوں کھیڈ سکت وکھری ہو نکلی۔ ایہدا
 مطلب ہا اپنی کھیڈلی ہستی نوں اصل ہستی منن۔ باندھلی ہستی توں تاہر ہو و نجن۔ دھرو
 نوں جرن توں انکاری ہو و نجن۔ دھگائے ویہار نوں اُتھلیوں باجھ جیون نوں موت
 سمجھن۔ واج دی کھیڈ نوں رانجھے دی و بھل بٹاون دا مطلب ہا تخت ہزارے نوں
 چھڈن، و بھل نوں رانجھیاں سیالاں کھیریاں نال نکھیردا ہو کا بٹاون، ہیر نال اک
 ہوون دا وسیلہ بٹاون۔ پر اک تے ایسہ سنجان آہی اوکھی تے ڈراونی دوجے مالکی
 والیاں ایس سنجان دا راہ مارن دارٹل وی ٹھکواں لایا۔ اوہناں خلقت نوں سمجھایا۔
 بنی جے اسیں تہاڈے کم دا مل پاسکے ہاں تے تہاڈی کھیڈ دا مل نہیں پاسکدے؟ تیس
 ساڈیاں حویلیاں داریاں وچ بہہ کے کھیڈو۔ ساڈیاں درباراں وچ ججو۔ ساڈے
 ریڈیو ٹیلی ویژن تے جگو۔ اسیں تہاڈی واج نوں ریکاڈاں کیسٹاں وچ بھر کے تہانوں
 مال مشہوری وٹ دینے ہاں۔ تہاڈیاں سازاں نوں موتیاں نال بھر دینے ہاں۔ تیس
 پمھاں نوں ماوے لا کے ست گزیاں بناری پگاں بنھ کے پالکیاں وچ بیٹھو۔ سرکاری
 تمنے لا کے سرکاری خرچ تے باہریاں ملکاں دے دورے کرواتے اوتھے آپنی گا مکی بٹاؤ
 تے ڈال رکھاؤ۔

مالکی والے کامیاں دی کھیڈ سکت دا مل پاسکے اوہناں دی سوچنی نوں آپنے ورگا
 کر لیندے نیں۔ اوہناں نوں دسدے نیں بنی ایسہ کوئی کھیڈ نہیں ایسہ کم ہے۔
 تیس گنی او فنکار او آرٹسٹ او۔ گن فن آرٹ تہاڈی آپنی کاڈھ کرنی ہے کمائی ہے۔
 تیس ایہدے مالک او۔ مالکی ہوندی اے دو جیاں توں سوکھیرا تے اچیرا ہوون لئی۔
 مالکی مال تے حاکی دیندی اے۔ مال سوکھیرا کریندا ہے تے حاکی اچیرا کریندی ہے۔
 مال حاکی نوں تھمدا ہے تے حاکی مال نوں۔ گاؤں و جاؤں والے نوں حاکی دا چو نگھا
 ملدا ہے مشہوری دے لارے راہیں۔ مشہوری اک انگ دی حاکی ہے۔ ایسہ کسب
 دے مالک نوں دو جیاں بندیاں کولوں اچیرا کریندی ہے۔ دو جیاں نوں کسب دے مالک
 اگے آپنی بے مالکی وکھاوندی ہے۔ اوہدے ہوون اگے آپنا نہ ہوون۔ دوجے اوہدے
 اگے نیوندے وی ہن تے اوہدے کولوں کھاروی کھاندے ہن۔

پر انیاں باتشاہواں، بھوکین وال رئیسوں گاؤں و جاؤں والیاں نوں گنی آکھ کے
 مجلس بہا لیا۔ نویں زروال حاکم اوہناں نوں فنکار تے آرٹسٹ آکھ کے بزاریں بہا

و پجدے نیں۔ اگے باتشاہ دی مرضی نال مال مشہوری ڈھیندی آہی ہُن بزار دی
گا کی نال۔ مال مشہوری لین والا جیہناں توں اُچیرا ہووَن لوڑ دا ہے پہلوں اوہناں
اگے نیو ندا ہے۔ بزارے بیٹھا اوہناں دے پھیرے نوں سکدا ہے۔

اجو کے زروال حاکماں کامیاں دی کھیڈ سکت نوں کسب بٹا کے، فنکاراں تے
آرٹسٹاں دی رملکھ بٹا کے بزارے تے چاہایا ہے۔ پر آپنی ایس کر توت نوں سگواں
انج و۔ مکھن وکھاوَن اوہناں نوں وارا نہیں کھاندا سو اوہناں دے سیائے آپٹیاں
کتاباں وچ سنگیت دی وار نہیں پھولدے۔ وکھ واریاں وچ وکھ وکھ میلاں دی
سنگیت ورتوں نہیں جاچدے۔ بس ایہو آکھدے نیں۔ بنی سنگیت روح دی غذا ہے۔
چچھو کیہدی روح تے کیہدی غذا۔ بعضے ایس سودے نوں چکھنوں پہلاں ایہدا حرام
حلال پندے نیں۔ ایہدے وچوں ہندو مسلمان پانی وکھو وکھرا کریندے نیں۔ بعضے
نیارے گاوَن و جاوَن دیاں وکھ وکھ ڈھنگاں نوں وسیب دی وار توں اڈ کر کے ایہناں
وچ سدویں معرفتی رمزاں پڑھدے نیں۔ خیال نوں مسلمان اُج دس کے ایہنوں
اُتلے دھڑ دی کرنی آکھدے نیں تے دھرپد نوں ہندو اُج من کے بیٹھلے دھڑ دا پھل۔
(ایس جھگڑے وچ بیٹھلا دھڑ اصلوں و نجاوَن تے راضی جاچدے نیں)۔ ایہو جسے
سیائے پرائیاں سلطاناں امیراں دیاں قلعیاں باگاں محلاں دی ستر وچ وی تصوف
دیاں رمزاں بھالدے نہیں تھکدے۔ ایہہ نہیں سوچیندے بنی سلطاناں امیراں دے
ٹھلے گنبد تے اُچے منارے پہلوں اوہناں دے زور دا، لوکاں اُتے اوہناں دے دا بے
دا نشان ہن تے وت کجھ ہووَر۔ شاہی محل ماڑیاں دی ستر وچ جو رمزاں وی
آیاں جتھوں وی آیاں اوہ اوڑک باتشاہی دیاں لوڑاں دے لیکھے لگیاں۔ اج
آپنے شاہی پچھو کڑ کولوں ٹٹ کے ایہہ محل ماڑیاں ساڈے لئی اک نویں لکھت تھی
گئیاں نیں۔ اج اسیں ایہناں وچ ہنر دے الوکار وی ویکھ سکے ہاں تے ایہہ وی
ویکھ سکے ہاں جو ہنر واناں دا ہنر کیہڑے کیہڑے ڈھب نال باتشاہی دی خدمت وچ
جُتا۔ اسیں ایہہ وی ویکھ سکے ہاں جو اجو کے حاکم ایہناں محل ماڑیاں کولوں آپنی حاکی
جو گا کیہہ کم پئے رکھندے نیں۔

ہنر واناں دی کرت وچ رمزاں بھرنیدی اے ساڈی ویکھتی تے ویکھتی نوں
و۔ تردا ہے ویاہر نال ساڈا ساک۔ کرتاں وچ معنے جاگدے ہن اوہناں دی ورتوں
نال۔ کون ورتدا ہے تے کیویں۔ ورتوں ہر میل دی آئے لاہے سر ہوندی ہے۔ اج

جیہڑے میل و سب وچ بھار و نیں اوہ گاؤں و جاؤں دے ہر نویں پرانے دیسی پر دیسی
 ڈھنگ نوں پئے ہنڈیندے ورتیندے نیں۔ واہکاں کامیاں دے چمے جوڑیاں ڈھول
 و نبھلیاں ریڈیو نیلیویشن توں اشتہاراں دے کھوہ گیز کے سیٹھاں تے ملٹی نیشنل دے
 کاروبار نوں پانی پئے لاوندے نیں۔ گھرانے وال استاد بچے رنگ برنگیاں پوشاکاں
 پن کے شوقیناں نوں درباری پیش کاری دی جس پئے چکھاوندے ہن۔ نابراں
 عاشقاں دیاں قوالیاں اُتے مراں ٹھیکیداراں سمگراں تے وڈھی خوراں دیاں نوٹاں
 دامنہ ورحدا ہے۔ جیہڑے اک دوجے دیاں سراں تے ساوے پٹکے بنھ کے اک
 دوجے توں ویلاں وار کے پیر فقیر دے ناں دیاں تھدیاں اُچھال کے نالے خلقت دی
 سلاہنا کھڈے نیں تے نالے آپنیاں بھائی والیاں پکیاں کریندے نیں۔ رجیاں
 میلاں دے نویں پوچ گھر گھرا مرکی میوزک گروپ جوڑ کے امریکی کاٹ دے کپڑے
 وال جُتیاں تے چمھاں لاء کے جگ دیاں حاکماں وچ رلدے نیں۔

جد وکام غلامی بٹیا، کھیڈ ای ہے جس کامیاں نوں کھل دا قدر چھلن نہ دتا۔
 اوہناں نوں آپنے ست دا آپی سر جنہار ہستی دا پک کرائی رکھیا تے اوہناں دی کنڈ نہ
 لگن دتی۔ سو کھیڈ سکت ای ویر سکت ہے۔ مالکی وال مڈھوں ای ایس گل ولوں
 او سلسلے نہیں۔ اوہناں چیت اچیت کامیاں دی کھیڈ نوں کسب بناون دا آپی نوکری وچ
 لے کے اوہدا رنگ وٹاؤں دارٹل لایا ہے۔ کامیاں دی رہندی کھوہندی و پھل نوں
 آپنے ہتھ لیں دا آہر کیتا ہے بی تیس آپ کھیڈن دی کھیل کاہنوں کریندے ہو۔
 ایس ہر رنگ دی مہنگی کھیڈ کھیڈی کھڈائی تہانوں وکھا دینے ہاں۔ تیس اندر بیٹھے
 لے پئے جلوے لتوتے ساڈے ویاہار نوں سیساں دیو۔ پر کھیڈ سکت مردی نہیں۔
 سوایاں سوں تے جاندی اے۔ جگایاں جاگ وی پوندی اے۔

گاؤں و جاؤں دے سبھ ڈھنگ کامیاں دی کھیڈ سکت نے سر بے نیں۔ گل ہے
 ایہناں نوں مالکی والاں دی قیدوں چھڈاؤں دی۔ ایہناں توں مالکی والاں دی
 ورتوں دا پرچھاواں لاہون دی۔ ایہناں نوں کسوں مڑ کھیڈ بٹاؤں دی۔ جیہنوں جٹی
 کھٹی مڑ کھیڈے تے مڑ سر بے۔ اک گل پکی اے بی ہُن کامیاں دی کھیڈ سکت
 تاہیوں اوہناں دے ہتھ و س رہ سکدی اے جے اوہ ہر دم سچیت رہن بی ساڈی کھیڈ
 سکت مالکی والیاں دی غلامی دا توڑاے۔ ایہہ ساڈی ویر سکت اے۔

اک گل لوک راس بارے

لوک تھیٹر دی ریت چروکی اے۔ تھیٹرنوں راس آکھدے سن۔ پر نہیں ایسہ گل ٹھیک نہیں۔ راس اتھاواں لفظ ہا پرائے۔ تھیٹر لفظ انگریزاں نال آیا۔ تھیٹر دے ناں تے جو کجھ ٹریا اوہ وی انگریزاں دے آون پاروں ٹریا۔ تھیٹر لفظ زرا لفظ نہ آہا۔ ایسہ نشان آہا انگریزاں دے دا بے دا، ہاریاں دلاں وچ جتیاں ہویاں دی ریت دی موہ دا۔ (کوئی لفظ وی زرا لفظ نہیں ہوندا) چلو ایسے تھیٹر دی تھانویں راس لفظ رکھنے آں تے مڑ مڈھ توں گل ٹورنے آں۔ (انج ایسہ وی ٹھیک نہیں گل کدیں وی مڑ کے مڈھ توں نہیں ٹوری جا سکدی۔)

لوک راس دی ریت چروکی اے۔ لوک راس دیاں ترے موٹیاں ونگیاں سن اک تے اکھواندی ای راس آہی، اک وار تے اک نقل۔ راس وچ لوک جاتے قہے کھیدے جاوے۔ راس دھاریاں ویکھنہاراں نال رل کے قہے نوں نویاں کرنا۔ لوک جاتے پاتراں ویکھنہاراں وچ لہ کے اوہناں نوں ٹہننا۔ اوہناں نوں آپنی ہڈورتی سمجھن دا آپنی ہستی پچھانن دا راہ دشنا۔

وار تاریخ دا راس آہا۔ (وار لفظ تاریخ واسطے ای ورتیندا ہا۔ ایسے وی اکوں تاریخ واسطے ایہو لفظ ورت کے نہ ویکھیے)۔ واریاں لوک جاتے بھیڑاں دھاویاں دی کہانی لوکاں اگے دھرنی۔ اجو کی سُر ت نوں واریاں سمجھاوئیاں نال دیا ہونا۔ وار دیاں پچھاں نوں اج واپری ساہمنے کرنا۔ لوک نوں آپنے کچ پک دی سنبھال کراوئی، آپنی کرن جرن دی ستیا دا مومنہ وکھاوئا۔

وار والیاں کہانی بول کے شاوئی وی، وچ وچ کھیدنی وی تے گاؤئی وی۔ سینٹراں وار نوں بولاں راہیں وی پچھاننا سینتاں پیستریاں راہیں وی تے سُر راہیں وی۔ انج سینٹراں دا آپنی ہستی دیاں کیاں اچیت سچیت پر تاں نال سانگا جڑنا۔ اوہناں دے اندر کیس سستیاں کلاں جاگتیاں۔ اوہناں کل اج تے بھلک دی جڑت ویکھنی۔ جڑیاں ہویاں دے پاڑا تے پاڈیاں دے جوڑ بھالے۔

نقل دا سبھا اتوں تے زرا ہا سے ٹھنھے والا ہوندا ہا پر ایسہ ہا سا ٹھٹھا رچھ ہا وسیب دی ورتن نوں پرچولن دا۔ نقلیاں ہا سے بھالے چودھریاں سرکاری اہلکاراں

ساہوکاراں و پاریاں پیراں پنڈتاں تے ملوانیاں دی پت لاہونی تے سیتراں نکلوراں
نال کامیاں کمیاں نوں ساودان کرنا۔

لوک راس والے کھاندے تے چودھریاں تے مالکاں دا دتا ای آہے پر ریت
نے اوہناں نوں گل آکھن تے ٹوک کرن دی کھل دتی ہوئی سی۔ نقلیا آپوں
صلوں ہیٹا تے نماٹا ہوندا ہا۔ اوہدا آپنا کوئی دعوا ہا نہ کوئی ویسی ہستی۔ نقلیے دا
کسب آپنا کے اوہ ویسب دی گنت گوچروں ای باہر ہو ویندا ہا۔ ایس پاروں اوہدی
گل کے نوں پھدی نہ آہی، چھبے وی تاں ظاہر کوئی نہ کریندا ہا۔ ویاہ پرناہ اُتے
برادریاں شریکے ڈھکنے۔ کیاں رنگاں دے باریک جوڑاں دے اکھرن دا ڈر
ہوٹا۔ موٹیاں سامیاں نوں آپو وچ بھجن رسن دی ڈاڈھی لوڑ ہوئی۔ اوتھے نقلیے دی
نوک اوہناں نوں رل کے آسن دی تے اک دوجے ساہویں نسل ہوون دی ویل
دینی۔ ایس ویل نوں سوجھوان نقلیے آپنی ویل بنا ورتدے آہے تے اوہ کجھ آکھ
جاندا آہے جیہڑا عام ویلے کوئی سوچدا وی جھکے۔

لوک راس دا پڑ پر بندھ اصلوں سادہ مرادا ہوندا آہا۔ اکھ داریاں وچ
ہوونے۔ ویکھناراں گول پڑ بنا کے دوالے بہہ جانا تے اک پاسیوں کھڈاراں جوگا
راہ چھڈ دیونا۔ اوس پاسے منجی دا اوہلا کر کے کھڈاراں آپنا نک سک چا دھرناتے
پڑ وچ آلہنا۔ مثال دی لوہونی، نہ کوئی پڑدا نہ کوئی سٹیج اڈمیر۔ رمزاں سیتراں
راہیں ڈٹھیاں اڈٹھیاں سبھ سیساں سرنیاں۔ پڑ وچ دو لیکاں لا کے دریا بن دینا تے
منجی اوہلے کھلوتی سوانی محل دے جھروکیوں جھاکنہ۔ رمز سیتراں لوکائی دا وڈا ہتھیار
آہا۔ ایہدے راہیں لوکاں دی سوچ آپ پرے تھیوندی تے نرودی آہی۔ ہولیاں
سینتاں نال بھاریاں گلاں اک دوجے تائیں چُجا کے لوکاں دی آپو وچ گوڑھ
ودھدی آہی سانجھ اُتے وساہ ودھدا ہا۔ پنڈ واساں نوں رمز روپ وچ گل کرن
دی جاچ تاں پرائی آہی۔ رت، ویلے، بھونیں تے پشو پکھو نال واہ نے اوہناں نوں
رمزاں گھرن تے سمجھن دا دل سکھایا آہا۔ نالے اک رچھ نال ون سونے کم سارے
پوندے ہانیں۔ ایس پاروں اوہ چیزاں دی ٹھکی بدھی ہستی دا لحاظ نہ آہے
کریندے۔ جیہڑے پگ نوں لج بنا کے کھوہے لکا سکدے سن ریک دا دریا تے
کھاری دا رتبہ بناون وچ اوہناں نوں کاہدی روک آہی۔

تیس آکھو ایسہ کیہڑے نوری وسیب دی گل اے جتھے راس والے انج
لوکائی نال اک رک لوکائی دی سیوا وچ جُٹے پئے آہن۔ وسیب تے نوری کوئی وی
نہیں ہویا۔ ہاں دوروں و۔ مکھن گلیاں کجھ نورا (یاں دھند دا) دا چھڑکاء ہوا
جاندا اے پر جیہڑے وسیب دی ایسہ گل اے اوہ ساتھوں بہوں ڈراڈا وی نہیں۔
سگوں اجے ادھا پورا ساڈے وچ جیوندا اے۔ یاں اسیں ادھے پورے اوہدے
وچ پئے جیونے آں۔ ایسہ وسیب اے جیہدے وچ زمیندار میل پردھان ہا۔ پنڈ
تھاں وچ بھونیں والاں دی چودھر آہی تے ہور کسی آہری اوہناں دے چاکر
آہے۔ کمی کما کیرا لفظ کم توں نکلے سن پر زمیندارے وسیب وچ ایہناں دے معنے
نوکریاں گولے دے ہو گئے۔ ایہناں لفظاں نوں بیستادی بو چھبڑ گئی۔ کرن غلامی
دا نشان ہو گیا۔ تے بہہ کے کھاؤن والے ملوک تے اشراف گئے گئے۔ تاں جو کرن
والا آہنی کیتی نوں رنت ہیٹا ای سمجھے تے کتے اوہدا مل پوان نہ کھلو جاوے۔
زمیندارے وسیب دا دیہار ہا سیپ۔ کمی نے مالکاں دی لوڑ سر اوہناں نوں
لوڑیندیاں وستاں گھڑ دینیاں تے مالکاں واڈھی تے متھے دانے اوہنوں تول دینے۔
کمی نوں دینہ دیہار تے لاگ وی ڈھیٹا۔ ہاتے ایسہ وٹاندر پر سیپ دی ورتن
وچ مالکی دے بھار پاروں ایہدا روپ نذر تے بخشیش والا ہا۔ کم کمی دا فرض ہا پر
لاگ جمان دی خوشی، اوہدا سر صدقہ۔ کم پیڑھیو پیڑھی رُدے آہے۔ مالک دا پتر
مالک جمن تے کمی دا کمی۔ راس دھاریے نقلیے واریے وی جدی پشتی رُے
آوندے آہے۔ ڈوم جاں مرا سی اکھویندے آہے۔ اک پکھوں ایسہ لوک کیاں
وچوں وی سبھ توں پیٹے گھنٹندے آہے۔ کیوں جو ایہناں کوئی ورتن وان وست گھر
بٹا کے تے مالکاں نوں دیوٹی نہیں سی ہوندی۔ پر دوجے پاسے ایہناں ریت رسم دی
سنبھال دا کم لے کے مالکاں دے اصلوں نیڑے ہو بہن دا ڈھو وی بٹا لیا ہا۔ سو
وسیب وچ ڈوم مرا سی دی گین دولی سی۔ اوہنوں ات ہیٹا تے اصلوں نکما وی سمجھیا
جاوندا پر نال ای ویلے سر اوہدا آدر وی کیتا جاوندا۔ مالک گوچرے ڈوم مرا سی دا
اصل کم تے سی ریت دی سنبھال۔ مالک دا مالکی اتے جماندرو حق ریت پاروں ای
آہا۔ سو اوہدیاں سو پیڑھیاں نوں مالکاں سر مالک دنا تے ثبوت کرنا ڈوم مرا سی دا
کم آہا۔ نالے دینہ دیہار تے جمن پر نیون نوں رسم سگن راہیں ریت نال جوڑنا

وی۔ ڈوماں ویلے کویلے مالکاں دی تے اوہناں دیاں وڈ وڈیریاں دی سو بھا کرنی تے
 آنے بہانے اوہناں نوں وڈیا کے مالکاں دے دل وچ چودھر دے خدائی حق دا پک
 بٹھاوٹا۔ سو ڈوم مراسی آپنے کم پاروں رینچاں وچ بیچ اکھواندے سن پر ریت دے علم
 پاروں تے مالکی دے مھیتی ہوون پاروں اوہناں ولوں اک گجھا جیہا ڈروی رہندا
 ی۔ مالکاں دے دل وچ وی تے عام خلقت دے دل وچ وی۔ ایس گجھے ڈر دی
 اک ہو ر پرت وی آہی۔ ڈوم مراسی نوں ریت دی سنبھال واسطے سنگیت دا بولی دا
 تے راس دا علم وی رکھنا پوندا ہا۔ ایہناں علماں راہیں لوک ڈوم مراسی دے
 آکھے تے وسدے۔ ایہناں علماں دی اپڑ لوکاں دیاں مناں وچ دھراندر لیاں
 اچیت پرتاں تیکر آہی۔ سو لوک ڈوم مراسی نوں اک رنگ دا جادو گروی سمجھدے
 سن۔ جیہا بیچ نکما ہون دیاں وی انہن چیت ہو ر دا ہو ر ہو سکدا اے۔ اڈٹھے روپ
 وٹا سکدا اے۔ اڈٹھ نال کلام کر سکدا اے۔ سو اک پاسے ڈوم مراسی جگ ر دیا
 وسیب دی گنت گوچروں باہرا بندہ ہاتے دوجے پاسے وسیب دیاں گجھیاں اڈٹھیاں
 پرتاں نال جوڑ پاروں اوہ وسیب دے دھرو چکار ہو کھلوندا ہا۔ ڈوم مراسی نوں
 آپنے ایس ہوون نہ ہوون دی ڈاڈھی سار آہی۔ ایہہ ہوون نہ ہوون اوہدے
 رچت نوں مٹی وچ مدھولدا وی ہا پر اوہنوں اک اچرج وت تے تران وی دیندا ہا۔
 اک نو سکی سرت وی دیندا ہا۔ اوہنوں خلقت نالوں وجوگدا وی ہا پر خلقت دا اندر
 مھیتی بنا کے خلقت دے اصولوں نیڑے وی کر دیندا ہا۔ مہن ایہہ ڈوم مراسی اُتے ہا
 بھئی جے چاہوے آپنی وت نوں آپنے کسب نوں اصولوں مالکاں دے لیکھے لا کے
 مالکی دے کھڑا ای چڑھیا رہوے جے چاہوے تے خلقت نال آپنی نیڑ پالے تے
 آپنے کسب راہیں خلقت دا پکھ پورے۔

میلیاں نے راس والیاں نوں نویں راہ دکھائے۔ میلے وپار پاروں لگدے
 سن۔ میلیاں راہیں وست وٹاندرا ودھیا۔ پیسے دی ورتوں عام ہوئی۔ تے
 زمیندارے سیپ دیاں چولاں کجھ ڈھلیاں ہوئیاں۔ نقلیاں راس دھاریاں تے
 واریاں نوں نویں کھل تے دڑھتا ملی تے سیپ دی باندھ وچوں نکلن دا راہ دیا۔ کم
 دکھاوون دے ڈھو ودھے تے جدی پشتی کسب دیاں باندھاں وی ترٹیاں۔ آتھنی
 (پورا ویلا ایہو کم کرن والیاں) منڈلیاں بن گئیاں جیہناں وچ دوجیاں کمی ٹاہریاں

دے چھوہروی پو داوے دا کسب چھڈ کے آر لے۔ ایسہ منڈلیاں پورا ورہا پنڈو
پنڈ پھردیاں سن لوک سائیاں دے کے ایہناں نوں سدیندے سن۔ تے کیس کیس
راتاں رکھدے سن۔

انگریزاں دے آون نال وڈیاں شہراں وچ راک نوں راس دا رواج پیا۔
ایسہ راس تھیٹر دے نال بیٹھ ٹری۔ تھیٹر نوں انگریزاں دے دیسی وپاری بھائی
والاں تے ہتھ ٹھوکیاں پالیا۔ خاص کر پارسی سیٹھاں۔ تھیٹر وچ انگریزی ڈرامیاں
نوں اُپر لے میل دی ہندوستانی رہل دی پٹھ چاڑھ کے اُردو وچ ڈھالیا جاندا سی۔
خاص کر ٹیکسیر دیاں ڈرامیاں نوں۔ ٹیکسیر سولھویں صدی دے انت وچ ہویا
اے۔ اوس ویلے یورپ وچ پرانے جاگیردار میل دی چھاں مکن تے آگئی سی۔
وپاری میل دی چڑھل آہی۔ جاگیردار میل دی سیاسی پکڑ ڈھلی ہوون نال
جاگیرداری رہل دیاں ریتاں پریتاں دی پکڑ دی ڈھلی ہوون لگ پئی سی۔ ٹیکسیر
نے ایہو پواڑا پار کے دکھالیا۔ وسیب دے پڑ وچ لتھدیاں نویاں تراناں دا
اندرونا اُلیکیا۔ نوں بھدی ریت پریت دے رنگ دکھائے۔ اوہدا پرانی ڈھیندی
ریت پریت نال گھول کرا کے دونہاں دا ماڑ چنگ پھول کے لوکاں نوں ساودان
کیتا۔

پر پارسی تھیٹر وچ سولھویں صدی دے انگریزی راس دی پھوکی ریس آہی۔
اوہدا ست نہ آہا۔ اوہ ایس پاروں جو پارسی سیٹھاں تے انگریز دے ہو وپاری ہتھ
ٹھوکیاں نوں اپنے دیس اُتے واپرے دھرو دی سار نہ آہی۔ اوہناں دا لبھ انگریز
وپار شاہی دے لڑ لگن وچ آہا۔ اوہ اپنے دیس دا حال کیویں سہی کریندے۔ اپنے
دیس دی وار (تاریخ) تے اپنے وسیب دی ستر نوں کیویں سنبھاندے۔ تے جد
تائیں اپنے دیس دی وار دی اپنے وسیب دی ستر دی باریک سار اوہناں نوں نہ
ہوندی اوہ یورپی وار دا ٹورا رکھوں سمجھدے۔ سو اوہناں یورپی راس دی اُتلے واہ
نقل ماری۔ راساں وچ آیاں تھیاں نوں ہستلے بھا اُتاریا۔ کھڈار دے کسب نوں
اوہناں پھوکی ہستلے بازی تے واج دا سکھنا لہا چڑھا جاتا۔ سنج پر بندھ نوں
چھڑی سجاوٹ تے راس دی شاعری نوں رزی لفظ بازی تے تک واہی۔ ٹیکسیر
دے راس وچ جیہڑے وپاری میل دی سوچنی رتری سی اوہ اک اُبھرواں گھلاٹ

میل آہا۔ جیہڑا پچھو نے جاگیر و میل نال کھیر کے آچی کھل پیا گھندا ہا۔ ہندوستانی تھیٹر مگر جیہناں لوکاں دی سوچنی آہی اوہ آہے تاں وپاری پر انگریز وپاریاں دے وچولے تے انگریز وپار شاہی دی جھولی چکن وچ دیسی زمینداراں جاگیرداراں دے بھائی وال۔

تھیٹر نے لفظاں رنگاں ہیستریاں سُرّاں سازاں کپڑیاں گھنیاں دی پھوکی عیاشی دے لارے نال لوکاں نوں موہیا تے اوہناں کولوں پیسے اُگراہے۔ شہری کامیاں محبتیاں نوں پرچاون دا اپرا لاکیتا تے پاء پڑھیاں بابواں دی مت ماری۔ ٹیکسپیر دے راس وچ باتشاہواں سرداراں دیاں آپسی لڑائیاں دے پچھے وسیب دی وار (تاریخ) دا پارا اے۔ بندے دے اندرونے اُتے وسیب دی وار کیویں ورحدی اے ایسہ راس کھڈ کے دکھاندا اے۔ ویکھنہاراں نوں اپنے اندر وسدے پرانے وسیب دے ڈھین بارے اوہدیاں نیہاں دے کلر بارے سچیت کریندا اے۔ پرانے دے ممکن دا ہرکھ تاں ہوندا ای اے۔ پر ایسہ ہرکھ نویں باریک سوجھ تے جاگرتی دی لوء وچ بندے دی بندیاں نوں جاگ لاوندا اے۔ ہندوستانی تھیٹر وچ بندیاں دا لڑن مرن سبھ بناوٹی ہا۔ ویسی پاڑاں نال ایہدا واہ اصلوں ہیتلا تے اوپرا ہا۔ سو دیسی جاگیردار تے دیسی وپار ورتارے دیاں پولیاں نیہاں بارے تھیٹر نے لوکاں نوں کیہ چانن لاونا سی۔ ہاں تھیٹر دے سچاء بچا وچوں ڈھلکدی باتشاہواں امیراں تے وپاریاں دی رشک چشک لوکاں نوں سر پر موہیا۔ تے اوہناں دیاں دلاں وچ جاگیردار تے وپاری ورتارے دا آدرمان بھایا۔ حاکماں دی پر تیت لوکاں دے اندر وسائی۔

ٹیکسپیر دا انگلینڈ ہور آہا تے ہندوستانی تھیٹر دا ہندوستان ہور۔ اتھے مڈھلا بھیرا جاگیردار تے وپاری دا نہ آہا۔ مڈھلا بھیرا سی ہندوستان دیاں عام لوکاں تے انگریز وپار شاہی وچکار۔ ایس بھیرے وچ ہندوستانی وپاری تے ہندوستانی زمیندار دونویں آپو آپے رنگ وچ انگریز دے بھائی وال آہے۔ ایسہ دونویں اپنے سکھال تے اپنے لہ پاروں انگریز اگے لفے رہے۔ جے ایہناں وچوں کوئی تھوڑا بہوں آکڑیا وی تاں اوہ وکی اپنے میل لئی کچھ ودھ سوساں میں واسطے لڑ کے انگریز نوں دیوں کڈھن واسطے نہیں۔ سیٹھاں دا تھیٹر ایہناں وچولے میلاں

دا تھیٹر ہا۔ سو اوس ایہناں دا ای کچھ پوریا۔

جد سیٹھاں دا تھیٹر پنجاب دیاں شہراں وچ آن لتھا پنڈ تھانواں دے میلہ
راس نوں وی اوس پوہنا ہا۔ راس منڈلی والیاں دیاں اکھاں شہری سیٹھاں دے
تھیٹر نال ونج اڑیاں۔ اوہ وی پڑ چھڈ کے پڑ دیاں والی سٹیج تے جا چڑھے۔ اوہناں
رمزاں سیتراں نوں تجیا تے لٹکے بانے تے ہو ر سکی اڈنبر آن سیریا۔ پڑ دا
راس لوکاں دے وچ اوہناں دا بانہ بلی اوہناں دا صلاحی ہا۔ سٹیج دا تھیٹر لوکاں
کولوں ڈراڈا اوہناں سر حاکم بن کھلوتا۔ پڑ دا راس لوک پواڑیاں نوں پرچولدا۔
لوکاں نال رل کے اوہناں دے وچ ہو کے چچھاں چھڈا ہا۔ ولدے منگدا ہا۔
اوہناں نوں اپنے ہوون دا ہو سکنا دا پک کرویندا ہا۔ ڈاڈھیاں دے دا بے بیٹھ
آئی حیاتی دے وین نوں سمجھن دی ویل دیندا ہا۔ سمجھن دی جاچ دسد ا ہا۔ میلہ
تھیٹر نے لوک نوں ڈاڈھیاں دی ر ہل دا کوڑ جھلکار دے کے مناں وچ ڈاڈھیاں
دی ر ہل دی آور بہا کے ڈاڈھیاں دے دا بے نوں ڈھڈوں من لئی لوک نوں
پسمایا۔ میلہ تھیٹر نشان سی ایس گل دا جو پنجاب دی لوک ر ہل جھدے نویں وچولا
میل دی پروس ر ہل دے بھار بیٹھ پئی آوندی اے۔ لوک ر ہل دا سٹ پرانی
زمیندار ر ہل دی ریت پر تیت نال بھڑدیاں کھیندیاں بنیا سی۔ نویں وچولا میل
نال بھڑن جو گے ہتھیار ایہدے کول نہیں سن۔

پڑ دے راس وچ کھڈاراں دی تیاری تے کھیڈ دی و۔ کرو۔ مکھناراں دے
ساہنے ای تھیندی آہی۔ و۔ مکھنار نہ کھیڈ نوں جادو دا کرشمہ سمجھدے آہے نہ
کھڈکاراں نوں کسے اچرج دنیا دے و سنیک، کھڈکاراں نوں اوہ اپنے جیسے عام
بندے جائدے آہے۔ اوہ عام بندے جیڑے و سب وچ و سدیاں وی دنیا داری
وچ پورے نہیں کھجے تے اپنے وکھرپ تے ویل پاروں و سب دے ورتارے
نوں پرکھن دی سُر ت سنبھالیو نیں۔ و۔ مکھناراں نوں آس ہوندی آہی ہئی نقلے تے
آپنے کسب راہیں ساڈی واہ ورتن پرچولنی اے۔ نقلے دی سُر ت نوں اوہ اپنی
ساجھی سیانپ دا انگ جائدے آہے اوہ سیانپ جیڑی فقیراں شاعراں کول ہوندی
اے۔

میلہ تھیٹر دے تمبوکناتاں، کھڈاراں دی آوٹی بولنی، اوہناں دے جیڑے

بانے، سٹیج دی۔ ستر اوہدی سجاوٹ پڑدہ ایسہ سبھ شیس وکھاوَن والیاں نوں و۔ مکھن
 والیاں کولوں دریڈا تے اُچرا کریندیاں آہن۔ وکھاوَن مار ہُن نوں شہر واس وچولا
 میل دے لڑ لگ چکا ہا۔ اوہدی نشا تہیوں ہو سکدی سی جے اوہ وی وچولا میل
 وانگ و۔ مکھن والیاں نوں آپنی امیری دی آپنے دراڈے تے اچیرے ہوون دے
 رعب دی مار دے کے اٹھن جوگانہ چھڈے۔ شہری سیٹھ تھیٹر وانگ میلہ تھیٹر نے
 وی کوڑی ریشک پُشک راہیں خلقت دے دل وچ حاکم دھڑیاں دی پت رکھائی۔
 لوکاں دیاں اکھاں وچ حاکماں دی رہل دی موہ جگائی۔ حاکمی دا رعب جھلن
 والیاں نوں حاکم بن کے نالیدیاں اُتے رعب پاوَن دا سواد دیا۔

پرانے پڑ وچ ٹکٹ دی باندھ نہ آہی۔ منڈلی والیاں سائی تے ویل راہیں آپنا
 خرچ کماوَن۔ و۔ مکھن ہاراں جو سردا دینا۔ جیہناں کولوں نہ سرے اوہناں اتے کوئی
 بھار نہ ہونا۔ پڑیں ڈھکن وچ آپنیاں کھڈکاراں نال و۔ مکھن وکھاوَن دی سانجھ ماٹن
 وچ پیسے دی روک نہ آہی۔ ٹکٹ دی باندھ نے جیہناں نوں باہروں موڑیا اوہناں
 دیاں دلاں نوں تھیٹر ولوں اوپرایا۔ پر ایس اوپر دے اندر ای تھیٹریں چلدی کھیڈ
 دی موہ وی دھمکی۔ جس باہروں مُردیاں نوں 'تسیا' تیس خالی ہتھ او سو مینوں چکھ
 نہیں نہ سکے۔ تیس مینوں چکھ نہیں سکے سو پیسے او۔ دِلوں دماغوں وی خالی او۔
 تھیٹر نے کیسہ وکھاوَن ہا ایسہ اصل گل نہیں۔ اصل گل ایسہ ہے جو تھیٹر دا سواد
 تہاڈی جج توں باہر اے۔ سو تیس بندے دے درجیوں وانجے گئے اوہ بندے اوہ ہن
 جیہڑے ٹکٹ تار کے اندر جج گئے نیں۔ اوہر ٹکٹ تار کے اندر ججن والے چکڑ
 گھنے وچ رٹھ کے بیٹھے اڈیاں اکھاں نال رکنار کنا چر پئے اڈیکدے نیں بی سٹیج دے
 مونہ توں گھنڈتھے تے کوئی اچرج وکھالی ساڈے نال میل کرے۔ پر جد اوہ اچرج
 وکھالی ساڈے ساہنے آوندی اے تے آکھدی اے تیس میرے نال میل نہیں کر
 سکدے ایتنا ای ڈھیر اے جو میں تہانوں آپنیاں عاشقاں دی رلست وچ رکھ لیا
 اے۔ تہاڈے ایہو بھاگ نیں جو تیس ہمیش میرے تائیں ججن دی آس پئے پالو
 تے اتھے جج کے آپنا دل دماغ میرے اگے گھنے پا کے سکھ سکھنے پئے پر تو۔

جدن میلیاں وچ بجلی آئی تاں میلہ تھیٹر والیاں ون سونیاں لایٹاں تے لاؤڈ
 سپیکراں کولوں وی و۔ مکھن ہاراں توں دراڈیاں اچیریاں ہوون دا کم لیتا۔ لایٹاں دا

چکار لوکاں نوں انھیاں کریندا اے لاؤڈ سپیکراں دی واج اوہناں نوں بولیاں کریندی اے ایسہ دونویں رچھ بنے آہے مٹاؤن وکھاؤن لئی پر اتھے ورتیندے نہیں ایس واسطے جو لوکاں دے کن تے اکھاں تھیٹروچ آکے اوہناں دے نال نہ رہن۔

میلہ تھیٹروالیاں دی سوچ تے اوہناں دے نشانے میلے وچ لتھے دوجیاں وپاریاں نالوں وکھرے نہیں ہوندے۔ میلے وچ ہر وپاری دی نیت ہالیاں کامیاں کولوں ودھ توں ودھ پیسہ اگراہون دی ہوندی اے۔ ہر وپاری دوجے نال ریس تے کھار وچ بدھا ہوندا اے۔ ہر اک دی تک ایو ہوندی اے جو انبھول گاہک نوں سوچن چاہن دی ویکھل نہ دتی وئجے۔ تاں جو اوہ اصلوں بے تھوہا ہو کے مونہوں منگیا مل تارے۔ ہئی اگے گوڈیاں پر نے ڈگے تے کھسے جھاڑ کے رُدا بنے۔

لایٹاں تے لاؤڈ سپیکراں دا ایسہ کم کوئی اُچھا میلہ تھیٹروالیاں میلے دے وپاریاں دا ای نہیں پورے زروال ورتارے وچ لوء کولوں انھیاں کرن تے واج کولوں ڈوریاں کرن دا کم لیتا جاندا اے۔ شہراں وچ وستاں ایویں ای وکیندیاں ہن۔ اشتہار بازی لفظاں راہیں مت مارن دا واج راہیں بولیاں کرن دا رنگاں مورتاں راہیں انھیاں کرن دا ناں اے۔ زروال ورتارے دے آگو جلیساں وچ لفظاں ہسٹریاں راہیں سٹیج سجاوٹ راہیں تے لاؤڈ سپیکراں راہیں ایو کم کریندے نہیں۔ اوہ وی لوکاں دی سوچ نوں گھنڈیاں کیتیوں باجھ آپنے لبھ والا سودا لوکاں اگے نہیں ویکھ سکدے۔ سٹیج اُتے چڑھیا بندہ عام خدائی کولوں نوکھلا تھی ویندا اے۔ لاؤڈ سپیکر اوہدی واج نوں وڈیا کے بندیا کی دے وتوں باہری واج بنا دیندا اے۔ ایسہ واج سنن والے اُتے ورحدی اے تاں اوہ اپنی ہوند بھلا کے سٹیج چڑھے دُراڈے اُچیرے بندے دیاں درشناں وچ گواچ جاندا اے۔ ایسہ دراڈا بندہ اوہنوں آپنا ویری نہیں جاپدا سگوں آپوں حاکم بنن دے سپنے دا بے وسی تے نمائپ کولوں چھٹکارے دا نشان جاپدا اے۔ حاکم دھڑیاں نوں خلقت دی ایس مجبوری دی ڈاڈھی سار ہوندی اے۔ سو اوہناں دے موہری ہر ویلے مونہ سوار کے نویں سو نویں مھونے لا کے ریڈیوئی وی اخباراں رسالیاں وچ پنے پسر دے

نیں۔ اوہناں نوں تروہ ہوندا اے جے اک پل وی ساڈی واج عام واج جیسی ہوتی
ساڈا قد کاٹھ عام بندے ساواں تھیا تاں خلقت دے دل توں ساڈا جادو لٹھا۔
اساں موئے۔

نواں لوک راس تاں اُسر سکدا اے جے اوہدی اُساری وچ سیٹھ تھیڑتے
میلہ تھیڑدی چڑھل دا پورا تے ٹھکواں توڑ ہووے۔ سیٹھ تھیڑمیلہ تھیڑتے
اوہناں دی ماں جائی فلم دی۔ ستر دی وار (تاریخ) انگریز وپار شاہی دی، اوہدیاں
وچولیاں تے گدی نشیناں دی لوکاں اُتے چڑھت دی وار اے۔ نویں وار دا جم
پرائی وار دے دھرو نوں ٹھلن راہیں ہوندا اے۔ نواں لوک راس تاں ہے نویں
وار دے آہرو وچ لوک دے جڑن دا۔ نویاں راس واناں ایس جڑت راہیں
پرائی ورتی دے دابے دی اُلی خلقت دے دل توں لاہوئی اے۔ ایسہ چوکھیاں
پر تاں والا باریک کم اے۔ لوک راس ایسہ کم تے ای سار سکدا اے جے ایس
کم وچ جُھنڈیاں اوہ آپ نواں تھیوے۔ آپنی نویں ستر پرائی دے توڑ اُتے
اُسارے۔ راس وچ نشانے ستر توں دکھ کوئی شے نہیں ہوندے۔ ستر ای نشانیاں
دی جیوندی جاگدی صورت ہوندی اے۔ جے ستر پرائی رہی تاں نشانے سر پر
پرانے رہن۔ ستر پرائی رہی تاں نواں لوک راس نواں اکھواندیاں وی کم اوہو
کرسی جیہڑا سیٹھ تھیڑتے میلہ تھیڑ کریندے آئے ہن۔ راس آپنی ستر راہیں
لوک نال گل کریندا اے۔ اوہ ستر جیہڑا مول ای ویکھنہاراں نوں حاکماں دے
تھلے لاون تے اپنے آپ کنوں وجوگن ہووے، بندے نوں اپنے آپ نال تے
دو جے نال جڑن داسدا کیویں دے سکدی اے۔

سیٹھ تھیڑتے میلہ تھیڑدی ستر دا تروڑ ایسہ نہیں جو نواں لوک راس
پرائیاں لوک راس دھاریاں نقلیاں تے واریاں دے ہنڈائے ڈھنگ مڑ ورتن
لگ پوے۔ جیون دا کوئی ہنڈیا ڈھنگ مڑ نہیں ورتج سکدا۔ اوہ جیوندیاں دے میچ
نہیں ہوندا۔ جیوندیاں پلو پل اپنے میچ دے نویں سو نویں ڈھنگ ورتے ہوندے
نیں۔ نویں لوک راس دی ستر جیہڑے وی ڈھنگ ورتے پرکھ اوہناں دی ایہو
ہو سی بی اوہ لوکاں نوں اپنے آپ نال گل کرن دا سرور تی نوں سمجھن پرکھن دا
سربندہ بنا کے دیندے نہیں کہ نہیں۔ پرائیاں نقلیاں واریاں ایسہ سربندہ اپنے

وسیب دے حساب سر بنایا۔ نویں راس نے اپنے وسیب دے حساب سر بناوٹا
اے۔

راس پرانا اِتھاواں لفظ اے۔ تھیٹر نے ایہنوں ورتوں وچوں کڈھ کے
ایہدی تھاں ملی۔ ہُن جے راس نے تھیٹرنوں ورتوں وچوں کڈھ کے مُڑ آئی تھاں
تے آوٹا اے تاں اک نواں لفظ بن کے آوٹا اے۔ نویں وار دا نشان تھی کے۔
نویں وار دا ہتھیار تھی کے۔ کیوں جو لفظ رزے لفظ نہیں ہوندے۔

اکھیاں دا ہوون نہ ہوون

”اکھیاں“ کھیڈ وچ پہلی گل تے ہے اکھیاں دا ہوون نہ ہوون۔ ویکھن نہ ویکھن پر ایسہ پہلی گل سا بنجھی کیوں کریے۔ ”اکھیاں“ دی کتاب تے چھپی کوئی نہیں۔ جیہڑی ساہنے رکھ ہوئیے۔ ورلے ای ہوسن کوئی پچھلی پڑھی دے جیہناں ریڈیو توں ”اکھیاں“ سنی تے ٹانویں ای اوہ ہوسن جیہناں پچھے جسے لہور دے اک کھالے گھروچ پنجاب لوک راس دی کھیڈی ”اکھیاں“ ویکھی۔ چلو کھالے گھروچ ای سہی لوک راس والیاں ”اکھیاں“ کھیڈ کے ساڈے لئی ایس کھیڈنوں وچارن دا ڈھوتے بنایا توڑے کھالیاں گھراں وچ کھیڈیاں کھیڈاں دا وچارن ہو رہا اے تے خلقت دے وچ کھلو کے کھیڈیاں دا ہو رہا۔ اکھیاں دی کتاب چھپی کوئی نہیں تے پنجاب ورھے ہون لگے نیں ایہنوں لکھیاں۔ ایس گل پچھے وی اکھیاں دا ہوون نہ ہوون اے“ ویکھن نہ ویکھن۔ اوہ تے بھلا ہووے ”لہراں“ والے دا جینے اپریل 81 وچ رفیع پیر نمبر کڈھیا تے وچ ”اکھیاں“ وی چا چھاپی۔ پر اوہ پرچہ وی تہانوں ہن کتھوں لبھنا اے۔ چلو کھیڈ دا خلاصہ ای کرویکھئے۔ آج کھیڈاں تے کھیڈن لئی ہونڈیاں نیں خلاصے کرن لئی تے نہیں نہ ہونڈیاں پھیر خلاصے وی بھیلو بھلی ہونڈے ہوئے۔ اک دا اکتا ہو رہا دو جے دا ہو رہا۔ جیہڑی گل اک نے کڈھ دتی ہو سکدا اے دو جے اوہا رکھنی ہووے۔ نالے خلاصیاں بارے اک پرانی بولی وی ہے متے تہاں سنی ہووے۔

چپ کر دڑ وٹ جا

نہ عشق دا کھول خلاصہ

خلاصے ہونڈے ای چپ کر اون لئی نیں۔ کھڈیاں نوں دڑ وٹاؤن لئی (تے خلاصے کھولن والیاں نال اوہو ہونڈی اے جو عشق کرن والیاں نال ہونڈی اے) یاں وٹ خلاصہ ہووے اوہ ”بیرٹا ایس بولی وچ ہو یا اے۔ آپ ای آپنے آپ نوں کھول وی جاوے تے رہوے وی خلاصہ۔ اوہ خلاصہ تے ”اکھیاں“ آپ ای اے۔

پہلی بھماکی۔ پنڈ حسن آباد۔ چودھری مولا بخش دی بھر جانی کر مودے گھر۔

چودھری کرموتے اوہدے پتر فضل نال جھگڑدا اے بنی تساں میرے پچھوں بیگم نوں
 بھاگو وال دے موجود جٹ نال کیوں ویاہ ٹوریا۔ ایس جھگڑے وچ سانوں پتہ لگدا اے
 بنی بیگم اک انھی یتیم کڑی اے۔ چودھری نے پالی اے۔ چودھری دے پتر بہادر نال
 بیگم داسکے ہوندیاں داپیاراے تے ایس گل داپورے پنڈنوں پتہ اے۔ ہاسے بھانے
 دونہاں دی کڑمائی دیاں ڈھولکیاں دی وجدیاں رہیاں نیں۔ چودھری نے لہور نوکری
 کیتی ہوئی اے تے اوہ اپنی سوانی تے دھی نوں لہور آئے کول رکھدا اے۔ بہادر
 پچھے پنڈ وچ اے سو بیگم وی پنڈ وچ ای اے پر بہادر نال کلیاں گھروچ رہنا وی اوہدا
 ٹھیک نہیں سوچو دھری اوہنوں کرمو کول چھڈ گیا ہویا اے۔ کرمو نوں زمین واسطے پیسے
 دی لوڑاے۔ اوہ بھاگو ویسے موجود جٹ دی بھین نال اپنے پتر فضل نوں ویاہ کے چنگا
 داج لینا چاہندی اے، موجود دی بھین لین لئی وئے وچ موجود نوں بیگم دا ہتھ پھڑا
 دیندی اے۔ نکاح ویلے بیگم نوں افیم گھول پیا وندے نیں تے اوہنوں ہاں نانہ دا وی
 پتہ نہیں لگدا۔ ساری کارروائی چودھری کولوں چوری ہوئی اے۔ بہادر وی رکتے
 وانڈھے گیا ہویا سی۔

دوجی جھاک پند بھاگو وال۔ بیگم دے سوہرے گھر۔ بیگم نوں آیاں دوجی رات۔
 بیگم نوں خیال اے بنی اوہدا ویاہ بہادر نال ہویا اے۔ پر اوہنوں ایسہ تھاں وی اوپری
 باپدی اے تے جتنا وی بہادر نہیں لگدا۔ بیگم اپنے نال آئی نائن نور اں کولوں جھکدی
 اے بہادر دا۔ پہلوں تے نور اں اوہنوں ولاوندی اے پر اوڑک اوہنوں اصل گل
 دس دیندی اے تے سمجھاوندی اے بنی ہن توں موجود نال سلوک بتا کے رکھ تے بہادر
 دا خیال چھڈ اوہدا رکتے ہو ویاہ ہوون لگا اے۔ بیگم ایسہ سُن کے نمو جھان ہو گئی پر مڑ
 اوس اپنے صدق دالڑ پھڑیا تے صندوق وچوں بہادر دا دتا زنجیری والا چاقو کڈھ کے
 سرہانے رکھ لیوس۔ نور اں نوں دسیوس بنی ”آہندے نیں جے راتیں چھریاں چاقو
 ل رکھ سنوئے تے ڈر نہیں لگدا“۔ مڑاوس چیتے یسا بہادر نال رل کھیند جدوں
 ونویں کدیں، نم والے ویڑھے کھوہ دی داج نال تے کدیں کھوہ دی گاہدی اُتے بہر
 کے ماہیا گاؤندے ساں۔

اوتھے اکھیاں دافرش وچھاواں جیڑے راہیں آویں ماہیا۔
 ماہیے دے بول گاؤندیاں بیگم نوں اچن چیت سہی ہوندا اے جیویں بہادر وی

اوہدے نال رل کے پیا گاؤندا اے۔

تیجی جھاکی۔ حسن آباد۔ کرمودے گھر۔ کرمو کریمے نائی نوں بھاگووال نور دی اے بنی جا کے اپنی سوانی نور اں نوں پچھانہ نور تے آپ فضل دے ویاہ دی گل پکی کر کے آ۔ کرمو پنڈوں نکلے نوں نور اں بھیجی آؤندی رملدی اے۔ دونویں کرمو دے گھر آجان دے نیں۔ نور اں دسدی اے بیگم نے ہیر پا چھڈیا اے۔ موجودی ہک وچ چاقو مار کے کدھرے ٹر گئی اے تے پس اوہنوں پئی لبھدی اے موجودیا اے بنی اوہنے بہادر وی اوس ویلے بیگم نال ڈٹھا اے۔

چوتھی جھاکی۔ اوسے شامیں۔ چودھری مولا بخش دے گھر۔ چودھری بہادر نال اوہدے ویاہ دی گل کردا اے بہادر آکھدا اے ”میاں جی جس پیردی میں بیعت کیتی ہوئی اے اوہدی مینوں حالے اجازت نہیں۔“ چودھری بہادر دا دکھ سمجھدا اے آکھدا اے ”ہلا پتر توں خوش رہو..... رب تینوں آپنیاں مراداں دے تے بھلے راہ لائے۔“ چودھری نوں ہرکھ وی اے بنی میں اپنی بے دھیانی پاروں ”تیری تے بیگم دی زندگی خوار کر چھڈی۔“ پر بہادر پو نوں تسلی دیندا اے بنی میں بیگم نوں خواب وچ ڈٹھا اے۔ اوہ خیریں مریں اے تے اوہنے آونا وی ضرور اے۔ اچراں نوں کریم ہنیا ہویا آندا اے تے آن کے بیگم دی کیتی داد سدا اے۔ چودھری کریمے نال کرمو ول ٹر جاندا اے۔ مگروں بہادر بیگم والا ماہیا گاؤندا اے تے دیوا بالدا اے تے بیگم دی واج اوہدی واج نال رلدی اے تے دیوے دی لوئے اوہنوں بیگم دسدی اے۔ بہادر بیگم نوں پچھیا بنی توں اکھوں باجھ اتھے داراہ کیوں لبھا۔ بیگم آکھیا ”راہ لبھن تھیں پہلوں میں اکھیاں لبھیاں۔“ تے بہادر نے بیگم دیاں اکھیاں نیکیاں جگدیاں سچ مچ دیاں سگیاں اونویں جیویں اوہنے خواب وچ نیکیاں آہیاں۔ دونوں ای مڑ رل بہن اُتے خوش نیں۔ آپنے قول قرار تے رُصدق دی گل کریندے نیں۔

بنجویں جھاکی۔ چودھری مولا بخش دے گھر دے سامنے ویڑے وچ۔ چودھری فضل تے تھانیدار۔ فضل تھانیدار نوں دسد اے بنی لوکاں دن ڈبن ویلے کوئی کڑی داد دے کھوہ وچ چھال مار دی ڈٹھی اے۔ بندے کھوہ وچ لٹھے، ٹوبھے وی کھوہ چھانیا پر کھوہ وچوں کچھ نہیں لبھا۔ تھانیدار چودھری نوں تسلی دیندا اے بنی بے بہادر پنڈوں باہر نہیں گیا تاں اوہنوں خیر مہراے۔ شہادتیاں کٹھیاں کر لئو۔ تھانیدار ذرا

پر انہ ہویا تے چودھری نوں بہادر تے بیگم دے ماہی دی واج کنیں پئی۔ چودھری
 نے فضل نوں وی دیا تے آکھیا توں ذرا تھانیدار نوں گلیں لاتے میں اندر چل کے
 ویکھناں بی بیگم اتھے اپڑی کج۔ چودھری گھر ول گیا تے فضل نے تھانیدار نوں دونہ
 واجاں دے گاؤں دی دس دتی۔ تھانیدار تے فضل چودھری دے مگرے اوہدے گھر
 دے بوہے اگے اپڑے۔ بوہا کھڑکایاں نہ کھلیا تے تھانیدار دھکے نال بھن کے اندر
 وڑیا۔ اندر بہادر سی۔ اوس آکھیا کوئی اگے نہ آوے۔ یاد رکھو جے کسے بیگم نوں ہتھ
 لایا۔ پر تلاشی لیاں بیگم او تھے لمبی ای کوئی نہ۔ سارے حیران نیں۔ پہلوں بہادر وی
 حیران اے پر ہولی ہولی اوہوں سار لگدی اے۔ اوہوں بیگم دا چمکدے نیں تے اوہ
 آکھدا اے۔ ”آہو مینوں اوہدا پتہ اے۔ پر تیس او تھے کدیں نہیں پہنچ سکدے۔“
 مڑ آکھدا اے ”اوہ میرے کول اے۔“ دوروں فضل نوں بیگم تے بہادر دے ہاے
 دی واج آوندی اے اوہ تھانیدار نوں لے کے باہر بھجدا اے۔ چودھری وی جکوتکی
 وچ نال جاندا اے۔ پچھوں بہادر ماہیا گاؤں دا اے تے بیگم دی واج نال رل ویندی
 اے۔ بیگم دسدی اے بی میرا ڈیرا دادو دے کھوہ اے۔ بیگم آکھدی اے اج
 ساڈے میل دی رات ساڈے سہاگ دی رات“ اے۔ بہادر آکھدا اے ہن دل
 وچ صبر نہیں رہیا۔ آہیکے چل۔ دونوں ماہیا گاؤں دے چلے جانداے نیں۔ باہر فضل
 پاگلاں ہار تھانیدار نوں بھجائی پھر دا اے بی اوہ سٹو بیگم دی واج۔ اوہ سٹو۔ پر دسدا
 کجھ وی نہیں۔

اخیرلی جھاک۔ دادو دے کھوہ تے۔ لوکاں دی بھڑا اے۔ چودھری تے تھانیدار
 او تھے چمکدے نیں پتہ لگدا اے بی بہادر سٹو آیا اے تے کھوہ وچ چھال مار گیا
 اے۔ بندہ کھوہ وچ وڑ کے بھالدا اے پیا پر کجھ نہیں لبھا۔ سبھ اچنھے وچ نیں اخیر
 چودھری تھانیدار کولوں کلیاں ہوون دی ویل منگدا اے۔ تھانیدار اوہدے نال
 افسوس کردا رُ جاندا اے۔ بندے وی ہٹ جانداے نیں۔ (اچراں نوں دس پندی
 اے بی فضل جھلا ہو گیا اے) چودھری کلا ہویا تے اوس وین پا کے کھوہ نوں الہا دتا
 ”اوئے کھوہ توں کتنا ڈونگھا ایس توں کتنا کالا ایس میرے دولال تیرے وچ ڈگ پئے
 نیں تے تیرے وچ رتی بھر چانن نہیں ہویا۔“ چودھری کھوہ نوں ”موت دیا کھوہ“
 آکھدا اے تے بہادر دی واج آوندی اے ”موت دیا نہیں میاں جی حیات دیا کھوہ

جیون جاگن دیا کھوہا" چودھری روند اے پر بہادر اوہنوں تسلی دیندا اے بی میں آپنی مراد لے لئی اے مینوں بیگم مل گئی اے۔ پر اسیں دونویں تینوں ایہناں اکھیاں نال نہیں دس سکدے۔ "ایس وا تے ہو راں اکھیاں دی لوڑ اے جدوں تہانوں اوہ اکھیاں لبھن گیاں پھیر تیں اسانوں تک لوگے۔" چودھری آکھدا اے "اسیں سمجھنے آں اسیں اکھیاں والے آں ساڈے جیہا تے انھا کوئی ہے ای نہیں۔" کھڈا تھے ممک جاندی اے بیگم تے بہادر دیاں واجاں ماہیاں گاؤندیاں الوپ ہو جاندیاں نیں۔ رچھوں لکھیاں سانوں دسد اے۔ بی "کیاں ورھیاں دے بعد چودھری مولا بخش دی خواہش پوری ہوئی اوہنوں دل دیاں اکھیاں لبھ پیاں تے اوہنے بیگم تے بہادر نوں پھیراک واری آپنی اکھیں میکیا۔" دادو دا کھوہ زیارت بن گیا اے۔ ہُن بیگم دا کھوہ اکھواندا اے۔ اوہ اپانی ات مٹھاتے خوشبو والا اے۔ اکھاں دے روگیاں دا دارو اے۔ کوریاں کڑیاں او تھے زنجیری والے چاقو چڑھاوندیاں نیں تے اوہناں دیاں مراداں پوریاں ہوندیاں نیں۔ سال وچ اک واری بیگم تے بہادر ادھی راتیں آن کے نماں دے جھنڈ تھلے بہہ کے ماہیا گاؤندے نیں۔ بعضیاں قسمت والیاں اوہناں دا ماہیا اپنے کنیں سنیا اے۔

کھڈ دا خلاصہ کھڈ نہیں۔ خلاصہ پڑھ کے کھڈ نوں سمجھنا اکھیوں باجھ ٹوہ کے راہ لبھن والی گل اے۔ بیگم وی بھاگو وال وچ پہلوں ٹوہ ٹاہ کے رُری تے مڑاؤہنوں اکھیاں لبھ گیاں۔ آو اسیں وی حیلہ کرد۔ مکھینے۔

سو اکھیاں کھڈ وچ پہلی گل تے ہے اکھیاں دا ہوون نہ ہوون۔ و۔ مکھن نہ و۔ مکھن۔

ایہہ گل پوند ای ساڈے کنیں پندی اے۔ جد چودھری فضل نال جھگڑدا اے۔ چودھری:- اوئے انھے تیں او جے اکھیاں ہوندیاں سنڈیاں تہانوں کجھ دسیا نہیں۔ اوہ اکھوں انھی نی پر اوہنوں نظریں سبھ کجھ آوند اسی۔ اوئے ظالمو تیں سمجھیا ہویا اے اوہنوں پتہ نہیں لگنا۔

فضل:- اوئے چاچا تے کیہڑا انھیر پے گیا اے جے.....

فضل تے اوہدی ماں کرمونوں اکھاں ہوندیاں دسد اکیوں نہیں۔ حسن آباد رسیاں زمینداراں دا گراں اے۔ بھوکس تے لاون واسطے کرمو کول پیسہ کوئی نہیں۔

جے بھاگو والے موجود دی بھین سیداں داساک فضل نوں مل ونجے تے داج وچ
 چوکھا گنٹا پیسہ آویسی۔ پر موجود دی بھین داساک اوتھے دینا سی رجتھوں وٹے وچ
 آپنے جوگی کڑی لبھ جاوے بھاویں انھی ہووے۔ کرمو کول آپنی تے کڑی کوئی نہیں۔
 سواوس وٹے وچ بیگم نوں موجود نال نور دتا۔ کیہ حسن آباد تے کیہ بھاگو وال۔
 بھونیں وال کیہ لے تے کیہ تگڑے۔ جتھے مل اے اوتھے غرض اے۔ جتھے غرض
 اے اوتھے ساک غرض پالن دا وسیلہ ہوندا اے۔ کڑیاں منڈے وستاں ہوندیاں نہیں
 تے وٹاندرے داکم دیندیاں نہیں۔ خاص کر کڑیاں۔ کڑیاں دی آپنی ہستی کوئی نہیں۔
 کڑیاں دے وٹاندرے وچ تھڑاں پوریاں کرن دا آہر کیتا جاندا اے۔ سفید پوشیاں
 کجیاں جاندیاں نہیں۔

کرمو:- ”ہُن سیداں گھر آجائے تے پھیر خیر مر اے گنٹا تے رُپیہ نال
 لیاوے گی۔ ساڈے وی دن پھر پین گے۔ پھیر چودھری ساڈے گھر نہ
 وڑے تے ساڈی جتی نوں۔ سیداں دا رُپیہ لے کے زمین تے لاں گے
 تے گنٹا پھیر کے ویلے کم آجائے گا۔“

کرمو لئی سیداں رُتے گنٹے دا وسیلہ اے تے بیگم سیداں نوں لیاون دا وسیلہ۔
 کرمو بیگم دی ہستی نوں اوہدے دکھ سکھ نوں نہیں دیکھ سکدی۔ اوہ کے نوں وی آپنی
 غرضوں دکھ کر کے نہیں دیکھ سکدی۔ نہ ای فضل دیکھ سکدا اے۔ سواہرے ماں پتر
 اکھاں ہوندیاں وی مناکھے نہیں۔ آتر نہیں۔ اوہ جس ویسے پئے وسدے نہیں اوتھے
 رولا ای ایہو اے۔ بی حیلے ویلے آپو آپنا بلا کرو۔ نہیں تے مارے جاسو جھننے وی
 اسانجھ مالکی دے وسیب وچ وٹنا اے اوہنوں ایہہ رولا نبھاونا پینا اے غرض پالنی پٹنی
 اے اکھاں گوانیاں ہینیاں نہیں۔ چودھری مولا بخش بھلا بندہ اے پر اوہنوں وی آپنی
 سفید پوشی رکھن لئی لہور نوکری کرنی پئی اے۔ تے اوہدی نوکری پاروں ای بیگم نوں
 کرمو دے گھر رہنا پیا اے۔ وسیب والیاں دی مجبوری دا بھار چاونا پیا اے بیگم نوں
 جیہڑی آپ آتراں دی آتر اے۔ اک انھی تے اُتوں یتیم۔ پر بیگم دا اصلوں آتر
 ہوون اوہنوں وسیب کولوں دکھ وی کریندا اے۔ اوہنوں ویہار نبھاون دی مجبوری
 نیناں پراناں والیاں کولوں گھٹ اے۔ ایہو کھل اے بیگم دی۔ ایہو ویہل اے
 اوہدی جتھے اوہ بہادر داپار پال سکدی اے۔

اکھیاں کھینڈ وچ دوجی گل:- ایسہ کھینڈ اتوں ویکھیاں آپنے آپ وچ پوری
جاپدی اے پر نہجھ لائیاں ایہدے تانے وچ لوک شاعری دی ریت دا پٹا اُنیا لبھدا
اے۔ ریت نال اک ظاہر ساک تے رفیع پیر وکھایا میس محمد صاحب دیاں شعراں
نوں سرناواں بنا کے۔ سرناویں وچ اوہ شعروی آیا اے۔

جیہناں طلب قہے دی ہو سی سُن قصہ خوش ہوسن

جیہناں جاگ عشق دی سینے جاگ سویلے روسن

کوئی قصہ وی نرا قصہ نہیں ہوندا۔ تے نہ آپنے آپ وچ پورا ہوندا اے۔ گل
ہے طلب تے جاگ دی۔ طلب (جیویں تماکو دی) جھٹ پٹ اُٹھدی اے ہا بڑا بن کے
تے بندے توں اپنی پکڑ وچ کر لیندی اے۔ مڑ جھٹ پٹ ای جھک جاندی اے تے
بندے نوں وی نال مڑکا جاندی اے۔ جاگ لگدی اے چرکی تے لگدی اے سچے۔ پر
لگ ونجے تے اصلا وٹا دیندی اے۔ طلب ہوندی اے ویہار دی دین۔ جاگ ویہار
دے دتے سبھانوں وٹاون واسطے ہوندی اے سو ایسہ او تھوں ای ملدی اے جتھے
اگلے ویہار نوں اُتھن واسطے سردھڑدی لائیتھے ہوون۔ آؤ ویکھیے اکھیاں کھینڈنوں
لوک شاعری دی ریت دی جاگ کیوں لگی اے تے کتنی کو۔

بہادر چودھری نوں خواب وچ ڈٹھیاں بیگم دیاں اکھیاں دی دسیندا اے:

”اکھیاں کھولیاں ہوئیاں تے مینوں بٹر بٹر پئی تگے تے نالے پئی مسکرائے تے

اوہ دیاں موٹیاں موٹیاں ہرنیاں والیاں اکھاں ایوں پیاں پھکن زنج تارے“

مڑ جدوں بہادر تے بیگم دامیل ہویا تے بہادر بیگم دیاں اکھیاں ویکھ کے آکھیا:

”میں سوچناں جے کدی پہلوں وی کدیں تیریاں اکھیاں ہوندیاں تے بالکل

ایسے طراں ہوندیاں، وڈیاں وڈیاں مرگاں والیاں۔“

اتھے وارث شاہ دیاں سلاہیاں ہیر دیاں اکھیاں نہیں چیتے آوندیاں؟

نین زگسی مرگ مولڑے دے

تے زری اکھیاں دی گل ای نہیں۔ بھاگو وال والی جھاک وچ جد نوراں بیگم نوں

جھکدی اے کیسہ پئی ڈھونڈنی ایں نیلے۔ تے بیگم تر بھک جاندی اے تے نوراں

آکھدی اے:

”تینوں کیسہ ہویا اے۔ میں گل کیتی اے تے توں تر بھک پئی ایں زنج رکھ دیاں

ہرنیاں تر بھک پندیاں نہیں۔“

وارث شاہ ہو ریں ہیرتے اوہدیاں سیلیاں دی آوٹی وکھاوندے نہیں:

سیاں نال لنگدی مان متی جیویں ہرنیاں تر ٹھیاں بار وچوں۔

رفع پیردے ویلے باراں وچوں کھلیاں پھرن والیاں ہرنیاں مک گئیاں ہونیاں
سن۔ ہرنیاں ہُن لبھدیاں سن رکھاں وچ ای۔ رکھ وڈیریاں بھوئیں والاں دے
ہوندے نہیں یاں سرکاری تے جیہناں دے رکھ تنہاں دیاں ہرنیاں۔ راکھویاں۔ ایسہ
نوراں دی ویکھنی اے۔ اوہ بیگم نوں راکھویں ہرنی سمجھدی اے۔ تے آپنے حساب
سر ٹھیک ای سمجھدی اے۔

دمودرنے وی ہیر نوں ہرنی آکھیا اے۔ رانجھے نوں اپنی بیڑی وچ سٹا ویکھ کے
ہیر چینگھ چھڈ کے دریا وچ چھال مرندی اے:

انہروں ترٹے وچ جویہی ہرنی چھٹی بدھی

ہرنی دی رمز راہیں بیگم ہیر نال رلدی اے۔ رکھ دی ہرنیوں بار دی ہرنی بن
کھلوندی اے۔ بیگم دی ایہودکھ اے جس بہادر نوں اچنبھا کیتا:

”سوئیاں نہیں تیریاں اکھاں۔ مینوں انج معلوم ہوندا اے رنج تیریاں اکھاں
میرے دل وچ پیاں بلدیاں نہیں۔ رنج تارے ہیری رات وچ بلدے نظریں آوندے
نیں ایسہ اکھاں مینوں کھ پیاں آکھدیاں نہیں۔ کیسہ آکھدیاں نہیں۔ میرے من دے
ہیرے گھپ وچ اک اگ رمزاں دی لاوندیاں نہیں۔ تیریاں اکھاں مینوں پیاں
سمجھاندیاں نہیں۔ کیسہ آہندیاں نہیں۔ کیسہ آہندیاں نہیں۔“

دمودر دی ہیر ہرنی انہروں لکھی وچ (بجلی) وی اے۔ بیگم اپنی قید بھن کے نکلی
اے تے اوہدیاں مرگ اکھاں بلدے تارے بن کے ولاں دیاں ہیریاں وچ رمزاں
دی اگ بالن لگ پیاں نہیں۔

ہرنی والی رمزدولی اے۔ ہرنی کھل وی اے۔ کھل دا سہن وی اے تے (ایسے
پاروں) اوہ شکاریاں دے لوبھ دی مار وچ وی اے۔ سولوک شاعری دیاں ہرنیاں ہیر
توں بیگم تائیں نمائیاں تے مجبور اں دا نشان نہیں۔ جیویں باریں کھل ماندیاں ہرنیاں
بجھ سکدیاں نہیں تیویں بدھیاں ہرنیاں چھٹ وی سکدیاں نہیں۔ سگوں بدھیاں کول
ای تران ہوندا اے جیہڑا باندھاں تروڑ کے نکلیاں لبھدا اے۔

بیگم دیاں ہیر ناں ہو روی سا بچھاں نہیں۔ ہیر نے کھڑے نوں آپنی منجی تے پیر نہیں دھرن دتا۔ بیگم موجود جٹ دی ”بتکاں ورگی واج“ سُن کے ڈر گئی۔ اوہدے ڈر نے اوہدی راکھی کیتی تے موجود اوہدے نیڑے نہ آیا۔ دمودر دی ہیر نے لت مار کے کھڑے دے دند بھن دتے سن۔ بیگم زنجیری والے چاقو ناں موجود دی ہک وچ منگھار کر گئی اے۔ کھڑے وانگ موجودی اک بے شکلا ریت گھڑیا بنداجا پدا اے۔ جیہدی آپنی کوئی ہستی نہیں۔ جیہدا زور ریت تے ویہار دا زور اے۔ جیہدے کول آپوں ساک بنن بناون دی سکت کوئی نہیں۔ وٹے دی باندھ راہیں پیسے دے لو بھ راہیں کے ماری بدھی دا گساک ای اوہنوں جڑ سکدا اے۔ بہادر دے صدق یقین تے وی رانجھے دی چھدری جیسی چھاں دسدی اے۔ ہیر رانجھے دی عاشقی والا مُرشدی رنگ اتھتھے وی ہے۔ دمودر وچ ہیر رانجھے نوں مُرشد مندی اے۔ رفیع پیر نے مُرشدی بیگم نوں دتی اے۔

بہادر:- بیگم پر اکھیاں لبھیاں کجج نہیں۔ دس تے سہی مینوں۔

بیگم:- سمجھ لے آپوں۔

بہادر:- سمجھ لے آپوں۔ اوہ کجج۔

بیگم:- بس آپوں ای رنجج میں اکھیاں لبھ لیاں باہا باہا

بہادر:- رنجج توں اکھیاں لبھ لیاں!۔ مینوں سمجھ نہیں آئی گل۔ مینوں

دس ایسے واٹے تے میرے پیر نے میں تیری بیعت کیتی ہوئی اے مینوں

دس۔

بہادر لفظاں راہیں سمجھن لوڑ دا اے پر اوہنوں سمجھ نہیں آوندی نہ ای بیگم

دسدی اے۔ اوڑک اوہ بیگم دیاں اکھیاں ویکھدا اے جتھے اوہنوں ”رمزاں دی

اگ بلدی دسدی اے۔“ مُرشد وکھالیاں راہیں سمجھاو ندا اے۔ آپنی ہوند دیاں

وکھالیاں راہیں۔ بیگم دی کیتی۔ اوہدی کیتی دا پھل اوہدیاں اکھیاں نہیں۔ اوہدیاں

اکھیاں دی اگ مجبوری نوں بالن بنا کے بھڑکی اے۔ مجبوری کاوڑ بنی تے کاوڑ

کرتب۔ کرتب دی سبجان نے ای بیگم نوں اکھیاں دتیاں۔ اوہنے سررڈ دا پلا پھڑیا تے

اوہنوں بہادر دا دتا زنجیری والا چاقو چیتے آیا۔

نوراں:- نی تکیں اٹھ کے رکھ رپئی ایس۔ نی تکیں اگے بنی آ۔

بیگم :- ہُن بنیاں کوئی نہیں رہیاں۔ مینوں لہہ پیا اے ہُن راہ۔ بس لہہ
پیا اے ہُن راہ۔

مرشد راہ دکھاؤنا اے ویہار نوں تروڑن دا۔ اوہ آپ اسہ راہ تدے ویکھ
سکدا اے جے اوہ ویہار دا لڑ چھڈے۔ رانجھا گھر، ناں، ہستی و نجا کے آپنے میل دی
واہ ورتن وچوں ناواں کٹا کے نکلیا تائیوں ہیر نے اوہ دے نال نیونہ لایا اوہنوں مرشد
نیا بیگم تے ربوں ای ناں ناویوں نین پرانوں وانجی ہوئی اے۔ پر اوہنے چودھری
تے رمودے گھر رہ کے رُمدق صفا ای لئی اے لہہ نہیں پالیا۔ تے اوہ چھڈ سکدی
اے، آپنے نینہ دی سنبھال واسطے اپنا آپاوی اپنا سریر وی۔ ایہو مرشدی سنبھا اے
اوہدیاں بلدیاں تاریاں جیہیاں اکھاں وچ مرشدی تت اے عاشقی دا۔ عاشق اک
دوہجے نوں راہ دکھاوندے نیں ویہار نالوں ٹٹ کے نینہ نال جڑ کے۔ دمودر وچ تے
وارث شاہ وچ مرشد رانجھاوی اے تے مرشد ہیر وی۔ میل نوں تہجن دا راہ رانجھے
وکھایا۔ میل نال بھڑ کے نینہ دی سنبھال دا راہ ہیر وکھایا۔

ویہار نالوں ٹٹ کے نینہ نال جڑن۔ نینہ نال جڑ کے ویہار نالوں ترٹن ایہو ای
گل اے جیہڑی ہوون نہ ہوون والی رمز راہیں ساڈی شاعری دی ریت دات تہئی
رہی اے۔

کے حسین فقیر سائیں دا جیوندیاں مر رہیے

نال تہجن دے رہیے

چالو ویہار دے دتے آپے نوں مار کے ای بندہ جیوں سکدا اے۔ تہجن دے نال
رہ سکدا اے۔ ایس ویہار وچ جیون نہ ہوون اے تے ایس ویہاروں مرن ہوون
اے۔ اکھیاں کھید وچ ایہو رمز اکھیاں دے ہوون نہ ہوون توں ٹری تے ہستیاں
دے ہوون نہ ہوون تیکر گئی۔

زنجیری والا چاقو نشان اے دھرو دے تروڑ دا، آپنے اندروں (صندوق وچوں)
لہی نینہ دی دتی دڑھتا دا۔ بیگم اچیتی زنجیری والے چاقو تائیں نہیں اپڑی دوہی
جھاکی (سوہرے گھر) وچ اوس آپنی پوری حیاتی دی مجبوری نوں جھاگیا اے۔

نوراں :- کیہہ پئی لہہنی سیں مینوں دس۔

بیگم :- راہ پئی لہہنی آں۔

نوراں :- کیہاراہ۔

بیگم :- ایتھوں باہر جان دا۔

نوراں :- نی باہر کتھے جانا ای۔

بیگم :- رنم والے ویزھے وچ۔ میرا اتھے ساہ گھٹیا جاندا اے پیا۔

نوراں :- نی رنم والا ویزھا اتھے۔ میرا مطلب اے پئی رنم والے ویزھے۔ نی او تھے تے بندے بیٹھے ہوئے نیں۔ او تھے کیہ کرنا ای جا کے۔ چل کوٹھے اُتے لے چلوں۔

بیگم :- نہیں نہیں۔ میں نہیں جاندی کوٹھے تے۔ ہیں نی بہادر کتھے وے۔

بیگم نے ہولی ہولی جی بھیا نی ہو کے 'ٹوہ ٹاہ کے سنسیاں دا ہنیرا جھاگیا اے تے ویریاں دے گھر دی اوپر سہی کیتی اے۔ اوہ نینہ واس اے تے نینہ دی آہنت بھال دی اے۔ بہادر دی خشبو، دادو دے کھوہ دی واج، رنم والا ویزھا۔ ٹوہ کے 'اڈی کھوڑے جر کے دوالے دی پچھان مجبوری وچوں باہر نکلن ول پہلا پیرا اے۔ اکھاں والیاں نے اوہدے کولوں نینہ دی آہنت کھوہ کے اوہنوں دھرو دی اوپر وچ ویزھ دتا اے۔ بیگم رنم والے ویزھے جانا چاہوندی اے نوراں آکھدی اے "او تھے تے بندے بیٹھے ہوئے نیں"۔ بھاگو ال وچ تے رنم والا ویزھا ہے ای کوئی نہیں۔ نوراں بیگم نوں پئی ولاوندی اے۔ پر پہلی جھاکی دے انت وچ سانوں پتہ لگدا اے بنی حسن آباد والے رنم والے ویزھے وچ وی "بندے بیٹھے ہوئے نیں"۔ چودھری کرموتے فضل نال جھگڑ کے باہر آیا تے اگوں بہادر ملیا:

بہادر :- میاں جی نیب تحصیلدار صاحب تہانوں ملن آئے نیں۔

چودھری :- ہلا؟

بہادر :- میں اوہناں نوں رنم والے ویزھے وچ بٹھا آیاں۔ آہندے سن ذرا جلدی آؤ۔

چودھری :- ہلا پتر چل۔

اصل وچ رنم والا ویزھا تے بیگم دے نینہ نے وسایا اے آپٹے اندر۔ باہر رنم والے ویزھے یاں ہے ای کوئی نہیں تے جے ہے نیں تے او تھے بندے بیٹھے ہوئے نیں۔ اوپرے۔ اک بے نینہ دنیا دے و سنیک۔ ویاہر دے قیدی۔ ویاہر دے

ہتھیار۔ چودھری مولا بخش آپ وی ایسے دنیا دا بندہ اے۔ وسیب دی ورتن وچ کھیا
 ہویا۔ انگریزی پنجاب دا رسا زمیندار۔ سوڑوں ترٹھا سفید پوشی دی بھرم پگ سنبھالدا۔
 شہر نوکری وی کریندا اے صاحبان نال دورے وی مھکتیندا اے۔ پنڈ آئے سرکاری
 اہلکاراں دے موندہ وی لگدا اے۔ چودھری مولا بخش کوئی نواں نہیں۔ اوہدا شجرہ
 ڈھیر پرانا اے۔ مغل پنجاب وچ رانجھے دے پو موجدو چودھری بارے وارث شاہ
 ہو ریں دسدے نیں۔

موجدو چودھری پنڈ دی پانڈ والا چنگا بھائیاں دا سردار آہا
 بھلی بھائیاں وچ پریتیت اس دی فیا چونترے اُتے سرکار آہا
 موجدو چودھری، چودھری مولا بخش وانگوں رسا زمیندار نہیں۔ پر بھونیں وال رسا
 ہووے کہ نگڑا اوہنوں آپنی مالکی دی سنبھال واسطے باتشہی دے لڑ لگتا پوندا اے۔
 باتشہی نوں وی اوہدی لوڑ ہوندی اے خلقت تائیں بھجن واسطے خلقت کولوں کھٹی
 کھوہن واسطے۔ سواوہ باتشہی دا وچولا وی ہوندا اے۔ اوہدی چودھرا لیسے وچول
 صدقہ ہوندا اے۔ اوہ بھائیاں دی سرداری پاروں سرکاری وچولا بندا اے تے
 سرکاری وچول پاروں اوہدی بھائیاں وچ پریتیت بندی اے۔

انگریزاں پنجاب وچ چودھراں آپ اُساریاں۔ کتے نکیاں کتے موٹیاں۔ پر انیاں
 موجدو دی تھاویں نویں موجدو تے پر انیاں مولا بخشاں دی تھاویں نویں مولا بخش
 کھلیارے تے اوہناں دے رستے راج گھکایا۔ مالے اگرا ہے تے بھرتیاں لیاں۔
 انگریز راج نال خلقت دی ویرو دھی، سیاسی گھول ترکھا تھی گیا تے رسیاں چودھریاں
 ولوں سرکار دی چٹا وی ودھی، دونہ تروٹہ پیڑھیاں وچ رسیاں چودھریاں دیاں
 چودھراں ودھیرے رسیاں ہو گئیاں آہیاں۔ سو کجھ سوڑ پاروں تے کجھ سرکارے
 دربارے اپڑ واسطے رسیاں چودھریاں دی اولاد شہراں وچ پڑھائیاں کرن تے نوکریاں
 لبھن گئی۔ شہراں وچ ویرو سیاسی سوچاں دی واء وی اوہناں نوں لگن لگی۔ سو لیسے
 چودھری دی اک سرکاری تصویر بٹا سوار کے سرکاری پرچار دے چوکھے وچ جڑی
 گئی۔ ایسہ سرکاری تصویر والا چودھری دانا، مسکھڑ اپنے دین دھرم دا وی جانو تے
 سرکاری ویہار دا وی تے دونہاں نال سچا۔ اپنے بھلے وچ سرکار داتے سرکار دے
 بھلے وچ اپنا بھلا سنبھالنے والا، برادری شریکے دیاں بریکیاں دا جانو پر اوہناں دیاں

سوڑاں توں اُچیرا، پاڑ میلنا، سبھا دا موکلا تے نگھا، جیسہ دا مٹھا، ساؤ تے نیاں پال، گنار
 دا گتھلا پر دل دا صاف تے سادہ۔ ایسہ تصویر پادریاں دیاں لکھتاں، اخبارار
 رسالیاں تے سکولی کتاباں راہیں دھمائی گئی تے پنجاب دے جٹ دی انگریزی راز
 نال رسائی دا نشان بنا کے دکھائی گئی۔ جٹ چڑاسی دی نوکری تے ہونا تے اگلیار
 کدیں کدیں اوہنوں وادھو ٹھیک لئی پسماون واسطے چودھری آکھ پچکارنا۔ ایسہ
 تصویر کہانی کاراں دیاں کہانیاں وچ وی اگھڑی تے فلماں وچ وی پری۔ سن 40
 دے نیڑے لہور ریڈیو چلیا۔ دوجی جگت لام چھڑی ہوئی سی۔ بھرتی مونسہ اڈیا ہو یا سی۔
 وڈیرے زمیندار آپنا دھڑا جوڑ کے اسمبلیاں وچ چڑھے بیٹھے سن۔ اوہناں دی لوڑ آہی
 جو پنڈ گراں وچ جٹا کھٹا انگریز نال اوہناں دی سانجھ نوں اپنی سانجھ جائے۔ کیسہ ہالی
 کیسہ پالی کمی سمھو کوئی ڈھڈوں اوہناں دے نال ہو کے پچھے کھلووے۔ ایسہ کم سرنا
 ہارسیاں زمینداراں راہیں۔ سو چودھری دی سرکاری تصویر ریڈیو راہیں واج وچ
 ڈھلی تے مولا بخشاں نوں اوہناں دا کم سمجھاوون لئی، وسوں وچ اوہناں دا آور بناوون
 لئی پنڈ و پنڈ اپڑی۔ دیہاتی پروگرام دا چودھری دوسرے جٹاں دی پرھے وچ بیٹھ
 ہوندا اے تے ایہناں سدھڑ جٹاں نوں سمجھاوون مناون دے رنگ وچ راج کاج دی
 واج خلقت دے کنیں پاوند اے دونوں سدھڑ جٹ بھگت رام تے شہاب دین
 (مگروں نظام دین تے نور دین) کدیں اڑن دا کدیں مٹھن دا سانگ بنا کے ساؤ
 چودھری دی تصویر وچ رنگ بھر دے نہیں۔ پر کدیں کدیں سدھڑ جٹ جلی وی بن
 جان دے نہیں تے نقلیاں دی ریت وچ ہاسے بھانے سرکاری پیسٹریاں نوں سمجھی چو بھڑ
 دی مار جان دے نہیں۔ پر سدھڑ جٹاں دی ایہوانکل ایہو سمجھی کھل دیہاتی پروگرام نوں
 جگ بھاونا بنا کے سرکار دا کم سار دی رہی۔

رفیع پیر نے اوہنیں دینیں ”اکھیاں“ لکھی تے آپیں ریڈیو تے کھیڈ مٹائی۔ اوہ
 آپوں چودھری مولا بخش وی بنے۔ کھیڈ نوں منظوری تے ملی ہوئی اے کھیڈ دے
 ظاہر دیہات سدھارو، انھیاں مٹھا جاں لئی رحم جگاؤ رنگ پاروں تے ایس پاروں بنی
 ایسہ رنگ بناوٹا اے سرکاری چودھری نے جیڑا چودھری مولا بخش دے روپ وچ
 کھیڈ دا اکھاڑا ملی کھلوتا اے۔ پر چودھری مولا بخش دے مہاند رے وچ سرکاری
 چودھری دی تصویر اگھڑی وی اے تے اگھڑے بھج وی جان دی اے۔ سرکاری وچول

وچ رُدھا چودھری اوڑک نیوڈا اے عشق دے سر لتھ تران اگے۔ سُو جھ سیانف دا
 دعو اچھڈ کے آپنے انھے ہوون نوں مندا اے۔ سرکاری چودھری جس عقل نال کم
 ساردا اے، جیہدے نال اوہ دیہاتی پروگرام دیاں سدھڑ جٹاں نوں پرانیاں بھیڑاں
 توں بھگدا اے تے پرانیاں رواجیاں دے روگ مکاون واسطے علم دی دوائی دی
 سرکاروں پروان کیتی خُراک اوہناں دے سنگھوں لنگھاوند اے اوہ اک پتلی جیسی دنیا
 دار عقل اے۔ دیکھو چودھری مولا بخش کرمونوں کیویں سمجھیندا اے۔

چودھری :- پہلوں ایہہ دس کھاں جے کڑی نال کر لنی ساجے پئی کیہڑا
 موتیاں والا ڈولالین پیا آوند اے۔

کرمو :- تیری مت تے نہیں ماری گئی مولا بخشا کڑیاں چڑیاں نال وی
 کوئی ایہو جیسی گل کردا اے۔

چودھری :- اللہ رسول دا حکم تے ایہو اے۔

کرمو :- اللہ رسول نے ایہو جیہا انہونا حکم دینا سی؟۔ ایہہ تے تیس
 لوک جیہڑے دو حرف پڑھ لکھ جانڈے او اوہ آپنے دلوں گلاں پنے
 بنانڈے او۔

چودھری :- اوہ بھلیے ایہہ تے قرآن وچ اے میں تے نہیں بٹائی دلوں
 گل۔

کرمو :- آہ۔ اسیں تے ہوئے نہ گوار ان پڑھ سانوں کیہ پتہ ہووے۔
 جیہڑی دستور دی گل اے۔

چودھری :- دستور جائے تیرا جنم وچ میں اللہ تے رسول دے حکم دی
 گل پیا کرناں یا دستور دی۔ اللہ رسول دا حکم وڈا اے یا دستور۔

کرمو :- پر دستور۔ دستور وی تے چنگی گل دسدا اے۔ کوئی ماڑی تے
 نہیں دسدا۔

چودھری :- اوہ تیرا بھلا ہووے۔ ماڑی تے چنگی گل دا فیصلہ اللہ تے
 رسول نے کرنا اے یا اساں کرنا اے۔

کرمو :- خورے فیر

چودھری :- دستور اوہو ای چنگا ہو سکدا اے جیہڑا اللہ تے رسول دے

حکم تے چلے۔ جیہڑا دستور اوس حکم تے نہ چلے اوہ دستور ساڈے وا تے
بھیڑا اے۔

چودھری کرمونوں ایسہ نہیں دسدائی اللہ رسول نے کڑیاں دی مرضی چٹھن
کیوں ضروری کیتا۔ اوہ کرمونوں دستور دے دا بے وچوں کڈھ کے شرع دے دا بے
یٹھ لیا ون لوڑا اے۔ کرمواتے جیہڑا دستور دا دا پا اے اوہ تے ناں دا اے اصل
دا باتے اوہدے اُتے ہے آپنے لوبھ دا (ایسہ لوبھ رہوے تے ایہنوں شرع دے
سرپوش نال وی کجیا جا سکدا اے)۔ اوڑک چودھری دی ایسہ پتیلی پڑھائی ایسہ
ٹھپ ٹھپا کرن والی عقل ہار جاندی اے: ”ہا۔ اسیں سمجھنے آں اسیں اکھیاں والے
آں۔ ساڈے جیہا انھاتے کوئی ہے وی نہیں۔“ مولا بخش دے مہاند رے دے ہو
وی رنگ نہیں جیہڑے سرکاری چودھری دی تصویر یٹھوں اگھرن دی کردے رہندے
نیں۔ اوہدے وچ زری پتر نال پیار کرن دی ای نہیں پترنوں کھل دین دی وی سکت
ہے۔ اوس بہادر دے ”روح نوں بھنیا تروڑیا نہیں۔“ ایسہ صفت موجود چودھری
وچ آئی:

وارث شاہ ایسہ قدرتاں ربدیاں میں دھیدو نال اوس بہت پیار آہا
خبرے نینہ والیاں نوں سرلتھ بناون وچ ایس پیار دتی کھل دا کتنا کوہتھ اے۔
خبرے ایسہ کھل اوہناں دیاں ویگاں نوں چالو دیہار دی مارتوں اوہلا دیندی اے۔
تدے ای بہادر آکھدا اے۔ ”میاں جی تہاڈے جیہا پیو رب ساریاں نوں دیوے۔“
پر سرکاری چودھری دی بھاج دی گھڑی نیڑے ڈھکدی اے جدوں اوہ دکھ نال تڑک
کے کھوہا گے ورلاپ کریندا اے۔

”اوئے کھوہا۔ اوئے کھوہا۔ اج میرا سارا کجھ لٹ لیا ای تیریاں رنڈاں میری
زمیں وچ سونا ڈھال دیاں ہون دیاں سن تے اج میری ساری حیاتی دی کمائی میرے
کولوں کھس لئی آ۔ آپنے مول دا اینا بیاج۔ اینا بیاج اوئے ظالما کھوہا۔ اوئے موت
دے کھوہا۔“

مولا بخش اے اولاد نوں دولت دیاں رمزاں راہیں چیتے کریندا اے۔ اوہ بہادر
تے بیگم نوں ”میرے دولال“ آکھدا اے۔ رنڈاں دا سونا ڈھال توں سرکاری پرچار
دے ”خوشحال کسان“ ول وی دھیان جاند اے۔ ”تے آپنے مول دا اینا بیاج“ توں

چھتے آوندے نئیں شاہوکاراں دے بدھے قرضائی جٹ۔ بیہناں دیاں گئیں پیاں
پیلیاں چھڈاؤن دا یونینسٹ سرکار نوں دعو! سی۔

دولت دا وگو چا اولاد دے وگو چے دی رمز بنیا اے۔ ملوان ویہار وچ اولاد
دولت ہوندی اے تے دولت اولاد۔ ملوان ویہار دے جم پل آپنیاں دکھاں سکھاں
نوں ناں ناویں دیاں رمزیاں راہیں سنجاندے نئیں ایس پاروں چودھری دا ورلاپ
سنیراں اُتے گھنی کاٹ کریندا آیا اے چودھری دا آپا ویٹیا نہیں پر دکھ دے تاء نے
ایہنوں پکھار دتا اے۔ تے اوہ بہادر دی واج سُسن جو گا تھی گیا اے۔ جیہڑا کھوہ
چودھری نوں ساری عمر دی جمع جتھا کھس کھڑنا شاہوکار بن دیا اے اوہنوں بہادر
جیون جاگن دا کھوہ آکھدا اے۔ چالو ویہار دے دتے آپے دا گواچن چودھری نوں
موت جا پیا اے تے بہادر نوں حیاتی۔ بہادر تے ہتھیں ایہہ آپا گواپا اے۔
بہادر :- روو نہ۔ خوش ہوو۔ مینوں مبارک دیو جے میں اپنی منزل پا لئی
اے۔

چودھری :- ہلا ہلا توں اپنی منزل پا لئی اے۔ میں سمجھیا نہیں بہادر اوہ
کیہڑی منزل اے۔

بہادر :- بیگم۔

چودھری :- بیگم؟ پتہ پر ایہہ لبھیا ای کہ ونجایا ای؟

بہادر :- لبھیا اے۔

چودھری :- آپنا آپ ونجا کے

بہادر :- آہو سہو کجھ گوا کے۔ اتھے گوا کے ای کجھ لبھدا اے۔

بہادر نوں ایہہ رمز بیگم سمجھائی آہی۔ اوس آکھیا ہا۔ ”ہُن میں ساریاں قیداں
تھیں آزاد ہو بیٹھی آں..... تیری محبت دی قید وی باقی نہیں رکھی۔ بہادر ایس گل
تے سوڑا پاتے بیگم سمجھایوس جو ”سچا یار اوسے ویلے لبھدا اے جدوں بندہ اوہدی
محبت تھیں وی آزاد ہو جاوے۔“ مل وان ویہار وچ ملن ای ہوون اے۔ ایس
ویہار دا تروڑا اے مل چھڈن مل دی موہ توں اوہدی چھک توں رہائی۔ تے ایہہ رہائی
مل سکدی اے ملوان ویہار دتی سوچنی نوں تے ایس ویہار دی چھہ چیزیں ویگاں نوں
گوا کے۔ مل وان ویہار وچ پیار وی مل دا ای اک رنگ ہوندا اے۔ اک کھٹی۔

ایسے دی قید بیگم نے تروڑی اے۔ تائیوں اوہ بہادر نوں آن مل سکی اے۔

جیہڑے وسیب دی چالو واہ ورتن دا توڑ بھالدے نہیں جم پل تے اوہ وی ایسے واہ ورتن دے ہوندے نہیں۔ توڑ والا گھول گھلدیاں اوہناں دے اندروں کئیں ایل واہ ورتن دے حمایتی ہو کے اوہناں دا راہ آن ڈکدے نہیں۔ انجھول ای۔ لکھتاں وی وسیب جائیاں دیاں جوڑیاں ہوندیاں نہیں سو اوہناں وچ کئیں ٹکراویں رنگ گڈاؤڈ ہوئے بھدے نہیں۔ ”اکھیاں“ وچ بیگم چالو ویہار دا تروڑا اے۔ پر ویکھو ایسے تروڑ وچوں اچیتے ای چالو ویہار کیویں ملکڑے آن جھاتی مرندا اے۔

جیہڑی رمز بیگم دے اندر جاگے سرڑ دا نشان بندی اے جیہدے راہیں بیگم دھرو دا توڑ کریندی تے نویں رستے پوندی اے اوہ ہے زنجیری والا چاقو۔ ایسہ چاقو بہادر نال بیگم دے نینہ دی نشانی وی اے۔

بہادر :- بیگم ایسہ ہتھ وچ کیہ آ۔

بیگم :- ایسہ لے ویکھ۔

بہادر :- زنجیری والا چاقو

بیگم :- آہ جیہڑا توں لیا کے دتا سی۔ تیرے وانگر ایسہ ماردا وی اے تے جو انداوی اے۔ ایسے واہ تے ہر دم ایسہ میرے کول رہندا اے۔ اتھے سینے دے اُتے دل دے کول۔

پر ایسہ چاقو زرا چاقو نہیں زنجیری والا اے مہنگی سوغات، چودھری دے پتر دی آہنی منگ نوں لہوروں لیا کے دتی مہنگی نشانی۔ ایسہ چاقو بیگم دے رچت چیتے وچ باتشاہزادی دی تلوار بن جاندا اے۔ بیگم نور اں نوں دسدی اے۔

”بہادر اک واری کتاب وچوں مینوں کمانی سنائی سی۔ اوہدے وچ اک باتشاہزادی سی۔ اوہ باتشاہزادی جیسی سوہنی تلوار چلائی جانندی سی جے وڈے وڈے اوہدے کولوں ڈر جاندا سی۔“

رچت چیتے وچ چاقو تلوار ہو جاندا اے تے بیگم آپ باتشاہزادی۔ اوہ بہادر نوں دسدی اے۔ ”میں اک باتشاہزادی تے ایسہ میری تلوار۔“ (دونویں ہنس پندے نہیں) ایسہ ہاسا بیگم تے بہادر دے بالیپے ول کھڑکے اوہناں دے عشق نوں معصومی دا رنگ وی دیندا اے پر نال ای اسیں ایسہ وی چیتے کر سکنے آں جو بال کمانیاں راہیں

باتشا ہزادیاں بالاں دی معصومی نال کیسہ ہتھہ کیتا۔ اتھھے بیگم ہا سے بھائے باتشا ہزادی دا پیسٹرا بنھ کے دکھاوندی اے پر ایسہ پیسٹرا اوہدے اندر دی اک رمز بن گیا اے۔ اوہدی نویں ونی ہوئی ہستی دا نشان۔ مڑ تلوار دی تھاں شمشیر دا لفظ آجاندا اے۔

”ایس باتشا ہزادیاں دی شمشیر دے نال میں ساریاں زنجیراں وڈھ چھڑیاں نہیں۔“

کتاب وچوں سٹی کمائی نے اوکھے ویلے انھی یتیم نمائی کڑی دے اندر اک خواب خیالی شان والی زور آور ہستی دی تصویر جگائی اے۔ نیونہ نے نیگمے کولوں جیسرہی انہونی کرائی اے ایس تصویر دا وی اوہدے وچ ہتھہ اے۔ سمجھو نیونہ ایس تصویر راہیں رنگ پھڑکے اُدم بنیا اے۔ باتشا ہزادیاں دیاں کمائیاں یاں باتشا ہزادیاں نوں پوہندیاں سن یاں اوہناں نوں جیسرے سمجھدے سن بنی غریبی دا دکھ نشان تے بے وی آپوں باتشا ہاں جسے ہو کے ای حکم سکدے نیں۔ انگریزاں نے مغل تخت موبہ اماریا تے مغلان دے بھگت بھوئیں وال میل نے پرانی باتشاہی دیاں کمائیاں نال آپنے اُجڑے چیتے نوں آباد کیتا۔ ایسہ کمائیاں تاریخی ناولاں تے بال کتاباں راہیں نویاں پڑھیاں دے چت چیتے چڑھیاں۔ انگریز سرکار دے پر بندھ بیٹھ نویں پڑھائی راہیں نویاں پیاراں نوکریاں تے آہراں راہیں اک نواں میل جڑیا۔ ایس میل وچ ماڑیاں بھوئیں والاں دی دوجی پیڑھی وی سی۔ وڈکیاں نوں شاہوکاراں دیاں قرضیاں نہرٹیا سی نویں پیڑھی نوں شاہوکاراں دی اولاد نوکریاں پڑھائیاں پیاراں تے آہراں دا راہ مل کھلوتی جاپی۔ ایس سوڑ نے ایس میل دے چت چیتے وچ نشان تے بے وی دے کچے کھٹے ایہناں کھپاں نوں پورن واسطے ایس میل نے وی پرانیاں باتشاہیاں نوں اپنا پچھا منیا تے پرانی باتشاہی رہل دے ٹانگے آپنے سمجھدے آپے نوں لائے۔ آپنی کھروی ہوند دی اچھا نہ مارن واسطے باتشاہی رہل دیاں ملوک لفظاں پینتیریاں تصویراں دا تڑکا لایا۔ رفیع پیر دی جوانی ویلے ایسہ بناوٹی ملوک رہل چڑھتے سی۔ پر اوہناں دی پیڑھی دے کچھ ٹانویں سو جھوان ملوک رہل دے موہ جال وچ سوڑے وی پیندے سن پئے۔ ”اکھیاں“ ایسے سوڑ دا رٹہ اے۔ ”اکھیاں“ رمز اے نویں دیکھنی دی بھال دی، پرانا آپا وٹاون دے جتن لئی لوک ریت وچ رلن دی۔ پر نویں

جتن وچ پرانے دا پر چھاواں اچیت ای آن رلدا اے۔ ایہو پر چھاواں اے بیہرا بیگم
نوں باتش ہزادی بنیندا اے۔ چاقو نوں زنجیری لا کے پہلوں تلوار تے اوڑک شمشیر بنا
دیندا اے۔

بیگم :- میں اک باتش ہزادی تے ایسہ دے میری تلوار (دونویں ہس

پنیدے نہیں)

بہادر :- تینوں اوہ کمائی نہیں جھلی۔

بیگم :- اوہ تے کدوں دی پرانی وی ہو چکی اے ہُن اگوں میری کمائی

رُے گی۔ ہُن میری کمائی دی وار اے۔

بہادر :- (رمزناں) تیری کمائی وچ جیل خانہ وی ہووے گا بیگمے.....

بیگم :- باتش ہزادیاں دیاں کمائیاں وچ جیل خانے نہیں ہوندے قلعے

ہوندے نہیں تے تہہ خانے ہوندے نہیں تے پھیر بڑیاں بڑیاں جنگاں

ہوندیاں نہیں تے یاں پھیر ہوندى اے موت۔

ہُن بیگماں بھاویں پنڈ دیاں انھیاں ہون تے بھاویں شردیاں سجا کھیاں جے اوہ

چالو ورتارے نال کھیندیاں نہیں اوہدی ریت اُلا نگھدیاں نہیں تے اوہناں دی کمائی

وچ جیل خانہ سر پر ہوندا اے۔ قلعیاں دے تہہ خانے وی ہوندے نہیں پر اوہ او تھے

باتش ہزادیاں نہیں قیدناں بن کے جان دیاں نہیں۔ تے جد مخلوق نے وڈیاں وڈیاں جنگاں

چھوہ کے آپی مہار باتش ہزادیاں دے ہتھ دے دتی تاں ایہناں جنگاں وچ مخلوق نوں

بھانج ای پئی۔ پر انیاں کمائیاں حاکی دا اصل لکا کے دھرو دا کو جھ کج دیاں نہیں۔ جنگاں

نوں، قلعیاں تہہ خانیاں نوں، مل دے راہ آئی موت نوں سہن دا پریو پواندیاں

نیں۔ ایسہ پر انیاں کمائیاں پر انیاں درباری لکھیاں راں دا رہند سن جیہڑا نوں تھڑے

تھڑے وچلے میل نے مڑنواں کیتا تے وت آپی جوٹھ خلقت نوں چاوندی۔

بے وی تے نتان دی ماری ”میں“ بے اوڑک مل، شان تے حاکی نال

اندرو کے کھپے پورنا چا ہوندى اے یاں بے اوڑک چرچے نال، امر مشہوری نال۔

اوہدے بھائے موت والا کھپا وی مشہوری دی بھرتی نال بھرتج سکدا اے۔ بیگم

باتش ہزادی دیاں پر انیاں کمائیاں دی تھاں تے آپی کمائی چلا کے موتوں اگیرے لنگھ

جیونا چا ہوندى اے۔ بیگم عام پنڈ وناں ہو گیا ہو یا اے پر اتھے ایسہ ناں آپنے اصلے

دل پر تدا جا پدا اے۔ ناں کھیڈ وچ دو نہ رنگاں دے نہیں۔ اک وسیب دی پرانی
 رسم ریت نال جڑے ہوئے "کرمو" تے "فضل"۔ کرم آواگون والا ہووے تاں
 وی تے مہروالا ہووے تاں وی، چالو ویسا دی موت ول کھڑا اے۔ کرمو آپنے
 دھرو نوں دستور دسدی اے۔ "فضل" وی کرم دے نالو نال اے پرانی غریبی دے
 دکھ نوں وی رب دا فضل آکھ کے جریا جاندا اے تے ٹھگی دی آندی نوں امیری آتے
 وی "فضل ربی" دا بورڈ لایا جاندا اے۔ "مولا بخش" وی ایسے پرانے دستور نال
 جڑیا ہويا اے۔ نواں تے سرکاری ہوون پاروں اے پرانی رسم ریت نال اوہدالا گا
 ہے تاں ای اوہ سرکار دے کم آسکدا اے۔ "حسن آباد" بیگم دی باتشہزادی والی
 کمائی راہیں آپنے فارسی اصلے ول اڈار ہوندا جا پدا اے۔ "بیگم" تے "بہادر" وی
 پنڈواس وچ چلدے ناں نہیں پر ایہہ "کرمو" تے "فضل" تے "مولا بخش" والی پئی
 وچ نہیں کچھ ملو کڑے نہیں۔ باتشہزادی دی گل ایہناں ناواں نوں پنڈواس وچوں
 نکھیر کے تاریخی ناواں راہیں حاکم میلاں نال جوڑ دی جا پدی اے۔ تے "موجو
 جٹ" والی پئی تے ہو روی پرانی اے۔ کھروی تے بیٹی۔ ملوک شہری رہتل دے
 حساب سرائیس رنگ دا ناں پنڈوسوں دے کسے پرانے ہوڑھ ہیرے کبندے سبھا دا
 نشان اے جیہڑیاں تے باسوہینا ہو سکدا اے یاں کریت بھریاں ڈراوتا۔
 چودھری :- بیگم دا مینوں بڑا فکر اے۔ کرمو تے فضل چنگا نہیں کیتا۔
 بیگم جیسی کڑی نوں ڈھک بنا کے موجو جسے وحشی جُٹے دے ڈھائے چاڑھ
 چھڈیا نہیں اوہ کڑی تے ایہناں لعنتیاں جوگی ہے ای نہیں سی۔
 سو بیگم تے بہادر دے نینہ نوں دولیوں گھیرا اے موجو جٹ دے ہوڑھ ہیرے
 داتے کرمو تے فضل دے کپت تے ٹھگی دا، تریجا راہ راہ جا پدا اے پر اصل وچ اوہ
 ایسے گھیرے دا پایا بھلاوا اے۔ اوہ راہ ہے مولا بخش دی سرکاری چودھر راہیں نوں
 شہری وچلے میل نال جا جڑن دا۔ ایس بھلاوے دیاں ڈوراں بیگم تے بہادر دے اندر
 گڈیاں ہوياں نہیں چودھری دی پال راہیں، اوہناں دیاں ناواں وچ اوہناں دی
 چتارنی تے سوچنی وچ۔ ایہہ بھلاوات مارو اے کیونجو ایہہ بہوں سہاونا جا پدا اے
 نالے بیگم تے بہادر ایہدے ولوں سچیت وی نہیں۔

نیونہ دی چالو ویسا وچ کوئی تھاں نہیں۔ سو بیگم تے بہادر موت قبولدے نہیں

تے ایسہ موت رمز بندی اے چالو ویسار دے توڑ دی۔ موت حیاتی دا نشان بنی لوک شاعری دی ریت دی جاگ راہیں۔

کھوہ حیاتی دا سوما اے۔ کھوہ سانجھے لوک جیون دا نشان اے۔ پانی بھونیں وچ آپنا آپ گواوندا اے وت بھونیں وچوں پانی بن کے باہر آوندا اے تے بھونیں نوں ترلاوندا اے۔ کھوہ آپنا آپ گوا کے جیوں چین دا جیوں کے سبھ نوں جوالن دا نشان اے۔ دریاؤں پریری و سوں کھوہاں سرای آہی۔ کھوہ وی دریا وانگ بھیت بھریا بے۔ پانی ایدہی اوہل نے ایدہی ڈونگھ نے ایدہا بھیت ڈونگھیرا کردتا اے۔ ایسہ جنانی ورگا اے۔ چپ۔ رت پالنہار جوالنہار (ہر کوئی ایدہی سرے جیوندا اے ہر کوئی ایدہی کولوں تر و ہندا اے) وچ ڈھے پون توں۔ ایسہ حیاتی دا اوہ تت ست اے جیہڑا اڈٹھا رسم کے بھونیں اندر رُک گیا اے۔

مل والیاں بھونیں ونڈی تے کھوہ وی ونڈے۔ تہ کچھ کھوہ ویساروں باہر ہو کے لوک ریت وچ مڑ گئے۔ ویسار دے وجوگ پاروں بندے دے گواچے، اچیت ہوئے تت ست دا بوہا بن گئے۔ ایسہ بوہا بندے دے اندر لکی اچیت سکت ول کھلدا اے۔ بیٹھ وگدی اڈٹھ سکت جیہڑی مڑ و ترلا سکدی اے جے بندہ اوہنوں اپڑ سکے تاں۔ لوک ریت دے ایسہ کھوہ کھلے جی دے وی نیں تے سبھ دے سانجھے وی نیں۔ مارن ہاروی نیں۔ وت جوالنہار وی نیں۔ باہروں انھے تے وچوں اکھیاں والے، سبھ کچھ ویکھنے۔ جیہڑا وچ ویکھے اوہنوں اوہدی شکل و کھالنے۔ پورن دا کھوہ، یوسف دا کھوہ، بابے فرید دا کھوہ۔ پورن تے یوسف نوں تے کھوہ وچ ہو رناں دھکیا۔ پر بابے ہو ریں آپوں کھوہ وچ پٹھے لمکے۔ ویسار دی دتی پٹھی ہوند نوں سدھن لئی۔ بابے ہو راں دا پٹھا لمکن دی پرانی ہستی مکاون، اچیت کھوہ وچوں نویں سچیت، ہستی سنبھالن اے۔ پورن وانگ۔ بیگم تے بہادر وی آپیں کھوہ قبولیا اے تے اوہناں دا کھوہ ایسے لوک ریت دی جاگ نال جگیا اے۔ ماہیہ دے بول کھوہ دی واج نال اک رک ہو کے وائیں رس گئے نیں۔ دنیا داراں نوں کملا پئے کریندے نیں تے سوجھ بھالاں نوں سوجھ پنے دیندے نیں۔

پر کھوہ ہر نویں آئے نوں نواں کرنا پوند اے۔ چالو ویسار نال بھرن لئی آپنی ہوند پڑیں نٹارن لئی۔ چودھری نوں اوہدا کھوہ اوہدی مل دا نشان سی جیہڑا اوہدیاں

زمیناں وچ سونا ڈھالدا سی ایسہ پہلوں تاں اوہنوں شاہوکار بن نکریا تے اوہدی مایا کھس کھڑیوس۔ اوہنوں وگوچے وچ بوڑیوس۔ وت ایسے کھوہ وچوں، ایسے لگے اُجڑے اندر وچوں بہادر تے بیگم دی واج نواں چائن بن اُبھری۔ نویں چائن دی دتی سوجھ امتنی ای ڈھیر آہی:-

”ہا۔ اسیں سمجھنے آں اسیں اکھیاں والے آں ساڈے جیہا تے انھا کوئی ہے وی نہیں۔“ پر ایس مکاء توں مگروی لکھت دی اک ودھرو دھی لبھدی اے ایسہ کھیدکار دا بیان اے:

”کیاں ورھیاں دے بعد چودھری مولا بخش دی خواہش پوری ہوئی۔ اوہنوں دل دیاں اکھیاں لبھ گیاں تے اوہنے بیگم تے بہادر نوں پھیراک واری آپنی اکھیں منکیا۔ ایس طرح دے نال بیگم دی پیشین گوئی پوری ہوئی تے بیگم تے بہادر دے عشق دی روایت مشہور ہو گئی۔ اودوں دا دادو دا کھوہ اک زیارت بن گئی تے بہن بیگم دا کھوہ اکھواندا اے۔ سُنیندا اے اوہ اپانی انت دا مٹھا اے تے اوہدے وچوں ہر ویلے پُھلاں دی خشبو آوندی رہندی اے۔ تے جیڑا اکھیاں دے روگ والا اوس پانی نال اکھیاں دھو دے اوہ دیاں اکھیاں مڑ چنگیاں ہو جان دیاں نہیں۔ آہندے نہیں اوتھے کواریاں کڑیاں زنجیری والے چاقو دے چڑھاوے چڑھان دیاں نہیں تے اوہناں دیاں سبھ مُراداں پوریاں ہو جان دیاں نہیں۔ بیگم دے کھوہ تے ۱۹ نماں دے درختاں دا جھنڈا اے۔ تے اوہناں دے بیٹھاں نیسھن والے تھڑے بنے ہوئے نہیں تے سُنیا اے سال وچ اک دن آوند اے جدوں ادھی رات ویلے بیگم تے بہادر آہندے نہیں تے اک نم دے تھلے تھڑے اُتے بہہ کے اپنا ماہیا گاوندے نہیں۔ بعضیاں قسمت والیاں نے اوہناں دا ماہیا آپنے کنیں سُنیا اے۔ جے تہاڈے وچوں کے نوں اکھیاں دا روگ ہو دے تے اوہ بیگم دے کھوہ دے پانی نال آپنیاں اکھیاں دا چا علاج کرے۔“

اتھے جیڑا کھوہ اے اوہ بیگم تے بہادر داماں جو الٹا کھوہ نہیں چودھری مولا بخش دی کھٹی کھس کھڑنا کھوہ نہیں۔ ایسہ اک کھلو تا کھوہ اے۔ جدوں رمزاں دے کھوہ کھید وچوں نکل کے بیان وچ آجاو تاں اوہ کھلو جاندے نہیں۔ آپا و نجاو دے ہتھ پیرو ڈھاو دے، پُٹھیاں لکھن دے کھوہ نہیں رہندے زیارتاں دے کھوہ بن جاندے نہیں۔ جتھے گئے ہوئے رکھ نہیں تے رُکھاں تھلے بہن لئی تھڑے بنے ہوئے نہیں۔

زیارتاں دے کھوہ لوک نوں آپنے دوالے تھڑیاں اتے سکھالی بہنی بہال کے تھڑے
 بٹاون والیاں داکم سار دے نہیں۔ زنجیری والے چاقو دھرو دا راہ نہیں مرندے
 چڑھاویاں دا ڈھیر بن جاندے نہیں۔ بیگم تے بہادر دا ماہیا کیساں دا گاؤن بن ویندا
 اے جیہنوں قسمت والے یاں ناویں والے ویل دے کے سُن سکدے نہیں۔ بیگم تے
 بہادر دے روح سرخرو نہیں جو اوہناں دی کیتی کہانی بن رُری اے تے سرکاری ریڈیو
 راہیں پنڈ و پنڈ اوہناں داتاں پیا وجد اے۔